


JULAI - DISEMBER 2024

BULETIN

DBKK



DEWAN BANDARAYA KOTA KINABALU

SESI TOWN HALL DBKK TAHUN 2024



MENUJU DIGITALISASI



KK HIJAU DAN INDAH



KK BERSIH DAN SIHAT



DBKK DAN KOMUNITI, "WE TEAM UP!"



Imbas Kod QR
untuk mengakses
Buletin DBKK
Julai - Disember
2024 versi digital



ISI KANDUNGAN



- | | |
|---|---|
| 03 Dari Pena Mayor | 43 Kesihatan Persekitaran |
| 04 Laungan “Jiwa Merdeka”! Bandaraya Kota Kinabalu Gelorakan Sambutan Hari Kebangsaan | 46 <i>Go Enforce!</i> |
| 06 Dirgahayu Tuan Yang Terutama Tun! Imbasan Acara Bersempena Sambutan Ulang Tahun Kelahiran Rasmi Ke-71 TYT Yang di-Pertua Negeri Sabah | 48 Pemantapan Kualiti Perkhidmatan Dan Pentadbiran |
| 09 Sambutan Dan Keraian | 53 Menuju Digitalisasi |
| 12 Jejak Diari Mayor | 57 Pembangunan Luar Bandar |
| 19 Sinergi Antarabangsa | 58 Pelancongan Berasaskan Komuniti (CBT) |
| 21 Lawatan Dan Kunjungan Rasmi | 61 Penyelidikan |
| 25 DBKK Dan Komuniti, <i>‘We Team Up!’</i> | 62 Cerita Sukan DBKK |
| 31 KK Bersih Dan Sihat | 64 Diari PUSPANITA CBKK |
| 38 KK Hijau Dan Indah | 70 Jasamu Dikenang |
| | 73 Belasungkawa |

SIDANG REDAKSI

PENAUNG

YBhg. Dato’ Sri Dr. Haji Sabin bin Samitah, *JP*
Mayor Bandaraya Kota Kinabalu

PENGERUSI

Puan Faradillah binti Haji Abdul Rani
Timbalan Ketua Pengarah (Khidmat Pengurusan)

EDITOR

1. Puan Noorziana Zainih
2. Cik Eleanor Michelle Patrick
3. Cik Olga Charles

SUMBER FOTO

Encik Mohd. Asruddey Rusli
Encik Renaldo Fernandez

PENASIHAT

YBhg. Datuk Sr. Lifred Wong
Ketua Pengarah

KETUA EDITOR

Puan Jainab Saidi
Pengarah Jabatan Pengaduan dan Perhubungan Awam

SUMBER ARTIKEL

Semua Jabatan

DARI

Pena MAYOR



Dato' Sri Dr. Haji Sabin Samitah, JP
Mayor Bandaraya Kota Kinabalu

**Assalamualaikum Warahmatullahi Wabarakatuh.
Salam Malaysia Madani Dan Salam Sabah Maju Jaya.**

Buletin DBKK Edisi Julai-Disember 2024 ini menampilkan pencapaian terbesar Dewan Bandaraya Kota Kinabalu (DBKK) dalam usaha mentransformasikan bandar raya kita ke arah kecemerlangan yang lebih tinggi.

Sepanjang tempoh ini, peristiwa yang paling menonjol ialah **Majlis Menandatangani Memorandum Persefahaman (MoU) antara DBKK dan Suruhanjaya Komunikasi dan Multimedia Malaysia (SKMM)**, yang menjadi mercu tanda kepada aspirasi Kota Kinabalu sebagai Bandar Raya Pintar. Inisiatif ini memanfaatkan teknologi digital dalam mempertingkatkan kecekapan perkhidmatan, memperkasa ekonomi bandar, dan memperbaiki kualiti hidup warganya. Ini adalah satu langkah signifikan yang mencerminkan komitmen DBKK terhadap pembangunan inovatif dan mampan.

Selain itu, pelancaran **Strategi Bandar Hijau Kota Kinabalu** memperkukuh lagi usaha melestarikan alam sekitar dengan penekanan kepada pemuliharaan hijauan bandar dan pengurusan sumber yang berkesan.

Dalam aspek kesejahteraan komuniti, program **Komuniti Prihatin Bandaraya** terus memainkan peranan penting dalam merapatkan jurang sosial dan menyokong golongan yang memerlukan.

Kesemua inisiatif ini mencerminkan visi dan komitmen DBKK untuk menjadikan Kota Kinabalu sebagai bandar raya yang inklusif, selamat, dan lestari. Kejayaan yang dikecapi adalah hasil usaha bersama warga bandar raya, dan saya percaya dengan sokongan berterusan, Kota Kinabalu akan terus cemerlang di peringkat tempatan dan antarabangsa.

Akhir kata, tahniah kepada Sidang Redaksi Buletin DBKK atas penerbitan edisi yang penuh informatif dan inspiratif ini. Semoga ia menjadi medium untuk meningkatkan kesedaran dan penglibatan warga bandar raya.

Sekian, terima kasih dan selamat membaca.



MAJLIS PELANCARAN KIBAR JALUR GEMILANG DAN BENDERA NEGERI SABAH TAHUN 2024 PERINGKAT NEGERI SABAH



Sambutan Bulan Kebangsaan Hari Sabah dan Kempen Kibar Bendera secara rasminya telah membuka tirai dalam satu majlis pelancaran yang disempurnakan oleh YAB Datuk Seri Panglima Haji Hajiji bin Haji Noor, Ketua Menteri Sabah, di pekarangan bangunan Dewan Bandaraya Kota Kinabalu (DBKK) pada 01 Ogos 2024.

Majlis pelancaran ini turut melakar sejarah apabila secara julung-julung kalinya sambutan Hari Kebangsaan diraikan serentak dengan Hari Sabah. Bertemakan "Malaysia MADANI: Jiwa Merdeka", orang ramai diseru untuk menzahirkan semangat kemerdekaan sekali gus memeriahkan lagi sambutan ini dengan mengibarkan Jalur Gemilang dan bendera Negeri Sabah, di rumah mahupun premis perniagaan masing-masing.

Turut hadir adalah YB Datuk Seri Panglima Haji Kadzim Haji M. Yahya, JP, Speaker Dewan Undangan Negeri (DUN); YB Datuk Seri Panglima Haji Masidi bin Manjun, Menteri Kewangan Negeri Sabah selaku Pengerusi Jawatankuasa Induk Majlis Pelancaran Bulan Kebangsaan Hari Sabah dan Kempen Kibar Bendera Tahun 2024; YB Datuk Seri Panglima Sr. Haji Safar bin Untong, JP, Setiausaha Kerajaan Negeri Sabah; YBhg. Datuk Makhzan bin Mahyuddin, Setiausaha Persekutuan Sabah dan YBhg. Dato' Sri Dr. Haji Sabin bin Samitah, JP, Mayor Bandaraya Kota Kinabalu selaku Pengerusi Jawatankuasa Kerja Majlis Pelancaran Bulan Kebangsaan Hari Sabah dan Kempen Kibar Bendera Tahun 2024.

Ketibaan barisan tetamu kehormat ke majlis ini telah disambut oleh seramai 50 pelajar sekolah Sekolah Kebangsaan (SK) Pangkalan TLDM Kota Kinabalu, yang turut disertai oleh lima (5) guru pengiring.

Antara pengisian majlis adalah pengagihan bendera kepada wakil agensi-agensi kerajaan dan bukan kerajaan yang hadir, antaranya ialah Markas Pemerintahan Armada Timur, Pesuruhjaya Polis Kontinjen Sabah, Markas Divisyen Ke-5 Infantri Malaysia, Agensi Penguatkuasaan Maritim Malaysia, wakil-wakil kementerian, persatuan dan lain-lain.

Dalam majlis ini, YAB Ketua Menteri turut berkesempatan untuk melancarkan Kembara Merdeka Jalur Gemilang anjuran Jabatan Penerangan Negeri Sabah. Kembara Merdeka Jalur Gemilang ini disertai oleh 18 buah kenderaan dan 60 peserta yang akan menjelajah ke seluruh pelusuk negeri Sabah bagi mengedarkan bendera Jalur Gemilang dan bendera negeri Sabah kepada orang ramai.

Setinggi-tinggi tahniah diucapkan kepada seluruh Jawatankuasa Penganjur Sambutan Bulan Kebangsaan Hari Sabah dan Kempen Kibar Bendera yang bertungkus-lumus dalam memastikan kelancaran majlis pada tahun ini.



Jalan Tun Fuad Stephens telah menjadi saksi berlangsungnya kemeriahan Perbarisan Hari Kebangsaan dan Hari Sabah Tahun 2024 pada 31 Ogos 2024.

Majlis penuh makna ini diserikan lagi dengan kehadiran Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah dan Yang Amat Berbahagia Toh Puan Datuk Seri Panglima (Dr.) Hajah Norlidah binti Tan Sri Datuk R.M. Jasni. Dengan sambutan alunan irama tradisi dari kumpulan muzik Lembaga Kebudayaan Negeri Sabah, ketibaan TYT Yang di-Pertua Negeri Sabah dan YABhg. Toh Puan telah diiringi oleh YAB Datuk Seri Panglima Haji Hajiji bin Haji Noor, Ketua Menteri Sabah dan isteri, YABhg. Datin Seri Panglima Datuk Hajah Juliah Salag.

Tirai majlis telah dibuka dengan Kawalan Kehormatan Utama Tentera Darat Malaysia daripada Batalion Ke-22 Rejimen Askar Melayu Diraja, yang telah berarak masuk mengambil tempat dengan kekuatan seramai tiga (3) pegawai dan 103 anggota lain-lain pangkat.

Kumpulan pancaragam Polis Diraja Malaysia seterusnya mengiringi nyanyian lagu Negaraku dan lagu Sabah Tanah Airku yang kemudiannya disusuli dengan upacara lafaz ikrar oleh 15 wakil agensi penguatkuasaan negeri Sabah.

Sorakan merdeka oleh 300 ahli Majlis Belia Sabah bertambah gemanya tatkala acara berjalan lalu 150 kontinjen perbarisan mula beraksi mengikut kategori, antaranya Kategori Sekolah Rendah, Sekolah Menengah, Institusi Pengajian Tinggi Awam dan Swasta (IPTA/IPTS), Swasta/Badan Berkanun, Pertubuhan Bukan Kerajaan (NGO), Persatuan Etnik Sabah, Jabatan Kerajaan Tidak Berpakaian Seragam Rasmi dan Jabatan Kerajaan Berpakaian Seragam Rasmi.

Lebih 50,000 orang pengunjung yang hadir turut teruja untuk merakam momen indah sambil menyaksikan perarakan 39 kontinjen kenderaan dan aset keselamatan negara yang tiap tahun sentiasa berjaya memukau hati. Acara seterusnya diteruskan dengan persembahan Tempur Tanpa Senjata dan War Dance oleh Tentera Darat Malaysia, serta persembahan "Jiwa Merdeka" oleh kumpulan artis budaya Lembaga Kebudayaan Negeri Sabah bersama artis-artis tempatan seperti Rey Kimara, Sharif Zainal, Izzi dan Jachinta Chia.

Tidak ketinggalan, persembahan kumpulan koir gabungan DBKK dan Sabah Credit Corporation yang telah membangkitkan semangat cintakan tanah air dengan persembahan lagu "Madani Jiwa Merdeka", "Jalur Gemilang", "Malaysia", "Sabah Maju Jaya" dan "Lagu Integriti".

Tahniah diucapkan kepada seluruh rakyat negeri Sabah yang telah memancarkan citra Hari Kebangsaan dan Hari Sabah 2024 dengan penuh gemilang. Setinggi-tinggi penghargaan dan sorakan syabas kepada ahli-ahli jawatankuasa dan semua peserta perbarisan yang menjadi tonggak utama kepada penganjuran majlis.

Demi Malaysia tercinta. Demi Sabah, tanah airku!

ACARA PERBARISAN

HARI KEBANGSAAN DAN HARI SABAH 2024, UKIR MOMEN INDAH DI JALAN TUN FUAD STEPHENS





ISTIADAT PERBARISAN

DISAMBUT MERIAH DENGAN KEHADIRAN HAMPIR 10,000 PENGUNJUNG DI PADANG MERDEKA

Bahang kemeriahan sambutan Istiadat Perbarisan bersempena Sambutan Ulang Tahun Kelahiran Rasmi Ke-71 Tuan Yang Terutama Yang di-Pertua Negeri Sabah jelas dirasai dengan kehadiran hampir 10,000 pengunjung di Padang Merdeka Kota Kinabalu, seawal jam 6.00 pagi pada 05 Oktober 2024.

Majlis yang disambut dengan penuh istiadat ini dimulakan dengan perarakan masuk Kawalan Kehormatan Utama (KKU) Tentera Darat Malaysia daripada Kem Sri Kinabatangan Sandakan yang diketuai oleh Mejar Roshidee bin Husni dengan kekuatan seramai tiga (3) pegawai dan 103 anggota lain-lain pangkat.

Turut mengiringi ketibaan Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah bersama isteri, Yang Amat Berbahagia Toh Puan Datuk Seri Panglima (Dr.) Hajah Norlidah binti Tan Sri Datuk R.M. Jasni, adalah tembakan meriam sebanyak 17 das oleh Tentera Darat Malaysia, yang diketuai oleh Mejar Rusdi bin Husin dengan kekuatan anggota tiga (3) pegawai dan 41 anggota lain-lain pangkat.

Pengunjung yang hadir telah dipersembahkan dengan pelbagai intisari menarik sepanjang majlis, antaranya adalah Pertandingan Berjalan Lalu yang menyaksikan penyertaan daripada 82 kontinjen perbarisan yang terbahagi kepada lapan (8) kategori utama, termasuk jabatan kerajaan berpakaian seragam rasmi, jabatan kerajaan tidak berpakaian seragam rasmi, swasta, pertubuhan bukan kerajaan (NGO), etnik negeri Sabah, institusi pengajian tinggi, sekolah menengah dan sekolah rendah.

Sambutan diteruskan dengan persembahan khas daripada kumpulan tari Lembaga Kebudayaan Negeri Sabah (LKNS) yang menampilkan kepelbagaian kaum dan etnik di negeri ini menerusi gabungan gerak tari dan warna warni yang tentunya memikat hati para penonton.

Kemeriahan dan semangat sambutan pada kali ini disemarakkan lagi dengan penyampaian lagu berjudul "Selamat Hari Lahir TYT", yang dipersembahkan oleh Kumpulan Koir DBKK di bawah pimpinan Encik Markus Anggun, dengan kekuatan seramai 15 orang anggota.

Setinggi penghargaan kepada semua ahli jawatankuasa dan kontinjen perbarisan yang telah memberikan komitmen dalam menjayakan Istiadat Perbarisan bersempena Sambutan Ulang Tahun Kelahiran Rasmi Ke-71 Tuan Yang Terutama Yang di-Pertua Negeri Sabah!





ACARA BERBASIKAL BERSAMA TYT

Penyertaan lebih 1,000 penggemar sukan berbasikal telah menyemarakkan lagi kemeriahan Acara Berbasikal Bersama TYT bersempena Sambutan Ulang Tahun Kelahiran Rasmi Ke-71 Tuan Yang Terutama Yang di-Pertua Negeri Sabah pada 03 November 2024 di Padang Merdeka, Kota Kinabalu.

Hadir menyempurnakan acara pelepasan ialah YB Datuk Seri Panglima Dr. Joachim Gunsalam, *JP*, Timbalan Ketua Menteri II merangkap Menteri Kerajaan Tempatan dan Perumahan selaku Pengerusi Jawatankuasa Induk program sambil diiringi oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu.

Mengetuai kayuhan adalah Yang Amat Berbahagia Toh Puan Datuk Seri Panglima (Dr.) Hajah Norlidah binti Tan Sri Datuk R.M. Jasni.

Menerusi kayuhan sejauh 22.5 kilometer ini, para peserta telah melalui beberapa kawasan sekitar Bandaraya Kota Kinabalu, seperti Lembaga Hasil Dalam Negeri (LHDN), Cyber City, Perhentian Bas Lapangan Terbang Antarabangsa Kota Kinabalu (KKIA), Pantai Tanjung Aru dan bulatan Masjid Negeri.

Selain aktiviti kayuhan basikal, Yang Amat Berbahagia Toh Puan turut meluangkan masa untuk menanam pokok di Pantai Tanjung Aru yang juga merupakan lokasi 'pit stop', sebelum kembali ke Padang Merdeka, Kota Kinabalu.

Majlis diteruskan dengan acara memotong kek Ulang Tahun Kelahiran Rasmi Ke-71, Tuan Yang Terutama Yang di-Pertua Negeri Sabah.

Para peserta turut berpeluang menyertai Cabutan Tiket Bertuah, yang menampilkan pelbagai hadiah menarik untuk dimenangi.

Turut hadir dalam majlis ini adalah YB Tan Lee Fatt, Ahli Dewan Undangan Negeri (ADUN) Likas merangkap Pembantu Menteri Kewangan Sabah II.



MALAM SANJUNGAN KASIH WARNAI ULANG TAHUN KELAHIRAN KE-71 TYT YANG DI-PERTUA NEGERI SABAH

Ulang Tahun Kelahiran Ke-71 Tuan Yang Terutama Yang di-Pertua Negeri Sabah pada 05 November 2024 diraikan dengan penuh warna-warni dalam Majlis Sanjungan Kasih anjuran Kerajaan Negeri Sabah melalui Dewan Bandaraya Kota Kinabalu (DBKK).

Keberangkatan tiba Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah bersama isteri, Yang Amat Berbahagia Toh Puan Datuk Seri Panglima (Dr.) Hajah Norlidah binti Tan Sri Datuk R.M Jasni telah disambut oleh Yang Berhormat Datuk Seri Panglima Dr. Joachim Gunsalam, *JP*, Timbalan Ketua Menteri II merangkap Menteri Kerajaan Tempatan dan Perumahan selaku Pengerusi Jawatankuasa Induk Sambutan Ulang Tahun Kelahiran Rasmi Ke-71 Tuan Yang Terutama Yang di-Pertua Negeri Sabah yang turut hadir mewakili Yang Amat Berhormat Ketua Menteri Sabah.

Bertemakan Etnik Sabah, tirai majlis penuh gemilang ini telah dibuka dengan tarian sambut tamu oleh kumpulan artis budaya di bawah naungan Jabatan Kesenian dan Kebudayaan Negara (JKKN) Negeri Sabah dan kumpulan tari Ala Panggung, dan diteruskan dengan tayangan montaj khas yang mengimbas momen indah himpunan acara-acara bersempena Sambutan Ulang Tahun Kelahiran Rasmi Ke-71 TYT Yang di-Pertua Negeri Sabah.

Kemeriahan majlis turut dimaknai dengan upacara memotong kek dan turut diserikan lagi dengan persembahan nyanyian oleh bakat-bakat DBKK, antaranya Rashidah Sharin dan Brandon Bijot, serta pengisian persembahan oleh APC Dancers dan Pandawana.



Hadir sama memeriahkan majlis ialah YB Datuk Seri Panglima Haji Kadzim Haji M. Yahya, *JP*, Speaker Dewan Undangan Negeri Sabah bersama isteri, YBhg. Datin Seri Panglima Hajah Noraini binti Haji Salleh bersama dif-dif kehormat yang lain.

YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu selaku Pengerusi Jawatankuasa Pelaksana Malam Sanjungan Kasih dan isteri, YBhg. Datin Sri Adreen Adderiza binti Mohd. Soffi turut tidak ketinggalan mengiringi penyampaian hadiah kepada *Best Man and Woman of The Night*, iaitu penghargaan kepada tetamu undangan yang mengenakan pakaian bertemakan Etnik Sabah yang penuh indah dengan gaya kreatif!

Dendangan Malam Sanjungan Kasih bertambah istimewa dengan alunan indah kumpulan kugiran Irama Simfoni Kinabalu yang telah mengiringi persembahan khas Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah dan persembahan nyanyian pelbagai genre oleh tetamu-tetamu undangan khas. Kemeriahan suasana makin terasa apabila artis undangan Dato Khatijah Ibrahim dan Azharina membuat penampilan khas dengan persembahan lagu-lagu yang mencuit memori para undangan.

Pentas Malam Sanjungan Kasih ditutup dengan persembahan finale tarian igal dengan lambaian penghargaan dan junjungan kasih kepada TYT Yang di-Pertua Negeri Sabah dan Yang Amat Berbahagia Toh Puan serta semua tetamu undangan yang hadir memeriahkan majlis.

Dirgahayu Tuan Yang Terutama! Kami mendoakan kesejahteraan dan kesihatan buat Tuan Yang Terutama dan Yang Amat Berbahagia Toh Puan serta seisi keluarga.



SAMBUTAN

HARI PAHLAWAN, ZAHIRKAN DOA DAN INGATAN RAKYAT MALAYSIA KEPADA WIRA NEGARA

Tanggal 31 Julai 2024, hari yang mengukir penuh makna, mengenang jasa dan pengorbanan perwira tanah air yang terkorban tatkala memperjuangkan kedaulatan ibu pertiwi.

Sambutan Hari Pahlawan Tahun 2024 Peringkat Negeri Sabah telah berlangsung dengan jayanya pada tarikh keramat ini, di Dataran Kawad, Ibu Pejabat Polis Kontinjen Sabah.

Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah telah berangkat tiba pada 8.00 pagi dan disambut oleh Yang Amat Berhormat Datuk Seri Panglima Haji Hajiji bin Haji Noor, Ketua Menteri Sabah yang kemudiannya menerima tabik hormat daripada pasukan Kawalan Kehormatan Utama Polis Diraja Malaysia (PDRM) Kontinjen Sabah sambil diiringi Mayor Bandaraya Kota Kinabalu dan Pesuruhjaya Polis Sabah, selaku Pengerusi Bersama Jawatankuasa Penganjur Sambutan.

Tirai majlis dibuka dengan acara menaikkan Jalur Gemilang dan bendera Negeri Sabah dengan nyanyian lagu Negaraku dan Sabah Tanah Airku, sebelum

diteruskan dengan Tiupan Paluan Akhir "The Last Post" oleh Polis Diraja Malaysia (PDRM) dan bertafakur selama 30 saat bagi mengenang mereka yang terkorban demi mempertahankan nusa dan bangsa.

Acara sambutan tahun ini juga telah berjaya menawan hati tetamu undangan dengan persembahan menarik kumpulan pancaragam gabungan PDRM, Tentera Laut Diraja Malaysia (TLDM), Tentera Darat Diraja Malaysia dan Jabatan Sukarelawan Malaysia Sabah (RELA) di samping persembahan pantomim khas penuh sentimen menyayat hati yang mengimbau tragedi berdarah pencerobohan Tanduo, Lahad Datu pada tahun 2013.

Tiupan Rouse telah menutup tirai sambutan ini, iaitu istiadat menaikkan semula Jalur Gemilang dan bendera Negeri Sabah.

Setinggi-tinggi tahniah diucapkan kepada Jawatankuasa Penganjur Sambutan Hari Pahlawan Tahun 2024 Peringkat Negeri Sabah dan 25 kontinjen perbarisan yang terdiri daripada agensi penguatkuasaan, badan Kerajaan, Institut Pengajian Tinggi (IPT) dan sekolah sekitar Bandaraya Kota Kinabalu.

Dewan Bandaraya Kota Kinabalu mengucapkan Selamat Menyambut Hari Pahlawan Tahun 2024. Perjuangan tumpah darah pahlawan tanah air akan sentiasa dihargai, dihormati dan disemat dalam doa tertinggi. Sikap pantang menyerah mereka telah membawa kita ke hari ini, bangkit demi Malaysia tanah air tercinta.

Terima kasih perwira Negara!





ACARA PENUH GEMILANG, SAMBUTAN HARI MALAYSIA 2024

Hujan lebat dan angin kencang di sekitar Bandaraya Kota Kinabalu sedikit pun tidak mematahkan semangat ribuan hadirin yang datang bagi menyaksikan sendiri detik bersejarah Sambutan Hari Malaysia 2024, yang berlangsung di Padang Merdeka Kota Kinabalu pada 16 September 2024.

Majlis penuh makna ini diserikan dengan kehadiran Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah, bersama isteri, YABhg. Toh Puan Datuk Seri Panglima (Dr.) Hajah Norlidah binti Tan Sri Datuk R.M Jasni; dan YAB Datuk Seri Panglima Anwar bin Ibrahim, Perdana Menteri Malaysia bersama isteri, YABhg. Datin Seri Panglima Dr. Wan Azizah binti Wan Ismail.

Hadir sama, YAB Datuk Seri Panglima Haji Hajiji bin Haji Noor, Ketua Menteri Sabah dan isteri, YABhg. Datin Seri Panglima Datuk Hajah Julia Salag; YAB Datuk Patinggi Tan Sri (Dr.) Abang Haji Abdul Rahman Zohari Tun Abang Haji Openg, Premier Sarawak, dan YAB Dato' Seri Dr. Ahmad Zahid Bin Hamidi, Timbalan Perdana Menteri.

YAB Ketua Menteri Sabah dalam ucapannya menegaskan kepentingan peranan yang diamanahkan kepada rakyat dalam usaha untuk mentransformasikan negara tercinta.

Acara diteruskan dengan ucapan penuh inspirasi oleh YAB Perdana Menteri, yang mengingatkan rakyat Malaysia bahawa perpaduan adalah kunci kepada kejayaan negara dan menyeru agar semangat Malaysia yang berbilang kaum dan agama terus diperkuat dalam menghadapi cabaran mendatang.

Simbolik perasmian sambutan Hari Malaysia 2024 menyaksikan YAB Perdana Menteri menyempurnakan Upacara Menandatangani Buku Khas Sambutan Hari Malaysia Tahun 2024, sebelum diteruskan dengan Upacara Memotong Kek Sambutan Hari Malaysia 2024.

Tidak terhenti di situ, acara kemudian diteruskan dengan persembahan khas bertajuk “Jiwa Merdeka” yang membawa hadirin menghayati semangat merdeka melalui irama dan lirik yang patriotik. Sorakan dan tepukan bergema mengiringi persembahan hiburan kebudayaan dan mempamerkan keunikan budaya Malaysia.

Para hadirin turut disajikan dengan persembahan hologram, persembahan dron, persembahan kebudayaan dan hiburan daripada artis-artis undangan istimewa seperti Faizal Tahir, Stacy, Akim, Elica Paujin, Amir Jahari, Rosario Bianis, Fauziah Gambus dan Gary Chaw. Malam yang penuh makna ini ditutup dengan pertunjukan bunga api yang menghiasi langit malam Bandaraya Kota Kinabalu, mencipta kenangan manis bagi setiap yang hadir.

Sambutan Hari Malaysia 2024 bukan sahaja melambangkan peristiwa bersejarah negara, tetapi juga semangat kesetiaan dan kebanggaan yang tidak pernah luntur dalam diri setiap rakyat Malaysia.

Tahniah diucapkan kepada seluruh rakyat Malaysia, khususnya rakyat Sabah, yang telah menyemarakkan sambutan Hari Malaysia tahun ini dengan penuh semangat dan keindahan! Bersama kita terus melangkah maju, menjunjung tinggi kemerdekaan dan kebebasan tanah air tercinta.



HIJRAH DAN AL-FALAH DI ERA MADANI, **SAMBUTAN MA'AL HIJRAH 1446H/2024M DIRAIKAN DI BANDARAYA KOTA KINABALU**

Dewan Bandaraya Kota Kinabalu (DBKK) menjadi tumpuan pada 11 September 2024 dengan berlangsungnya Majlis Sambutan Ma'al Hijrah 1446H/2024M anjuran Badan Dakwah Bandaraya Kota Kinabalu. Dengan tema "Al-Falah Pemacu Malaysia Madani", majlis ini bertujuan untuk menghayati semangat hijrah dalam konteks masyarakat moden, selari dengan usaha negara mencapai aspirasi Malaysia MADANI.

Majlis diserikan dengan kehadiran YBhg. Dato' Sri Dr. Hj. Sabin bin Samitah, JP, Mayor Bandaraya Kota Kinabalu ini telah dimulakan dengan alunan merdu ayat-ayat suci Al-Quran yang memenuhi ruang Dewan Mesyuarat dengan bacaan oleh Ustaz Nashraf Ideen dari Masjid Negeri Sabah.

Majlis diteruskan dengan ceramah bertajuk "Hijrah dan Al-Falah di Era Madani" oleh Tuan Haji Mohd. Syahir bin Haji Ismail, yang mengupas makna hijrah dari sudut rohani dan sosial. Ceramah ini mengetengahkan kepentingan transformasi diri dan masyarakat dalam mencapai kemajuan serta keharmonian dalam pelbagai aspek kehidupan.

Dato' Sri Mayor dalam ucapannya berkata, tema Ma'al Hijrah kali ini adalah bertepatan dengan semangat dan citra falsafah yang diambil daripada peristiwa hijrah. Dengan penghijrahan, ia terbukti mampu membuka lembaran kejayaan dalam memacu matlamat Malaysia MADANI. Beliau turut memetik seruan Tuan Yang Terutama Yang di-Pertua Negeri Sabah untuk mengekalkan ukhuwah, agar kemajuan di bawah



gagasan Malaysia MADANI dan Sabah Maju Jaya dapat dinikmati bersama.

Majlis selanjutnya dimanfaatkan dengan penyampaian sumbangan kepada surau kompleks beli-belah sekitar Kota Kinabalu antaranya Suria Sabah, Wisma Merdeka, Centre Point Sabah, IMAGO Shopping Mall dan City Mall.

Penghargaan istimewa turut dirakamkan kepada Jabatan Hal Ehwal Agama Islam Negeri Sabah (JHEAINS), DBKK Holdings Sdn. Bhd. dan semua ahli jawatankuasa program, atas sinergi erat dalam menjayakan majlis ini.

Turut hadir ialah Tuan Haji Ahmad bin Haji Yusop, Timbalan Pengarah Pengurusan JHEAINS, mewakili Pengarah JHEAINS; Tuan Karim bin Rahim, Timbalan Ketua Pengarah (Pembangunan Luar Bandar dan Penguatkuasaan) merangkap Pengerusi Pelaksana Sambutan Ma'al Hijrah Peringkat Bandaraya Kota Kinabalu 1446H/2024M; Tuan Jimon Jahim, Pengarah Eksekutif DBKK Holdings Sdn. Bhd.; Ustaz Nashraf Ideen bin Nahar, Imam Masjid Negeri Sabah dan Ustazah Hirianti binti Haji Tabin, Pegawai Tadbir Agama Bandaraya Kota Kinabalu.

"Al-Falah Pemacu Malaysia Madani"

DBKK, **RAIH KEMENANGAN TEMPAT KETIGA PERTANDINGAN SEPANDUK SAMBUTAN MAULIDUR RASUL SAW PERINGKAT NEGERI SABAH 1446H/2024M**

Tahniah diucapkan kepada kontinjen Dewan Bandaraya Kota Kinabalu (DBKK) yang telah meraih kemenangan tempat ketiga pertandingan sepanduk Sambutan Maulidur Rasul SAW Peringkat Negeri Sabah 1446H/2024M.

Bertemakan "Al-Falah Pemacu Malaysia MADANI", Majlis Perarakan dan Perhimpunan Sambutan Maulidur Rasul SAW Peringkat Negeri Sabah 1446H/2024M tahun ini berlangsung dengan penuh gemilang di Sabah International Convention Centre (SICC) pada 16 September 2024, dengan kehadiran Tuan Yang Terutama Tun Datuk Seri Panglima (Dr.) Haji Juhar bin Datuk Haji Mahiruddin, Yang di-Pertua Negeri Sabah dan Yang Amat Berbahagia Toh Puan Datuk Seri Panglima (Dr.) Hajah Norlidah binti Tan Sri Datuk R.M. Jasni, yang turut sama berarak bermula dari Dewan Masyarakat Kota Kinabalu dan berakhir di SICC.

Selain pemilihan Kontinjen Terbaik dan penyampaian Anugerah Maulidur Rasul, pertandingan sepanduk adalah



antara intisari menarik yang dinanti-nantikan oleh peserta perarakan setiap tahun yang dipertandingkan mengikut kategori Kementerian/Jabatan, Pertubuhan, Komuniti dan Sekolah Menengah dan Sekolah Rendah.

Tahun ini, DBKK telah meraih kemenangan tempat ketiga dengan penilaian elemen Khat Arab, Bentuk dan Khat Rumi terbaik, sekali gus membawa pulang hadiah wang tunai bernilai RM4,000.

Tahniah diucapkan kepada kontinjen DBKK dan semua ahli jawatankuasa yang telah berganding bahu menjayakan Majlis Perarakan dan Perhimpunan Sambutan Maulidur Rasul SAW Peringkat Negeri Sabah pada tahun ini.

KUNJUNGAN HORMAT KEPADA MAYOR



10
JUL
2024

Kunjungan Hormat Jawatankuasa Pejabat Pertanian Dan Hal Ehwal Luar Bandar Kongres Rakyat Provinsi Hubei, DBKK Tekuni Potensi Industri Pertanian



12
JUL
2024

Kunjungan Hormat Sri Pelancongan Sabah Sdn. Bhd.



15
JUL
2024

Kunjungan Hormat Lembaga Hasil Dalam Negeri Malaysia



15
JUL
2024

Kunjungan Hormat Lembaga Pelesenan Kenderaan Perdagangan Sabah



19
JUL
2024

Kunjungan Hormat Lions Club International – Lions Ambulance Service Society



19
JUL
2024

Kunjungan Hormat Parti Gagasan Rakyat Sabah Bahagian Likas



22
JUL
2024

Kunjungan Hormat Persatuan Bermotosikal Berkuasa Tinggi Negeri Sabah



23
JUL
2024

Kunjungan Hormat Pejabat Mufti Negeri Sabah & Jabatan Hal Ehwal Agama Islam



23
JUL
2024

Kunjungan Hormat YM Media Network (Wakil Rangkaian Media Prima TV3 Sabah & Sarawak)



29
JUL
2024

Kunjungan Hormat UMS Investment Holdings Sdn. Bhd.



30
JUL
2024

Kunjungan Hormat Inner Wheel Club of Kota Kinabalu



1
OGS
2024

Kunjungan Hormat Sabah Young Business & Industry Leaders Network



2
OGS
2024

Kunjungan Hormat Sabah Law Society



2
OGS
2024

Kunjungan Hormat Perbadanan Hal Ehwal Bekas Angkatan Tentera (PERHEBAT)



5
OGS
2024

Kunjungan Hormat Lembaga Hasil Dalam Negeri Malaysia Sarawak



6
OGS
2024

Kunjungan Hormat Sabah China Chamber of Commerce



7
OGS
2024

Kunjungan Hormat Persatuan Orang Kerdil Sabah
(PROKESA)



28
OGS
2024

Kunjungan Hormat Lembaga Hasil Dalam Negeri
Malaysia (Operasi Percukaian)



14
OGS
2024

Kunjungan Hormat The Kinabalu Golf Club



20
OGS
2024

Kunjungan Hormat Lembaga Pembangunan Industri
Pembinaan Malaysia (CIDB)



22
OGS
2024

Kunjungan Hormat Lembaga Hasil Dalam Negeri
Malaysia (Jabatan Pengurusan Insan)



26
OGS
2024

Kunjungan Hormat Majlis Tindakan Pengguna Negara
(MTPN)



5
SEP
2024

Kunjungan Hormat Konsulat Korea: Kerjasama Kota
Kinabalu Dan Korea



9
SEP
2024

Kunjungan Hormat Badan Bahasa dan Sastra
Sabah (Bahasa)




9
SEP
2024

Kunjungan Hormat MACEOS Malaysia



11
SEP
2024

Kunjungan Hormat Jabatan Kastam Diraja Malaysia



11
SEP
2024

Kunjungan Hormat The Institution Of Engineers Malaysia (IEM)



17
SEP
2024

Kunjungan Hormat The Welfare Organization of The Heyuan Malaysia



20
SEP
2024

Kunjungan Hormat Sirim Berhad



8
OKT
2024

Kunjungan Hormat Yayasan Petronas



8
OKT
2024

Kunjungan Hormat Digital Nasional Berhad, Sarawak



17
OKT
2024

Kunjungan Hormat Majlis Bandaraya Miri



17
OKT
2024

Kunjungan Hormat Persatuan Usahawan Wanita
Cemerlang Sabah (SAWENA)



17
OKT
2024

Kunjungan Hormat Sabah International Coffee
Festival Expo



5
NOV
2024

Kunjungan Hormat CPS Management Corporation



5
NOV
2024

Kunjungan Hormat Universiti Teknologi Mara (UiTM)



15
NOV
2024

Kunjungan Hormat Lembaga Hasil Dalam Negeri
Malaysia (LHDNM) Wilayah Persekutuan Kuala Lumpur
Ke Dewan Bandaraya Kota Kinabalu



18
NOV
2024

Lawatan Kerja Rasmi SKMM Ke DBKK Perkukuh
Kerjasama Digitalisasi Bandaraya



21
NOV
2024

Kunjungan Hormat Zhengzhou City Government
Sempena China Business Summit 2024



23
NOV
2024

Kunjungan Hormat Delegasi Bandar Jilin & DBKK
Perkukuh Potensi Hubungan "Sistercity"



10
DIS
2024

Kunjungan Hormat Pasukan Task Force Borneo Flora Festival – Perbadanan Labuan



11
DIS
2024

Kunjungan Hormat Gabungan Persatuan Cina Sabah



11
DIS
2024

Kunjungan Hormat Sabah Convention Bureau



18
DIS
2024

Kunjungan Hormat Reef Check



11
DIS
2024

Kunjungan Hormat Gagasan Rakyat Dun Karambunai



27
DIS
2024

Kunjungan Hormat Cyberjaya College Kota Kinabalu

KUNJUNGAN HORMAT MAYOR BANDARAYA KOTA KINABALU

17
SEP
2024



Kunjungan Hormat Mayor Bandaraya Kota Kinabalu ke TYT Yang di-Pertua Negeri Sabah

YBhg. Dato' Sri Dr. Hj. Sabin bin Samitah, *JP*, Mayor Bandaraya Kota Kinabalu telah mengadakan kunjungan hormat ke atas Tuan Yang Terutama Yang di-Pertua Negeri Sabah, Tun Datuk Seri Panglima (Dr) Haji Juhar bin Datuk Haji Mahiruddin di Istana Negeri. Turut hadir bersama Puan Faradillah binti Hj. Abdul Rani, Timbalan Ketua Pengarah (Khidmat Pengurusan) DBKK.

Tinjauan Mayor Ke Anjung Kinabalu, Keteraturan Dan Kebersihan Diberi Keutamaan

Mayor Bandaraya Kota Kinabalu, Dato' Sri Dr. Haji Sabin bin Samitah, *JP*, turun padang seawal 7.00 pagi bagi meninjau kebersihan dan keteraturan Anjung Kinabalu. Tinjauan ini turut memberi ruang untuk menyantuni para peniaga serta menilai keperluan penambahbaikan infrastruktur pasar demi kesejahteraan bersama.



Ke Arah Destinasi Pilihan Pelancongan, DBKK Tinjau Sistem Pengurusan Sampah Di Pulau Sekitar Kota Kinabalu

Mayor Bandaraya Kota Kinabalu, Dato' Sri Dr. Haji Sabin bin Samitah, *JP*, bersama Pengurusan Tinggi DBKK meninjau sistem pengurusan sampah di Pulau Sapi, Pulau Mamutik, dan Pulau Manukan. Lawatan ini bertujuan memastikan kebersihan dan kelestarian pulau pelancongan kekal sebagai destinasi pilihan.

Sesi "Walkabout", DBKK Tinjau Suasana Ria Pasar Malam Bandaraya Kota Kinabalu

Mayor Bandaraya Kota Kinabalu, Dato' Sri Dr. Haji Sabin bin Samitah, *JP*, bersama Pengurusan Tinggi DBKK turun padang dalam sesi 'walkabout' meninjau kemeriahan pasar malam di sekitar bandar raya. Dari Api-API Night Food Market @ Gaya Street hingga ke Segama Waterfront, tinjauan ini memastikan kebersihan, keselamatan, dan keselesaan pengunjung sentiasa diutamakan.



Mayor Bandaraya Kota Kinabalu, Melawat Kawasan Sinsuran
Mayor Bandaraya Kota Kinabalu, Dato' Sri Dr. Haji Sabin bin Samitah, *JP*, turun padang ke Sinsuran bersama pegawai DBKK bagi meninjau kebersihan, keselamatan, dan kesejahteraan kawasan. Kerjasama peniaga dan komuniti amat penting dalam memastikan persekitaran bandar raya kekal bersih dan teratur.

Berbasikal Santai Bersama Mayor, Pagi Ceria Di Pantai Tanjung Aru

YBhg. Dato' Sri Dr. Haji Sabin bin Samitah, *JP*, bersama kakitangan DBKK beriadah santai dalam sesi berbasikal sejauh 9.3KM di Pantai Tanjung Aru. Selain beriadah, sesi ini turut dimanfaatkan dengan tinjauan kebersihan dan gotong-royong di kawasan pantai.



KUNJUNGAN HORMAT

JAWATANKUASA PEJABAT PERTANIAN DAN HAL EHWAL LUAR BANDAR KONGRES RAKYAT PROVINSI HUBEI, DBKK TEKUNI POTENSI INDUSTRI PERTANIAN

Dewan Bandaraya Kota Kinabalu (DBKK) telah menerima kunjungan hormat daripada delegasi Pengarah Jawatankuasa Pejabat Pertanian dan Hal Ehwal Luar Bandar Kongres Rakyat Provinsi Hubei, Wuhan, China, pada 10 Julai 2024.

Ketibaan delegasi yang diketuai oleh Naib Pengerusi Jawatankuasa, Liu Xiaoming, telah disambut oleh Sr. Lifred Wong, Ketua Pengarah, DBKK mewakili YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu.



Menerusi pertemuan ini, kedua-dua pihak telah menyatakan komitmen bersama dalam meneroka dan merungkai potensi sinergi, khususnya dalam bidang pertanian dan prospek pertukaran produk pasaran. Sesi diskusi turut mengupas beberapa aspek terkait sektor pertanian seperti amalan pertanian mampan, pembangunan teknologi moden dan potensi pasaran bagi produk pertanian di kedua-dua wilayah.

Turut serta dalam delegasi ini adalah Feng Zhongkai, Pengerusi Jawatankuasa; Tu Shenghua, Naib Pengerusi Jawatankuasa; Wu Hong, Pengarah Pejabat Jawatankuasa; dan Gong Dejun, Timbalan Pengurus Besar Guoying Seeds Industrial Co, Ltd.

Seluruh warga DBKK amat berbesar hati menerima kunjungan daripada delegasi Pengarah Jawatankuasa Pejabat Pertanian dan Hal Ehwil Luar Bandar Kongres Rakyat Provinsi Hubei, Wuhan, China. Semoga pertemuan ini akan menjana kejayaan dan pembangunan kepada kedua-dua pihak.



KUNJUNGAN HORMAT

KONSULAT KOREA: KERJASAMA KOTA KINABALU DAN KOREA DIPERKUKUH

Dewan Bandaraya Kota Kinabalu (DBKK) menerima kunjungan hormat daripada delegasi Konsulat Republik Korea yang diketuai oleh Yoon Ockchae, Ketua Misi dan Menteri Kaunselor, bersama Cho Sanghoon, Naib Konsul, dan Stephanie Tay, Setiausaha, pada 05 September 2024.

Kunjungan tersebut telah disambut oleh YBhg. Dato' Sri Dr. Hj. Sabin Samitah, *JP*, Mayor Bandaraya Kota Kinabalu, bersama Sr. Lifred Wong, Ketua Pengarah, DBKK serta pegawai kanan DBKK.

Tujuan utama kunjungan ini adalah untuk menghulurkan salam rasmi kepada Dato' Sri Mayor serta mempromosikan hubungan dua hala antara DBKK dan Konsulat Republik Korea. Di samping itu, perbincangan juga merangkumi usaha untuk meneroka peluang dalam memperkukuhkan lagi hubungan kerjasama "Sister City" antara Kota Kinabalu dengan bandar-bandar di Korea, serta "Smart City" yang merangkumi pelbagai aspek dari segi bidang pembangunan bandar, pelancongan, dan kebudayaan.



Dato' Sri Mayor turut menekankan komitmen DBKK dalam memperkukuhkan hubungan diplomatik ini, sebagai sebahagian daripada usaha untuk mempertingkatkan imej Bandaraya Kota Kinabalu di peringkat antarabangsa.

DBKK yakin bahawa kerjasama ini akan membuka pelbagai peluang baharu dalam pembangunan bandar raya dan akan terus berusaha menjadikan Kota Kinabalu sebuah bandar raya yang cemerlang di peringkat tempatan dan diiktiraf di peringkat global.

KUNJUNGAN HORMAT DELEGASI BANDAR JILIN, PERKUKUH POTENSI HUBUNGAN 'SISTER CITY'

Dewan Bandaraya Kota Kinabalu (DBKK) telah menerima kunjungan hormat daripada delegasi Bandar Jilin, China, dalam usaha memperkukuh hubungan kerjasama strategik antara kedua-dua bandar raya, pada 23 November 2024.

Lawatan ini menandakan satu langkah penting dalam usaha menjalinkan persahabatan "sister city" bersama Bandaraya Kota Kinabalu.

Delegasi Bandar Jilin yang diketuai oleh Encik Yan Haichun, Timbalan Pengarah Jawatankuasa Tetap Kongres Rakyat Bandaraya Jilin, turut disertai oleh wakil-wakil dari pelbagai sektor termasuk perdagangan, teknologi, dan hubungan antarabangsa.

Manakala pihak DBKK, diketuai oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu, bersama barisan pengurusan tertinggi DBKK.

Dalam sesi pertemuan ini, kedua-dua pihak membincangkan pelbagai aspek kerjasama yang berpotensi, termasuk pembangunan bandar pintar (*smart city development*), pertukaran budaya, pelancongan, pendidikan, sektor pertanian dan pelbagai aspek dan potensi besar pembangunan bandar raya dalam jangka masa hadapan.



Perbincangan ini turut mengetengahkan visi bersama untuk memajukan pertumbuhan ekonomi yang mampan melalui inovasi dan kerjasama yang erat.

Delegasi Bandar Jilin juga mengambil peluang untuk berkongsi kejayaan mereka dalam pembangunan ekonomi dan perdagangan, serta menjemput DBKK untuk mengadakan lawatan ke Bandar Jilin bagi memperkukuh lagi hubungan ini.

Lawatan ini menandakan komitmen bersama kedua-dua bandar untuk terus memperkasa hubungan dua hala yang akan membawa manfaat kepada komuniti masing-masing.

Semoga usaha ini menjadi pemangkin kepada kerjasama yang lebih erat dan membuka lembaran baharu dalam hubungan antarabangsa Bandaraya Kota Kinabalu.

KUNJUNGAN HORMAT DELEGASI KERAJAAN KOTA ZHENGZHOU MALAYSIA (SABAH) - CHINA BUSINESS SUMMIT 2024

Dewan Bandaraya Kota Kinabalu (DBKK) berbesar hati menerima kunjungan hormat daripada delegasi Kerajaan Kota Zhengzhou sempena Malaysia (Sabah) - China Business Summit 2024, pada 21 November 2024. Lawatan ini bertujuan untuk memperkukuh hubungan kerjasama antara kedua-dua pihak, khususnya dalam aspek pembangunan ekonomi, teknologi, dan kemampan bandar.

Ketibaan delegasi Zhengzhou yang diketuai oleh Mr. Wang Xuebing, Timbalan Pengarah, Pejabat Hal Ehwal Luar Negeri Kerajaan Bandaraya Zhengzhou, telah disambut mesra oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu, bersama barisan pengurusan tertinggi DBKK.

Dalam sesi pertemuan tersebut, kedua-dua pihak berkongsi pengetahuan, pengalaman, serta visi pembangunan bandar masa hadapan. Delegasi Zhengzhou berkongsi pendekatan mereka dalam pembangunan ekonomi, perdagangan, serta inisiatif dan perancangan jangka masa panjang yang menjadi asas kepada kemajuan bandar mereka.



Pihak Zhengzhou turut mengambil peluang untuk menjemput DBKK agar dapat melawat Kota Zhengzhou pada masa akan datang untuk memperkukuh lagi hubungan kerjasama ini.

Di pihak DBKK, pelbagai inisiatif pembangunan, inovasi serta projek jangka masa panjang turut diketengahkan sebagai langkah menuju bandaraya yang lebih progresif dan lestari.

Pertemuan ini diharap dapat membuka ruang kepada potensi kerjasama baharu, khususnya dalam bidang teknologi, perdagangan, dan pelaburan, yang akan memberi manfaat kepada kedua-dua bandar serta komuniti masing-masing.

Semoga hubungan erat ini terus terjalin kukuh dan menjadi asas kepada kolaborasi strategik antara Kota Kinabalu dan Zhengzhou.



LAWATAN KERJA RASMI

DBKK KE MBPJ, PERKUKUH SINERGI ANTARA PBT

Dewan Bandaraya Kota Kinabalu (DBKK) dengan penuh mesra menerima kunjungan hormat daripada delegasi Majlis Bandaraya Petaling Jaya (MBPJ), diketuai oleh YBhg. Tuan Haji Mohamad Zahri bin Haji Samingon, Datuk Bandar Petaling Jaya, pada 16 Oktober 2024. Kunjungan ini bertujuan untuk memperkukuh hubungan strategik antara kedua-dua bandar raya melalui perkongsian pengalaman dan amalan terbaik dalam pelbagai aspek pengurusan serta pembangunan bandar.

Majlis dipengerusikan oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu. Turut hadir, Puan Faradillah binti Haji Abdul Rani, Timbalan Ketua Pengarah (Khidmat Pengurusan), DBKK; Encik Victor G. Kuasi, Timbalan Ketua Pengarah (Pengurusan Kewangan), DBKK; dan Encik Karim Rahim, Timbalan Ketua Pengarah (Pembangunan Luar Bandar dan Penguatkuasaan), DBKK.

Lebih kurang 50 ahli delegasi MBPJ hadir yang terdiri daripada Pengurusan Tertinggi dan Ahli-ahli Majlis MBPJ serta pegawai-pegawai kanan dari pelbagai jabatan.

Fokus pertemuan ini adalah untuk membincangkan proses kelulusan pelan pemajuan, memperhalusi tatakelola, dan meningkatkan keberkesanan sistem penyampaian perkhidmatan kepada komuniti masing-masing.

Perbincangan merangkumi taklimat yang disampaikan oleh Puan Tantinny Fung Chew Li, Pengarah Jabatan Perancangan Bandaraya, DBKK, yang membuka ruang kepada pertukaran idea produktif antara kedua-dua pihak.

Interaksi mesra antara delegasi semakin mengukuhkan hubungan persahabatan, dan acara ini diserikan lagi dengan pertukaran cenderahati sebagai tanda penghargaan serta komitmen terhadap kerjasama masa depan.

Kunjungan ini menandakan langkah penting dalam memperkukuh jaringan kerjasama antara DBKK dan MBPJ, dengan harapan agar usaha sama ini dapat meningkatkan keberkesanan pentadbiran serta memberi manfaat kepada komuniti setempat.



LAWATAN

MENTERI KPKT KE LOKASI PROJEK BAWAH SELIAAN DBKK, SEMPENA PROGRAM SENTUHAN KASIH KPKT NEGERI SABAH

Lawatan kerja YB Nga Kor Ming, Menteri Perumahan dan Kerajaan Tempatan sempena Program Sentuhan Kasih Kementerian Perumahan dan Kerajaan Tempatan (KPKT) Negeri Sabah telah diadakan pada 25 hingga 26 Julai 2024.

Sepanjang lawatan ini, YB Menteri berkesempatan mengadakan lawatan ke Taman Botani Tun Fuad Stephens dan Projek Menaik Taraf Dewan Serbaguna Luyang, yang merupakan projek di bawah seliaan Dewan Bandaraya Kota Kinabalu (DBKK).

Beliau telah diberikan taklimat ringkas berkaitan status pelaksanaan setiap projek, sebelum mengadakan sesi 'walkabout' bagi meninjau sendiri status setiap projek.

Selain lawatan ke Taman Botani Tun Fuad Stephens dan Dewan Serbaguna Luyang, beliau turut dijadualkan untuk melawat ke Residensi Menggatal @ PR1MA, Projek Baik Pulih Rumah di Pulau Gaya, serta mengadakan kunjungan hormat kepada YAB Datuk Seri Panglima Haji Hajiji bin Haji Noor, Ketua Menteri Sabah di Kediaman Rasmi beliau, di mana sesi Penyerahan Projek Naik Taraf Tapak Pelupusan Sisa dan Pepejal Kayu Madang diadakan.



Turut hadir dalam sesi lawatan ini adalah Sr. Lifred Wong, Ketua Pengarah, DBKK mewakili Mayor Bandaraya Kota Kinabalu serta Ketua-ketua Jabatan DBKK.

KUNJUNGAN RASMI SETIAUSAHA POLITIK KEPADA MENTERI EKONOMI DAN DELEGASI KE DBKK, PERKUKUH JALINAN KERJASAMA STRATEGIK

Dewan Bandaraya Kota Kinabalu (DBKK) berbesar hati menerima kunjungan hormat daripada Encik Che Zam bin Hamzah, Setiausaha Politik Kepada Menteri Ekonomi, seiring usaha memperkukuh jalinan kerjasama strategik pada 26 November 2024.

Ketibaan Encik Che Zam bersama delegasi Kementerian Ekonomi disambut mesra oleh Sr. Lifred Wong, Ketua Pengarah, DBKK; Encik Karim Rahim, Timbalan Ketua Pengarah (Pembangunan Luar Bandar dan Penguatkuasaan), DBKK bersama Pegawai-pegawai Kanan DBKK.

Sesi pertemuan ini dimulakan dengan Perbincangan Khas Ketua Delegasi Bersama Pegawai DBKK. Sebelum diteruskan dengan pembentangan yang disampaikan oleh Puan Hana'aifah Suhaili, Pengarah Jabatan Pengangkutan dan Trafik, DBKK.

Turut hadir dalam kunjungan ini ialah Puan Vivien Lee, mewakili YB Datuk Seri Panglima Christina Liew, Menteri Pelancongan, Kebudayaan dan Alam Sekitar dan Encik



Sabadin Kasim, mewakili YB Datuk Peto Galim, Pembantu Menteri II, Kementerian Pertanian, Perikanan dan Industri Makanan Sabah.

Kunjungan ini menandakan langkah signifikan dalam memperkukuh hubungan kerjasama dan potensi kolaborasi di antara DBKK dan Kementerian Ekonomi.

KETUA SETIAUSAHA NEGARA ADAKAN LAWATAN KE TAPAK PROJEK NAIK TARAF GERAI MAKAN, INANAM

Ketua Setiausaha Negara, Tan Sri Dato' Sri Shamsul Azri Abu Bakar telah mengadakan lawatan ke Tapak Projek Naik Taraf Gerai Makan Bersebelahan Pasar Tradisi Inanam pada 12 September 2024.

Tan Sri Dato' Sri Shamsul yang tiba sekitar 8.00 pagi itu telah menerima taklimat progres projek oleh Puan Sally Edward Ghani, Pengarah Jabatan Arkitek dan Projek Khas, Dewan Bandaraya Kota Kinabalu (DBKK), sebelum mengadakan lawatan di sekitar tapak Projek Gerai Makan Inanam yang merupakan usaha serta komitmen Kerajaan Persekutuan dalam meningkatkan kemudahan fasiliti pasar dan tahap penyelesaian pengunjung setempat.

Pembinaan enam (6) unit gerai atau ruang memasak serta pembinaan ruang makan yang lebih luas antara lain yang disenarai dalam skop kerja bina semula struktur bangunan gerai baharu, selain pembinaan struktur bumbung yang lebih tinggi bagi menjamin sistem pengudaraan dan pencahayaan yang lebih baik. Ruang lantai untuk menempatkan penjaja pasar baharu juga akan disediakan di samping kelengkapan kipas, lampu, tempat membasuh tangan berpusat dan perangkap minyak berpusat/komunal.

Beliau yang turut diiringi oleh Datuk Wira M. Noor Azman bin Taib, Ketua Setiausaha Kementerian Perumahan dan Kerajaan Tempatan, juga meluangkan masa meninjau fasiliti Pasar Tradisi Inanam sambil menyantuni penjaja-penjaja di 20 lot niaga yang terkenal dengan jualan barangan tradisi, tembakau, madu dan lain-lain.



Turut hadir mengiringi sesi lawatan kerja Ketua Setiausaha Negara ini adalah Dato' Mohd. Fadzli bin Mohd. Kenali, Ketua Pengarah Jabatan Kerajaan Tempatan; Dato' Seri Haji Rosli bin Isa, Setiausaha Persekutuan Sabah; Dato' Sri Dr. Haji Sabin bin Samitah, JP, Mayor Bandaraya Kota Kinabalu, dan Dato' Indera Nik Nasarudin bin Mohd. Zawai, Ketua Pengarah Unit Penyelarasan Pelaksanaan (ICU JPM).

Lawatan berakhir pada 8.45 pagi, sebelum meneruskan jadual berikutnya ke Projek Menaik Taraf Kawasan Persekitaran Pusat Bandaraya Kota Kinabalu - Pakej 3 Peningkatan Fizikal Kawasan Menara Jam Atkinson dan Australian Place.

LAWATAN KERJA MBJ DBKK KE PERBADANAN LABUAN, SIMBOLIK PENGUKUHAN SINERGI ANTARA PIHAK BERKUASA TEMPATAN

Majlis Bersama Jabatan (MBJ) Dewan Bandaraya Kota Kinabalu telah mengadakan lawatan kerja ke Perbadanan Labuan selama tiga (3) hari, bermula 24 hingga 27 September 2024, bertujuan untuk mempelajari pengurusan isu-isu pekerja di peringkat agensi.

Lawatan yang diketuai oleh Encik Ag. Azmee bin Ag. Kati, Pengerusi MBJ DBKK ini telah disambut baik oleh Tuan Awang Aizal bin Awang Anak, Pengerusi MBJ di Perbadanan Labuan bersama sembilan (9) orang anggota lain.

Sepanjang lawatan ini, rombongan MBJ DBKK telah dibawa untuk melawat ke beberapa lokasi tarikan pelancong di sekitar Labuan, antaranya ialah Tanah Perkuburan Perang Labuan, Labuan Geopark G2 Batu Pasir Belait Tanjung Batu, Muzium Marin Labuan, Gedung Ubat dan aktiviti 'jungle trekking' di Bukit Tanjung Kubong.



Lawatan kerja ini dilihat sebagai satu anjakan paradigma kepada carta organisasi dan carta fungsi yang akan dilaksanakan di DBKK, selain dapat mempelajari dengan lebih terperinci mengenai pekeliling yang perlu dipatuhi dan menapis isu yang berkaitan dengan pekerja sebelum dibawa ke peringkat pengurusan bagi proses membuat keputusan.

Secara tidak langsung, lawatan ini menjadi simbolik pengukuhan antara DBKK dan Perbadanan Labuan. Semoga ilmu yang diperoleh dapat dimanfaatkan dengan meningkatkan kualiti perkhidmatan di DBKK.

LAWATAN KERJA

YB TUAN PETO GALIM, PEMBANTU MENTERI (II), KEMENTERIAN PERTANIAN, PERIKANAN DAN INDUSTRI MAKANAN SABAH KE PAUN HAIWAN, DBKK

Pada 06 September 2024, Dewan Bandaraya Kota Kinabalu (DBKK) telah menerima lawatan daripada YB Tuan Peto Galim, Pembantu Menteri (II), Kementerian Pertanian, Perikanan dan Industri Makanan Sabah bersama Dr. Senthilvel KSS Nathan, Penolong Pengarah Kanan, Wilayah Kota Kinabalu, Jabatan Perkhidmatan Veterinar Sabah (DVS Sabah), mewakili Pengarah Perkhidmatan Veterinar Sabah serta anggota daripada Unit Kebajikan Haiwan dan Unit Penguatkuasaan Veterinar, DVS Sabah.

Lawatan kerja ke Paun Haiwan, DBKK ini telah disambut oleh Encik Robert Lipon, Timbalan Ketua Pengarah (Operasi), DBKK; Puan Syron A. Tunggolou, Pengarah Jabatan Kesihatan Persekitaran Bandaraya, DBKK; Dr. Albert J. Lintanga, Pengarah Jabatan Pembangunan Sumber Manusia, DBKK serta pegawai-pegawai daripada Jabatan Kejuruteraan, Jabatan Penguatkuasaan, Jabatan Kewangan dan Belanjawan serta Jabatan Pengaduan dan Perhubungan Awam, DBKK.

Yang Berhormat Tuan Peto Galim dan rombongan telah diberikan taklimat berhubung pengurusan dan kawalan



anjing di kawasan Kota Kinabalu oleh Puan Arinah Atim, Ketua Unit Kawalan Haiwan di Jabatan Kesihatan Persekitaran Bandaraya, DBKK. Selepas sesi taklimat, rombongan telah meninjau kawasan sekitar Paun Haiwan, DBKK.

YB Tuan Peto telah meminta agar DBKK dan DVS Sabah dapat memperkukuh dan memantapkan jaringan kerjasama dalam pengurusan dan kawalan anjing peliharaan dan anjing terbiar.

Beliau juga berharap lebih banyak sesi libat urus dan program kesedaran dapat dilaksanakan secara bersepadu oleh kedua-dua pihak bagi meningkatkan kesedaran masyarakat berhubung undang-undang yang berkuat kuasa seperti Enakmen Kebajikan Haiwan 2015 dan Undang-Undang Kecil Pendaftaran dan Kawalan Anjing 1963.

Turut dibincangkan adalah keperluan untuk menambah baik fasiliti paun haiwan dan cadangan untuk memperluaskan ruang paun haiwan sedia ada.

2 Julai 2024



Lawatan Kerja Majlis Bandaraya Melaka Bersejarah (MBMB) Ke DBKK, Wadah Perkongsian Pengalaman Dan Pencapaian PBT.

16 Oktober 2024



Kunjungan Rasmi dan Lawatan Penandaarasan Datuk Bandar Petaling Jaya bersama delegasi Majlis Bandaraya Petaling Jaya ke DBKK, Pengukuhan Kerjasama Strategik.

18 November 2024



Lawatan Kerja Rasmi Suruhanjaya Komunikasi dan Multimedia Malaysia (SKMM) Ke DBKK, Perkukuh Kerjasama Digitalisasi Bandaraya.

18 Disember 2024



Kunjungan Rasmi Majlis Perbandaran Segamat Ke DBKK, Ke Arah Pemantapan Strategi Pembangunan Pelancongan Bandar Raya.

SESI TOWN HALL DBKK TAHUN 2024, CAPAI INSPIRASI DAN PENDAPAT AWAM SECARA KOLEKTIF

Sekitar 200 orang peserta telah hadir dan menjayakan Sesi Town Hall DBKK Tahun 2024 yang telah berlangsung dengan sambutan yang positif di Pusat Konvensyen Antarabangsa Sabah (SICC), pada 29 November 2024.

Program yang bermula pada 9.00 pagi itu telah disempurnakan oleh Yang Berbahagia Dato' Sri Dr. Haji Sabin bin Samitah, JP, Mayor Bandaraya Kota Kinabalu yang hadir bersama barisan Ahli-ahli Lembaga Penasihat DBKK dan kumpulan Pengurusan Tinggi DBKK.

Peserta terdiri daripada kumpulan pemegang taruh dan wakil-wakil komuniti Bandaraya Kota Kinabalu yang telah hadir untuk bersama-sama DBKK dalam menyumbang saran demi manfaat Kota Kinabalu.



Seusai pembentangan, program diteruskan dengan Sesi Dialog Awam yang memberi ruang kepada peserta untuk mengemukakan saranan dan syor penambahbaikan yang dapat dikongsikan bersama ke arah perancangan, pembangunan dan urus tadbir Bandaraya Kota Kinabalu yang lebih baik.

Menerusi partisipasi awam ini, DBKK telah mengambil maklum pendapat yang berinspirasi tinggi, terutama yang berkaitan pemantapan infrastruktur bandar, fasiliti awam, kaedah pengurusan sisa pepejal, sistem aplikasi pengurusan letak kereta, taman awam dan lain-lain.

Tetamu undangan yang hadir turut berkesempatan untuk melawat reruai Sabah Smart Parking oleh DBKK



Mereka terdiri daripada ahli-ahli yang mewakili kumpulan profesional, kumpulan sektor pelancongan, akademik dan pengajian, pemimpin-pemimpin pembangunan masyarakat, ahli-ahli dewan perniagaan dan persatuan-persatuan penaja, komuniti Program Kebun Bandar, komuniti Program Pelancongan Berasaskan Komuniti (CBT), agensi serta Pertubuhan Bukan Kerajaan (NGO) dan kumpulan pengamal media. Warga Bandaraya Kota Kinabalu turut berpeluang menyaksikan siaran langsung Sesi Town Hall ini menerusi penstriman Facebook DBKK.

Program dimulakan dengan ucap tama dan pembentangan Kertas Town Hall yang bertajuk "Perancangan dan Pembangunan Untuk Lima (5) Tahun Akan Datang" oleh YBhg. Dato' Sri Mayor yang telah menjelaskan hala tuju pentadbiran, pengurusan dan perancangan DBKK khususnya dalam aspek kebersihan, keceriaan, keteraturan trafik dan lalu lintas, infrastruktur, keselamatan dan pemantapan kualiti pentadbiran.

Dalam mendasari konsep pentadbiran yang telus dan berintegriti, Sesi Town Hall ini juga telah membentangkan "Kedudukan Kewangan DBKK" oleh Sr. Lifred Wong, Ketua Pengarah, DBKK yang telah menerangkan Prestasi Bajet DBKK setakat September 2024.

Holdings Sdn. Bhd., reruai produk Program Citra Kasih di bawah bimbingan Jabatan Pelancongan dan Kesejahteraan Masyarakat, DBKK, reruai Jabatan Pengurusan dan Sisa Pepejal, DBKK yang mempamerkan maklumat Aplikasi Perkhidmatan Sisa Kebun dan Sisa Pukul (Aplikasi iBersih), Pusat Lestari, penjualan baja kompos, Kempen "Hari-hari Bawa Beg Bah!" dan Kempen Bersih dan Hijau.

Turut dipamerkan semasa Sesi Town Hall ini adalah sudut informasi "Bandar Pintar Bandaraya Kota Kinabalu (Smart City)" oleh Jabatan Perancangan Bandaraya, DBKK dan informasi "Laporan Pelaksanaan, Pemantauan dan Penilaian Bagi Tindakan Perubahan Iklim Kota Kinabalu 2024-2030" oleh Jabatan Arkitek dan Projek Khas, DBKK, selain buku Pelan Strategik DBKK 2022-2027 dan tayangan multimedia terbitan Jabatan Penyelidikan dan Inovasi, DBKK.

Setinggi-tinggi penghargaan diucapkan kepada semua tetamu dan ahli-ahli jawatankuasa yang menjayakan majlis ini. Semoga setiap hala tuju yang disasarkan, terus menjadi sumber inspirasi kepada pembangunan Bandaraya Kota Kinabalu.



LEBIH 600 PESERTA JAYAKAN

PROGRAM “KEMAMPAKAN KOMUNITI BANDAR - KOMUNITI SEJAHTERA CYCLEAN (CYCLING AND CLEAN) 2024”

Berbekalkan semangat melestarikan Bandaraya Kota Kinabalu, seramai 600 peserta berbasikal dan gotong-royong telah menjayakan Program “Kemampuan Komuniti Bandar - Komuniti Sejahtera CYCLEAN (Cycling and Clean) 2024” pada 22 September 2024 di Padang Merdeka Kota Kinabalu.

Mengangkat slogan “*Wise Use of Natural and Built Environments, Promotes Healthy Family Lifestyle and Building Cohesive Communities*”, program ini merupakan inisiatif ke arah mentransformasikan Bandaraya Kota Kinabalu sebagai sebuah bandar yang sejahtera dan mampan melalui usaha sama dan aktiviti sihat bersama-sama komuniti.

Peserta yang telah mula memenuhi Padang Merdeka Kota Kinabalu seawal 5.30 pagi itu terdiri daripada dua (2) kumpulan, iaitu 320 peserta berbasikal sejauh 11KM menuju ke lokasi Program “KK Cleanup Day 3.0: Tanjung Aru” dan 200 peserta bergotong-royong.

Acara pelepasan telah disempurnakan oleh YBhg. Dato’ Sri Dr. Haji Sabin bin Samitah, *JP*, Mayor Bandaraya Kota Kinabalu.

Selain acara berbasikal dan bergotong-royong, para peserta turut berpeluang mengunjungi pameran Rizab Biosfera Banjaran Crocker (RBBC) oleh Taman-taman Sabah, informasi Sabah Smart Parking oleh DBKK Holdings Sdn. Bhd., pameran Bersih dan Hijau oleh Jabatan Pengurusan Sisa Pepejal, DBKK, Kempen LiLaTiN (Lipas, Lalat, Tikus dan Nyamuk) oleh Jabatan Kesihatan Persekitaran Bandaraya, DBKK, pameran Jabatan Bomba dan Penyelamat Malaysia (JBPM) Negeri Sabah, pameran Pusat Khidmat AADK Kota Kinabalu dan perkhidmatan klinik bergerak Hospital Universiti Malaysia Sabah (UMS).

Menjadi perhatian majoriti pengunjung program ini juga adalah Jualan Rahmah MADANI yang disertai oleh SAFMA dan Hup Huat, demonstrasi dan pameran hasil kraftangan ‘upcycle’ oleh komuniti Darau Wetland Eco Tourism dan Homestay Desa Cinta Kobuni serta kenderaan minuman percuma Life Water Kota Kinabalu



yang menaja air minuman K2 dan minuman isotonik karbonat Tritonic.

Turut berlangsung acara senamrobik, cabutan bertuah, pertandingan gubahan bunga daripada barang terpakai, pertandingan mewarna, aktiviti ‘upcycle’, demonstrasi pasukan keselamatan serta ceramah kesihatan.

Anjuran program ini mencerminkan usaha berterusan DBKK dalam meningkatkan kesedaran terhadap tanggungjawab sosial dan penjagaan alam sekitar.

Tahniah dan terima kasih diucapkan kepada Kementerian Perumahan dan Kerajaan Tempatan, Polis Diraja Malaysia (PDRM), PUSPANITA Cawangan Bandaraya Kota Kinabalu, SSBS Communication Team (Marshal) dan semua peserta atas kerjasama menjayakan program ini.



SUKSES!

DBKK DAN PENJAJA API-API NIGHT FOOD MARKET BERSATU HATI BERSIHKAN TAPAK JAJA JALAN GAYA

Lebih 150 penjaja Api-API Night Food Market @ Gaya Street (AANFM) telah hadir dan menzahirkan sokongan tulus mereka bagi menjayakan Operasi Pembersihan Jalan Gaya anjuran Dewan Bandaraya Kota Kinabalu (DBKK) pada 12 Julai 2024, bermula 6.00 petang hingga 9.00 malam.

Aktiviti gotong-royong yang buat julung kalinya diadakan itu telah menyaksikan sinergi positif antara DBKK dan kumpulan penjaja Api-API Night Food Market @ Gaya Street, yang bersatu hati ingin melihat Jalan Gaya dalam keadaan bersih, kemas dan teratur.

Operasi pembersihan ini telah berjaya mengukir lebih makna dan kenangan, apabila kumpulan penjaja AANFM telah hadir sendiri bersama ahli keluarga mereka dan bersama-sama membersihkan tapak AANFM.

Aktiviti pembersihan telah melibatkan kerja-kerja pencucian permukaan jalan raya, sementara DBKK mengetuai kerja-kerja pembersihan tumbuhan liar atas bangunan, penyelenggaraan pokok, penyelenggaraan pendawaian elektrik, pembaikan papan tanda rosak dan pembaikan jalan raya. Ia bermula dari Blok A iaitu berhampiran pintu gerbang Jalan Gaya dan berakhir di Blok D.



Diketuai oleh Encik Robert B. Lipon, Timbalan Ketua Pengarah (Operasi) DBKK, operasi pembersihan ini turut melibatkan kakitangan DBKK daripada Jabatan Pelesenan selaku jabatan penyelaras, Jabatan Landskap, Jabatan Pengurusan Sisa Pepejal (JPSP), Jabatan Penguatkuasaan, Jabatan Kejuruteraan, Jabatan Pengangkutan dan Trafik (JPT) dan Jabatan Kawalan Bangunan (JKBn).

Turut hadir ialah Ketua-ketua Jabatan DBKK; Encik Rozie Khan A. Halik, Pengarah Jabatan Pelesenan dan Puan Hana'aifah A. Suhaili, Pengarah Jabatan Jabatan Pengangkutan dan Trafik.

Menerusi inisiatif ini, DBKK meletakkan harapan utama agar Jalan Gaya akan terus kekal bersih, kemas, teratur dan menjadi contoh tapak aktiviti pasar malam yang selamat kepada penjaja dan sentiasa gemar dikunjungi oleh pelancong dan warga Bandaraya Kota Kinabalu.

Operasi Pembersihan Jalan Gaya 2.0 diteruskan pada 13 Julai 2024. Sementara itu, lokasi aktiviti pasar malam Api-API Night Food Market pada 13 Julai 2024 telah dipindahkan sementara di Padang Merdeka Kota Kinabalu, bermula 6.00 petang hingga 12.00 tengah malam.

Tahniah diucapkan kepada kumpulan penjaja Api-API Night Food Market @ Gaya Street!



NSRC, DBKK JALIN KERJASAMA
SULUNG MENERUSI

PROGRAM PENCEGAHAN JENAYAH KEWANGAN DAN KEMPEN KESEDARAN MENGENAI PENIPUAN DALAM TALIAN

Pusat Scam Respons Kebangsaan (NSRC) dengan kerjasama Dewan Bandaraya Kota Kinabalu (DBKK) telah menganjurkan Program Pencegahan Jenayah Kewangan dan Kempen Kesedaran Mengenai Penipuan Dalam Talian (*Online Scam*): “Awais Scammer! Kami Pun Pandai Juga” di Hotel Shangri-La Tanjung Aru, pada 20 November 2024.

Program yang diadakan buat julung kalinya itu bertujuan untuk meningkatkan kesedaran masyarakat mengenai taktik ‘scammer’ dan mengenal pasti jenis-jenis penipuan, meningkatkan kerjasama antara pihak penguat kuasa, badan bukan kerajaan (NGO), sektor swasta dan masyarakat dalam membanteras jenayah ini.

Ketibaan YBhg. Dato’ Sri Dr. Haji Sabin bin Samitah, JP, Mayor Bandaraya Kota Kinabalu selaku tetamu kehormat telah disambut oleh YBhg. Dato’ Sri Shamsun Baharin bin Mohd. Jamil, Ketua Pengarah Pusat Pencegahan Jenayah Kewangan Nasional (NFCC).

Tirai majlis dibuka dengan persembahan tarian sambutan oleh kumpulan Tari Budaya Dewan Bandaraya Kota Kinabalu di bawah pimpinan Puan Nurfadillah Iduk dari Jabatan Hal Ehwal Korporat, DBKK.

Para undangan yang hadir turut bersama-sama menyempurnakan lafaz ikrar Rukun Negara yang dipimpin oleh ASP Mohd. Faiz bin Ramzani dari Jabatan Siasatan Jenayah dan Komersil, Bukit Aman, Polis Diraja Malaysia.

Dato’ Sri Mayor dalam ucapannya berkata, di Kota Kinabalu, bilangan kes yang direkodkan bagi jenayah dalam talian bagi tempoh Januari hingga 22 Oktober 2024 adalah sebanyak 486 kes dengan catatan kerugian sebanyak RM13.9 juta.



Justeru itu, beliau menyeru semua pihak untuk berkerjasama dalam mengambil inisiatif melindungi komuniti, seperti menyebarkan informasi melalui media sosial dengan mempromosikan talian pantas NSRC, iaitu 997. Talian ini adalah talian untuk orang awam membuat laporan yang melibatkan jenayah penipuan dalam talian.

Majlis ini mendapat sambutan meriah dengan penyertaan lebih 250 peserta yang terdiri daripada penjawat awam, pesara, bakal pesara, pelajar Tingkatan 6, pelajar Institusi Pengajian Tinggi Awam dan Swasta serta golongan belia.

Turut hadir menyatakan sokongan terhadap program ini ialah YBhg. Datuk TPj Karunanithy a/l Y. Subbiah, Pengarah Suruhanjaya Pencegahan Rasuah Malaysia (SPRM) Sabah dan Tuan Ahmad Szalee bin Abdul Khairi, Timbalan Ketua Pengarah, NFCC.

Pengisian utama program ini adalah segmen wacana yang mengupas dengan lebih mendalam mengenai kes jenayah penipuan atau ‘scam’ yang semakin berleluasa. Antara tajuk wacana yang berlangsung ialah “Awais Scammer! Kami Pun Pandai Juga”, taklimat ‘consultation room’, taklimat “Kesedaran Bahaya Penyalahgunaan Dadah” dan taklimat daripada Agensi Kaunseling dan Pengurusan Kredit.

Menerusi segmen taklimat ini juga, para peserta turut memanfaatkan sesi soal jawab dengan mengutarakan isu-isu yang didepani mutakhir ini terutama berkaitan gejala penipuan dalam talian, inisiatif menangani jenayah kewangan dan lain-lain.

Peserta program turut berpeluang mengunjungi reruai pameran daripada pelbagai agensi seperti Jabatan Akauntan Negara Malaysia, Suruhanjaya Komunikasi dan Multimedia, Bank Negara Malaysia Sabah, Agensi Kaunseling dan Pengurusan Kredit, Jabatan Siasatan Jenayah Narkotik, Ibu Pejabat Polis Kontinjen Sabah dan Dewan Bandaraya Kota Kinabalu.

Sesi penutupan program telah disempurnakan dengan kemeriahan cabutan tiket bertuah yang dinanti-nanti oleh semua peserta sambil membawa pulang buah tangan yang disediakan khas bersempena program ini.

Tahniah diucapkan kepada semua peserta!

Semoga program ini menjadi titik permulaan buat masyarakat umum dalam meningkatkan kesedaran mengenai jenayah penipuan dalam talian.

DBKK, PBT PERTAMA

MENANDATANGANI NOTA KERJASAMA DENGAN PUSAT PENCEGAHAN JENAYAH KEWANGAN NASIONAL (NFCC)

Dewan Bandaraya Kota Kinabalu (DBKK) telah mencatat sejarah sebagai Pihak Berkuasa Tempatan (PBT) pertama di peringkat negeri yang memeterai kerjasama rasmi dengan Pusat Pencegahan Jenayah Kewangan Nasional (National Anti-Financial Crime Centre - NFCC). Nota Kerjasama ini telah ditandatangani oleh YBhg. Dato' Sri Dr. Haji Sabin Samitah, *JP*, Mayor Bandaraya Kota Kinabalu, bersama Dato' Sri Shamshun Baharin bin Mohd. Jamil, Ketua Pengarah NFCC, dalam satu majlis yang berlangsung pada 05 September 2024.

Kerjasama ini melibatkan tiga (3) skop utama, Maklumat Pemilikan Harta, Maklumat Pemegang Lesen, dan Maklumat Penyewa. Ini bertujuan untuk memperkukuh pengurusan kewangan dan memerangi jenayah kewangan dengan lebih berkesan, memastikan maklumat yang tepat dan terkini tersedia untuk pengawalan dan pemantauan yang sistematik.

Dato' Sri Dr. Haji Sabin Samitah menekankan Nota Kerjasama ini diharap akan meningkatkan keberkesanan pentadbiran dan pengawasan kewangan di DBKK. Melalui kerjasama ini juga akan turut memperbaiki keupayaan bandar dalam mengesan dan menangani ketidaktelusan pengurusan kewangan melalui integrasi data secara masa nyata, menjadikan pentadbiran lebih telus dan bertanggungjawab. Secara tidak langsung menaikkan kepercayaan penduduk Bandaraya Kota Kinabalu terhadap pengurusan pentadbiran organisasi DBKK.

Upacara menandatangani Nota Kerjasama ini turut disaksikan oleh Sr. Lifred Wong, Ketua Pengarah Sektor Perancangan dan Pembangunan DBKK, serta Mohd. Syahrizal Shah bin Zakaria, Penasihat Undang-undang NFCC, bersama-sama dengan pegawai-pegawai tertinggi DBKK dan NFCC. Perjanjian ini membuka lembaran baru dalam kolaborasi jangka panjang yang akan memperkukuh kesejahteraan bandar raya serta memastikan keadilan dan ketelusan kewangan terus terpelihara demi kepentingan masyarakat dan negara.

Sementara itu, Dato' Sri Shamshun Baharin berkata, inisiatif ini bukan sahaja memperkukuhkan pengurusan dalaman DBKK, malah berpotensi menjadi model contoh



bagi PBT lain di seluruh negara. Dengan strategi perkongsian data yang kukuh, DBKK akan terus menjaga integriti dan meningkatkan ketelusan dalam tadbir urus bandar raya.

Langkah ini juga mencerminkan komitmen DBKK dalam memastikan setiap aspek pengurusan kewangan dan pengawalan jenayah dilaksanakan dengan penuh disiplin serta kepatuhan, seiring dengan matlamat NFCC untuk mengurangkan ancaman jenayah kewangan. Beliau turut berkata kerjasama ini diharapkan akan mencetuskan peluang kolaborasi jangka panjang yang lebih berkesan, demi memastikan kesejahteraan rakyat terpelihara dan ketelusan kewangan dapat dipertingkatkan secara mampan.



SESI LIBAT URUS BERSAMA PENGUSAHA HOTEL TEMPATAN (SIRI 1 & SIRI 2), PERHEBAT JALINAN KERJASAMA DBKK DAN PEMAIN INDUSTRI

Sekitar 50 pemain industri perhotelan di sekitar Bandaraya Kota Kinabalu telah menghadiri Sesi Libat Urus bersama Dewan Bandaraya Kota Kinabalu (DBKK) yang diadakan pada 01 Oktober 2024.

Mereka merupakan wakil-wakil pengusaha hotel dan rumah lojing tempatan di bawah persatuan seperti Malaysia Association of Hotel (MAH) Sabah Chapter; Malaysia Budget Hotel Association (MBHA) Sabah Chapter dan Sabah Hotel Association (SHA).



Hadir mempengerusikan majlis adalah YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu yang telah mengalu-alukan kehadiran dan penglibatan peserta. Acara kemudian diteruskan dengan sesi taklimat yang disampaikan oleh Encik Robert B. Lipon, Timbalan Ketua Pengarah (Operasi), DBKK.

Objektif utama pelaksanaan libat urus ini adalah untuk mencambah idea dan mendapatkan maklum balas daripada para pemain industri perhotelan terhadap perancangan yang berpotensi untuk dilaksanakan oleh pihak DBKK, dalam usaha untuk menaik taraf aspek tarikan pelancong di Bandaraya Kota Kinabalu. Antaranya meningkatkan kualiti kebersihan, keindahan landskap, keselamatan bandar raya dan meningkatkan tahap pencahayaan di pusat bandar.

Sepanjang sesi berlangsung, DBKK turut mengambil maklum pendapat dan cadangan yang diutarakan oleh para pengusaha ke arah menambah baik perkhidmatan kepada pelancong.

Turut hadir dalam sesi ini adalah Puan Juvina Jimis @ Juvinia, Penolong Setiausaha Kementerian Pelancongan, Kebudayaan dan Alam Sekitar (KePKAS); Encik Lifred Wong, Ketua Pengarah, DBKK dan barisan pengurusan tinggi DBKK.

Penganjuran sesi seumpama ini bukan sahaja berfungsi sebagai platform penyampaian maklumat, namun juga menyediakan ruang untuk perbincangan dua hala di antara PBT dan pengusaha hotel.

PROGRAM "LOVE KK CITY BIKE, FREE RIDE TOUR – LETS CYCLE AND KEEP OUR CITY CLEAN"



Program Sustainable Cities Ride:
CyCLEAN (Cycling & Clean) di Padang Merdeka Kota Kinabalu pada 22 September 2024 (Ahad)

DBKK, PENJAJA, BERGANDING BAHU JAYAKAN OPERASI PEMBERSIHAN DAN KETERATURAN PASAR



DBKK, penjaja berganding bahu jayakan Operasi Pembersihan dan Keteraturan Pasar di Pasar Besar Kota Kinabalu pada September 2024.



KEMPEN HARI-HARI BAWA BEG BAH DILANCARKAN, SEIRING USAHA MELESTARIKAN BANDARAYA KOTA KINABALU

01 Ogos 2024, bermulalah Kempen Hari-hari Bawa Beg Bah dengan rasminya di Bandaraya Kota Kinabalu.

Menerusi inisiatif ini, beg plastik tidak lagi dibekalkan kepada pengguna di sebanyak 858 buah premis pasar raya, kedai serbaneka, kedai runcit, farmasi, stesen minyak, bakeri dan kedai pakaian sekitar Bandaraya Kota Kinabalu, sama ada secara berbayar mahupun percuma, sepanjang minggu.

Pelancaran ini menandakan fasa kelima dan terakhir dalam kempen yang telah dimulakan secara rasmi pada 11 September 2023, dengan hanya disertai oleh 36 buah premis pasar raya utama di bandar raya ini.

Gimik pelancaran kempen telah berlangsung di Bataras Marketplace, Jalan Pantai dengan disempurnakan oleh YB Datuk Abidin Madingkir, Pembantu Menteri kepada Ketua Menteri merangkap Menteri Yang Bertanggungjawab Kepada DBKK sambil disaksikan oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu.

Turut hadir ialah Sr. Lifred Wong, Ketua Pengarah, DBKK; Tuan Robert B. Lipon, Timbalan Ketua Pengarah (Operasi), DBKK dan Dr. Dayang Siti Maryam binti Mohd. Hanan, Penolong Setiausaha Kanan mewakili Setiausaha Tetap Kementerian Pelancongan, Kebudayaan dan Alam Sekitar (KePKAS).

Rombongan kemudian bergerak ke premis perniagaan yang terletak di Jalan Pantai iaitu Big Pharmacy dan



Orange, untuk meninjau tahap pelaksanaan Kempen Hari-hari Bawa Beg Bah, sebelum kembali ke bangunan DBKK.

Penganjuran kempen ini merupakan salah satu usaha berterusan dalam memelihara persekitaran semula jadi bandar raya dan memberikan warisan alam yang lebih baik untuk generasi akan datang.

DBKK berharap agar lebih ramai pemilik premis perniagaan di sekitar bandar raya menyokong usaha kempen ini, selaras dengan inisiatif mentransformasikan Kota Kinabalu sebagai bandar raya hijau, berdaya huni dan tanpa plastik.

Tahniah diucapkan kepada semua pihak yang merealisasikan misi Kempen Hari-hari Bawa Beg Bah.

Bah, apa lagi orang KK? Jom kita jayakan misi ini!





KEMPEN KESEDARAN MCMR 2.0

Penganjuran pelbagai aktiviti berkonsepkan “Bersih dan Hijau” telah menjadi penyeri utama kepada Majlis Penutupan Kempen Kesedaran “My City, My Responsibility” (MCMR) 2.0 Sempena Bulan Kebangsaan yang telah berlangsung pada 17 Ogos 2024.

Bertemakan 3R Jiwa Merdeka, antara aktiviti yang telah berlangsung sepanjang kempen ini adalah Anugerah Sekolah Bersih dan Hijau, Pertandingan Reka Cipta Antara Sekolah, Pertandingan Fotografi, Pertandingan Mencipta ‘Jingle’, Pertandingan Mewarna Kanak-kanak, ‘Merdeka Kids Fashion Show’, Pertandingan Kitar Semula Isi Rumah dan ‘Merdeka Fun Walk’.

Penyerahan hadiah kepada para pemenang telah disempurnakan oleh YB Datuk Abidin Madingkir, *JP*, Pembantu Menteri kepada Ketua Menteri merangkap Menteri Yang Bertanggungjawab Kepada DBKK sambil disaksikan oleh YBhg. Dato’ Sri Dr. Haji Sabin bin Samitah, *JP*, Mayor Bandaraya Kota Kinabalu.

Majlis penutupan yang berlangsung di The Oval, IMAGO Shopping Mall turut diserikan dengan pembukaan reruai daripada Jabatan Alam Sekitar, Jabatan Perlindungan Alam Sekitar, Pejabat Kesihatan Kawasan Kota Kinabalu, Sabah Electricity Sdn Bhd (SESB), Green Buddy dan LJD Corporation.

Tahniah diucapkan kepada semua pemenang!





60 TAN SAMPAH BERJAYA DIKUTIP DAN DILUPUSKAN, **"KK CLEANUP DAY 3.0: TANJUNG ARU"** LAUNG SEMANGAT KEBERSIHAN BERSAMA KOMUNITI

Sejumlah 60 tan sampah sarap berjaya dikutip dan dilupuskan dalam program KK Cleanup Day 3.0: Tanjung Aru yang telah berlangsung dengan jayanya pada 22 September 2024 di Kampung Tanjung Aru Lama dan Kampung Tanjung Aru Baru.

Program anjuran Dewan Bandaraya Kota Kinabalu (DBKK) melalui Jabatan Pengurusan Sisa Pepejal ini telah berjaya dilaksanakan secara bersepadu bersama Jabatan Air Negeri Sabah, Pejabat Kesihatan Kota Kinabalu, Green Buddy, Persatuan Cakna Alam Sekitar Sabah, Komuniti Sacred Heart Cathedral, Pertubuhan Khidmat Kemanusiaan Alpha Kappa Rho Malaysia, Berjaya Group, Management and Science University College Sabah, Cosmopoint College, SIDMA College, UNITAR College Sabah dan Kolej Teknikal Yayasan Sabah.

Antara inisiatif dan usaha kebersihan yang telah digerakkan oleh pasukan JPSP DBKK bersama komuniti dalam program ini adalah pembersihan lorong dan jalan, pembersihan tebing-tebing laut, pemasangan perangkap sampah, pengecatan rumah-rumah sampah, pemangkasan pokok dan pemotongan rumput, pembersihan parit, pemeriksaan struktur bangunan, pengurusan kenderaan terbiar dan penambahbaikan keteraturan penjaja. Para penduduk juga telah dinasihatkan untuk menjalankan tanggungjawab mereka dalam menjaga dan memantau tahap kebersihan kampung dengan lebih proaktif dan efektif.

Hadir merasmikan majlis adalah YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu yang telah turut mengadakan tinjauan kebersihan dan tahap penyampaian perkhidmatan DBKK di sekitar kampung, seraya mengambil maklum perkara-perkara yang perlu diambil perhatian dan tindakan.

Dalam ucapannya, Dato' Sri Mayor telah menyatakan harapan agar program ini dapat meningkatkan kesedaran masyarakat terhadap cara pelupusan sampah yang betul, menggalakkan aktiviti mesra alam yang berkesan dan memperkukuh kerjasama antara agensi kerajaan.

Turut hadir menzahirkan sokongan kepada komitmen DBKK ini ialah Datuk Yeo Boon Hai, mantan Mayor Bandaraya Kota Kinabalu; Datin Sri Hajah Adreen Aderizza binti Mohamad Soffi, Pengerusi PUSPANITA Cawangan Bandaraya Kota Kinabalu; Encik Mohd. Reduan bin Datuk Haji Aklee, Pemimpin Pembangunan Masyarakat N22 Tanjung Aru; En.Aripin Haji Suhaili, Ketua Kampung, Kumpulan Pengurusan Tinggi DBKK dan 320 peserta berbasikal CYCLEAN 2024 yang telah hadir dan bergotong-royong bersama peserta KK Cleanup Day 3.0: Tanjung Aru.

Setinggi-tinggi tahniah dan terima kasih diucapkan kepada semua yang terlibat dalam menjayakan program KK Cleanup Day 3.0: Tanjung Aru khasnya kepada warga kerja dan Jawatankuasa Pelaksana JPSP, pasukan operasi DBKK, agensi-agensi bekerjasama, pelajar-pelajar IPT dan penduduk kampung yang telah bertungkus-lumus menyumbang tenaga membersihkan persekitaran Kampung Tanjung Aru Baru dan Lama.

Semoga program ini menjadi pemangkin kepada penduduk setempat untuk mengekalkan kebersihan persekitaran yang berkualiti sekali gus mengangkat kesedaran untuk mengendalikan sisa sampah dengan tatacara yang betul.

Salam "KK Bersih dan Hijau"



124 TAN SAMPAH

BERJAYA DILUPUSKAN HASIL USAHA KK CLEANUP DAY 4.0

Program KK Cleanup Day 4.0: Pulau Gaya dan Pulau Sepanggar anjuran Dewan Bandaraya Kota Kinabalu (DBKK) telah berlangsung dengan jayanya selama tiga (3) hari bermula pada 02 Oktober 2024 dan berakhir pada 04 Oktober 2024.


Program ini melibatkan Kampung Lok Urai, Kampung Kasuapan, Kampung Pulau Gaya Asli, Kampung Lobong, dan Kampung Torong Logong di Pulau Gaya, serta Kampung Pulau Sepanggar di Pulau Sepanggar. Ia bertujuan untuk meningkatkan kesedaran sosial dalam kalangan penduduk dan pengusaha di Kota Kinabalu melalui aktiviti pembersihan yang berterusan. Usaha membersihkan kawasan kampung oleh penduduk adalah satu contoh kerjasama penting bagi memastikan kebersihan dan keindahan persekitaran.

Sepanjang tempoh tiga (3) hari program ini, sebanyak 124 tan sampah berjaya dilupuskan, dengan pecahan sebanyak 66 tan pada hari pertama, 35 tan pada hari kedua, dan 23 tan pada hari ketiga. Jumlah keseluruhan sampah yang berjaya dilupuskan ini juga melebihi jangkaan dan sasaran awal DBKK sebanyak 100 tan, menunjukkan komitmen yang tinggi daripada semua pihak yang terlibat.

Sebanyak 27 buah bot dan 31 unit jentera berat yang terdiri daripada lori kompaktor, lori ro-ro, jengkaut, dan open truck telah digerakkan sepanjang tempoh program bagi memastikan sampah yang terkumpul dapat dilupuskan dengan berkesan.

Dengan kejayaan program kali ini, dapat dilihat bagaimana usaha bersama boleh memberi impak yang besar. Ini turut menunjukkan komitmen dan kecekalan penduduk kampung dalam menjaga kebersihan. Syabas dan tahniah diucapkan kepada semua penduduk kampung yang terlibat di Pulau Gaya dan Pulau Sepanggar atas komitmen tinggi mereka dalam menjayakan program ini. Diharapkan semangat ini dapat diteruskan dan menjadi inspirasi kepada komuniti lain untuk menjaga alam sekitar dengan penuh tanggungjawab.

Setinggi-tinggi penghargaan juga diucapkan kepada 250 anggota DBKK yang telah bertungkus-lumus menjayakan program, termasuk pihak Taman-taman Sabah dan semua agensi yang terlibat.



PLASTIC4CHANGE: KEMPEN TEBUS PLASTIK, KE ARAH PELANCONGAN BERASASKAN KOMUNITI LESTARI DI KG. KOBUNI, INANAM

Setelah beberapa siri penganjuran Kempen Tebus Plastik "PLASTIC4CHANGE", Persatuan Kitar Semula Sabah (RIPPLE) kali ini mengadakan kolaborasi bersama Jabatan Pelancongan dan Kesejahteraan Masyarakat, Dewan Bandaraya Kota Kinabalu (DBKK).

Buat julung kalinya, Kampung Kobuni, Inanam telah dipilih sebagai Komuniti Perintis bagi pelaksanaan inisiatif ini. Ia sejajar dengan usaha untuk membangunkan Pelancongan Berasaskan Komuniti (CBT) lestari di bawah Program Citra Kasih. Kempen ini diadakan di Balairaya Homestay Desa Cinta Kobuni, Inanam bermula pukul 2.00 petang hingga 4.00 petang.

Untuk maklumat lanjut, warga Bandaraya Kota Kinabalu boleh menghubungi urus setia melalui talian 018-965 5281.



KOTA KINABALU SAHUT SEMANGAT HARI CUCI MALAYSIA 2024! LEBIH 900 PESERTA SEMARAKKAN PEMBERSIHAN MEGA

Bandaraya Kota Kinabalu telah menyaksikan semangat kerjasama lebih 900 peserta yang telah bersatu hati hadir menjayakan Hari Cuci Malaysia 2024: Program Pembersihan Mega Seluruh Negara bersempena World Cleanup Day 2024 pada 28 September 2024.

Diadakan secara serentak bersama Majlis Pelancaran Program Cuci Malaysia di peringkat Persekutuan, program yang telah diadakan di Kampung Sembulan ini jelas menyuntik kesedaran dalam kalangan komuniti akan kepentingan mengekalkan kebersihan persekitaran yang berkualiti.

Para peserta program yang terdiri daripada kakitangan agensi Kerajaan, Badan Bukan Kerajaan (NGO) dan penduduk Kampung Sembulan telah tiba berkumpul di Dewan Serbaguna Sembulan seawal 6.00 pagi, sebelum menerima Taklimat Hari Cuci Malaysia 2024 daripada Encik Leong Tze Fui, Pengarah Jabatan Pengurusan Sisa Pepejal, Dewan Bandaraya Kota Kinabalu (DBKK). Program penuh makna ini turut disempurnakan dengan kehadiran Sr. Lifred Wong, Ketua Pengarah, DBKK.

Lifred dalam ucapamannya berkata, program seumpama ini penting sebagai langkah pengukuhan kelestarian dan kesejahteraan komuniti. Beliau yang hadir mewakili Mayor Bandaraya Kota Kinabalu itu turut mengalungkan penghargaan setingginya kepada semua peserta, terutama penduduk Kampung Sembulan yang telah hadir menzahirkan sokongan jitu mereka tanpa mengira umur dan latar belakang.

Penghargaan turut dizahirkan kepada anggota-anggota Polis Diraja Malaysia, Angkatan Tentera Malaysia, Badan Bukan Kerajaan (NGO) dan kakitangan DBKK yang telah hadir dan bersama-sama melaksanakan kerja pembersihan. Beliau turut menekankan bahawa tanggungjawab menjaga kebersihan awam adalah tidak terletak pada bahu pihak berkuasa semata-mata, namun ia merupakan tanggungjawab mutlak individu untuk mengurus sisa sampah mereka sendiri dengan tatacara yang betul dan tanpa mencemarkan persekitaran.

Sejumlah 25 unit jentera berat telah digerakkan oleh pasukan DBKK bagi melaksanakan kerja-kerja pembersihan awam seperti pengutipan sampah sarap, pembersihan parit, pemangkasan pokok, pembersihan tumbuhan liar dan pemotongan rumput. Pada masa sama, kerja-kerja semburan kabus (fogging) turut dilaksanakan di sekitar kawasan kampung sebagai langkah kawalan serangga nyamuk.

Mobil lori terbuka, lori kompaktor, jengkaut, 'water jet tanker' dan 'skylift' adalah antara jentera pembersihan yang telah digerakkan sehingga berjaya melupuskan lebih 127 tan sampah terkumpul. Selain usaha pelupusan sampah, DBKK turut memanfaatkan platform ini dengan menyebarkan mesej pengurangan penggunaan beg plastik, Kempen Hari-hari Bawa Beg Bah dan kepentingan usaha kitar semula.

Turut hadir ialah Ketua-ketua Jabatan, DBKK dan Encik Mohd. Reduan bin Datuk Haji Aklee, Pemimpin Pembangunan Masyarakat (PPM) N22 Tanjung Aru.

Tahniah sekali lagi diucapkan kepada semua peserta program! Semoga usaha ini mampu meningkatkan kesedaran dalam kalangan masyarakat untuk menjaga kebersihan persekitaran Kota Kinabalu, Bandaraya Peranginan Semulajadi.

Ayuh, kita laungkan semangat dan budaya "KK Bersih dan Hijau"!



TAKLIMAT

PENGUNAAN PLASTIK 'JENIS BIODEGRADABLE DAN COMPOSTABLE' BERI PENDEDAHAN KEPADA ALTERNATIF PENGGUNAAN BEG PLASTIK

Dewan Bandaraya Kota Kinabalu (DBKK) menerusi Jabatan Pengurusan Sisa Pepejal (JPSP) telah menjalin kerjasama erat bersama SIRIM, dalam menganjurkan Taklimat Penggunaan Plastik 'Jenis Biodegradable dan Compostable', di Dewan Masyarakat Kota Kinabalu, pada 13 September 2024.

Seramai 300 orang peserta telah menghadiri taklimat ini yang terdiri daripada wakil syarikat pembekal plastik serta premis perniagaan yang terlibat dalam kempen pengurangan penggunaan beg plastik anjuran DBKK. Objektif utama acara ini adalah untuk memberikan penerangan lanjut berhubung penggunaan plastik jenis 'biodegradable dan compostable' yang telah diluluskan oleh pihak SIRIM, dan boleh digunakan sebagai alternatif kepada beg plastik sedia ada.

Acara telah dimulakan dengan Taklimat Pengenalan Kempen Pengurangan Penggunaan Beg Plastik "Hari-Hari Bawa Beg Bah" yang disampaikan oleh Encik Leong Tze Fui, Pengarah JPSP, DBKK. Turut berlangsung Taklimat Penggunaan Plastik Biodegradable dan Compostable oleh Encik Kamarul Ariefin bin Rosli, wakil SIRIM QAS International Sdn. Bhd. Sebelum bersurai, para peserta telah diberi platform menerusi sesi soal jawab untuk mengemukakan sebarang pertanyaan mahupun cadangan penambahbaikan.

Turut hadir adalah Puan Rommella Osmand, Pengarah SIRIM Sabah, dan Encik Robert B. Lipon, Timbalan Ketua Pengarah (Operasi).

Semoga perkongsian ini dapat dimanfaatkan dalam usaha pengurangan penggunaan beg plastik, seiring usaha melestarikan Bandaraya Kota Kinabalu!



KE ARAH KOMUNITI

'ECO GREEN' DAN 'ZERO WASTE', DBKK BERI PENDEDAHAN AMALAN LESTARI

Jabatan Pelancongan dan Kesejahteraan Masyarakat, Dewan Bandaraya Kota Kinabalu (DBKK) telah mengadakan lawatan ke Tanjung Aru Marine Ecosystem (TAME) Center bersama pihak komuniti setempat, pada 04 Julai 2024 (Khamis).

Lawatan ini memandu tujuan untuk memberi pendedahan kepada komuniti setempat akan kaedah penghasilan produk kraftangan atau hiasan dengan menggunakan barangan terpakai. Ia turut berhasrat untuk mendorong komuniti setempat memanfaatkan amalan lestari ke arah komuniti 'Eco Green' dan 'Zero Waste'.

Kumpulan peserta adalah terdiri daripada 26 orang yang turut dihadiri oleh Puan Fauziahton Ag. Samad, Pengarah Jabatan Pelancongan dan Kesejahteraan Masyarakat (JPKM) DBKK; Unit Pemimpin Pembangunan Masyarakat (UPPM) N.18 Inanam, komuniti Homestay Desa Cinta Kobuni, komuniti Homestay Id Pogimpaan dan komuniti Homestay Darau Wetland.

Ucapan penghargaan turut dizahirkan kepada Puan Tressie Yap, Ahli Lembaga Penasihat (ALP) DBKK dan Encik Japson Wong, Ketua Pegawai Eksekutif selaku Pengasas TAME, yang turut menyokong dan menjayakan program lawatan ini.





PEMANTAPAN KUALITI KEBERSIHAN BANDAR RAYA, DBKK PERKUKUH ASET DAN LOGISTIK KEBERSIHAN

Komited dalam meningkatkan kualiti kebersihan bandar raya, Dewan Bandaraya Kota Kinabalu (DBKK) telah mengambil inisiatif untuk memperkukuh kekuatan aset dan logistik pembersihan dengan penambahan lori kompaktor sampah yang baharu.

10 unit lori kompaktor telah diperoleh pada 20 Ogos 2024 menerusi satu majlis penyerahan yang diadakan di Depoh Jabatan Pengurusan Sisa Pepejal. Majlis telah menyaksikan penyerahan replika kunci lori kompaktor daripada YBhg. Datuk Chok Yun Kiong, Pengarah Urusan Universal Motor Sdn. Bhd. kepada YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu.

Dato' Sri Mayor dalam ucapannya berkata, penambahan lori kompaktor ini adalah signifikan dalam usaha untuk terus memperkasakan tahap penyampaian perkhidmatan pengurusan sisa pepejal di Bandaraya Kota Kinabalu. Beliau yakin bahawa dengan pertambahan ini akan mampu menambah baik kerja-kerja pengutipan sampah dan secara tidak langsung menyuntik semangat kerja kepada pasukan pembersihan DBKK.

Operasi lori kompaktor baharu ini akan menyokong kepada kekuatan logistik DBKK sedia ada yang merangkumi kawasan operasi di Zon 1 sehingga Zon 8 iaitu Zon Kota Kinabalu, Kepayan, Likas - Damai, Kolombong - Bukit Padang, Inanam, Manggatal, Telipok - Sepanggar dan akhir sekali kawasan bukit.

DBKK akan terus berusaha untuk memastikan perkhidmatan pengutipan sampah di bandar raya dilaksanakan dengan lancar dan tidak terjejas akibat kekangan jumlah lori sampah yang berfungsi.

Turut hadir dalam majlis penyerahan kunci lori kompaktor baharu ini ialah Sr. Lifred Wong, Ketua Pengarah DBKK; Encik Robert B. Lipon, Timbalan Ketua Pengarah (Operasi) DBKK; Encik Victor Gerard Kuasi, Timbalan Ketua Pengarah (Pengurusan Kewangan) DBKK serta Ketua-ketua Jabatan DBKK.



DBKK TERUSKAN USAHA

KERJA-KERJA PEMBERSIHAN DI KAWASAN PERAIRAN



Anggota Jabatan Pengurusan Sisa Pepejal (JPSP) mengutip sampah yang terapung dan terdampar di pesisiran jeti.



Anggota Jabatan Pengurusan Sisa Pepejal (JPSP) memasukkan sampah ke dalam karung.

PENYERAHAN CPC PROJEK NAIK TARAF TAMAN REKREASI PANTAI TANJUNG ARU DAN PENYERAHAN ANAK POKOK KELAPA, LANGKAH SIGNIFIKAN DALAM MEWUJUDKAN BANDAR RAYA LESTARI DAN BERDAYA HUNI

Dewan Bandaraya Kota Kinabalu (DBKK) telah menerima Sijil Perakuan Siap Kerja (CPC) daripada Jabatan Landskap Negara (JLN) bagi Projek Naiktaraf Taman Rekreasi Pantai Tanjung Aru dalam satu majlis yang diadakan pada 12 Disember 2024 di Taman Awam Tanjung Aru.

Projek Naik Taraf Taman Rekreasi Pantai Tanjung Aru yang dimulakan pada 17 Ogos 2024 telah berjaya disiapkan pada 19 November 2024 dan merupakan sebahagian daripada Program Kemajuan Projek-projek Naik Taraf Taman Awam dan Persekitaran Kehidupan Tahun 2024 yang dibiayai oleh Jabatan Landskap Negara (JLN), Kementerian Perumahan & Kerajaan Tempatan (KPKT) Malaysia.

Dalam ucapan penghargaannya, YBhg. Dato' Sri Dr. Haji Sabin bin Samitah, JP, Mayor Bandaraya Kota Kinabalu berkata, antara transformasi signifikan yang dicapai menerusi pelaksanaan projek ini ialah plaza perhimpunan, laluan pejalan kaki, landskap menarik dan kawasan permainan kanak-kanak.



Tambah beliau, taman ini tidak hanya bertujuan sebagai tempat rekreasi, tetapi juga menjadi mercu tanda kepada usaha pemuliharaan alam sekitar dan penyediaan kemudahan inklusif untuk semua warga Bandaraya Kota Kinabalu.

Dalam pada itu, Dato' Sri Mayor turut menzahirkan penghargaan kepada Malaysian Kuwait Investment Co. Sdn. Bhd. (MKIC) atas sumbangan sebanyak 5,000 pokok kelapa kepada DBKK.

Majlis turut menyaksikan penyerahan sumbangan 100 anak pokok kelapa jenis Malayan Red dan Yellow Dwarf kepada setiap penerima yang terdiri daripada institusi pendidikan, komuniti, pertubuhan bukan kerajaan (NGO), hotel, jabatan kerajaan dan agensi terpilih.

Antaranya ialah Polis Diraja Malaysia (PDRM), Tentera Laut Diraja Malaysia (TLDM), Jabatan Penerangan Sabah, Jabatan Pembangunan Sumber Manusia Negeri, Taman-taman Sabah, Mahkamah Syariah, Universiti Malaysia Sabah (UMS), Universiti Teknologi Malaysia (UiTM), University College Sabah Foundation (UCSF), Maktab Gaya, Sabah International Convention Centre (SICC), Hotel Shangri-La Kota Kinabalu, PUSPANITA Cawangan Sabah, kumpulan Pelancongan Berasaskan Komuniti (CBT) dan Sekolah Sukan Sabah.

Hadir sama dalam majlis ini ialah Sr. Lifred Wong, Ketua Pengarah, DBKK; Encik Azrel B. Ismail, Penolong Pengarah Kanan Bahagian Pengurusan Landskap, JLN; Encik Mohd. Shahrin bin Mohd. Ali, Ketua Pegawai Eksekutif Malaysian Kuwait Investment Co. Sdn. Bhd.; YBhg. Datin Sri Hajah Adreen Aderizza binti Mohamad Soffi, Pengerusi PUSPANITA Cawangan Bandaraya Kota Kinabalu dan Encik Robert B. Lipon, Timbalan Ketua Pengarah (Operasi), DBKK selaku Pengerusi Penganjur Program.

Semoga usaha sama ini akan diperhebat di masa akan datang dalam menjadikan Kota Kinabalu sebagai bandar raya bersih, hijau dan berdaya huni untuk semua!



PROGRAM PENANAMAN POKOK DBKK BERSAMA MISS WORLD 2024, **MISS KRYSTYNA PYSZKOVA** **ZAHIRKAN SOKONGAN** **MELESTARIKAN BANDARAYA** **KOTA KINABALU**

Dewan Bandaraya Kota Kinabalu (DBKK) pada 25 Julai 2024 telah berkongsi momen indah dan bermakna bersama Miss Krystyna Pyszkova, Miss World 2024, yang telah meluangkan masa menanam anak pokok di laman bangunan DBKK, sebagai tanda sokongan terhadap usaha melestarikan Bandaraya Kota Kinabalu.

Krystyna yang turut disertai oleh Julia Morley, Ketua Pegawai Eksekutif dan Pengerusi Miss World Organization; Datuk Susan Chang, Naib Pengerusi Dewan Perniagaan dan Perindustrian Antarabangsa Malaysia (MICCI) Cawangan Sabah; Dr. Sean Wong, Pemegang Lesen Rasmi dan Pengarah Nasional Miss World Malaysia serta Miss Saroop Roshni, Miss World Malaysia 2023, telah menanam bibit pokok 'Kopsia Arborea', yang merupakan spesies pokok berbunga dan signifikan kepada keindahan landskap bandar raya.

Turut serta dalam kumpulan delegasi ini adalah Stephen Douglas Morley, Pengarah Miss World Organization dan Vivian Grant Harris, Pengurusan Miss World Organization.

Hadir menyambut dan meraikan kehadiran Krystyna dan delegasi Miss World Organization di DBKK adalah Sr. Liffred Wong, Ketua Pengarah, DBKK mewakili Mayor



Bandaraya Kota Kinabalu; Pengurusan Tinggi DBKK dan warga kerja DBKK yang tidak melepaskan peluang merakam gambar kenangan bersama ratu cantik dunia itu.

Kota Kinabalu berbesar hati menjadi salah satu daripada destinasi pilihan delegasi Miss World 2024 ini yang sememangnya akan mengangkat imej Kota Kinabalu ke perhatian antarabangsa.

Terima kasih dan semoga berjumpa lagi!

AKTIVITI PENANAMAN

POKOK HERBA TEMPATAN DI BUKIT BENDERA

Unit Penyelidikan dan Pemuliharaan, Jabatan Landskap, DBKK bersama kumpulan pelajar praktikal tahun akhir Program Taman Alam Semulajadi dan Rekreasi dari Fakulti Perhutanan Tropika, Universiti Malaysia Sabah (UMS) telah menjayakan aktiviti menanam pokok herba tempatan di Bukit Bendera pada 09 Ogos 2024.

Inisiatif ini bertujuan untuk memulihara spesies pokok herba tempatan yang bernilai tinggi, di samping menjadikan Bukit Bendera sebagai pusat spesimen pokok herba hutan di tengah-tengah Kota Kinabalu, yang berpotensi menjadi tarikan pelancong.

Lima spesies pokok hutan telah ditanam hasil sumbangan Koperasi Pelancongan Kinabatangan antaranya Pokok Bongkol (*Nauclea Orientalis*), Pokok Tangkol (*Ficus Racemosa*), Pokok Benuang (*Octomeles Sumatrana*), Pokok Bayur (*Pterospermum Acerifolium*) dan Pokok Salungapid (*Mallotus Muticus*).

DBKK amat menyokong usaha dan sumbangan masyarakat awam ke arah penghijauan dan pemuliharaan kawasan hutan di Kota Kinabalu. Terima kasih diucapkan kepada Koperasi Pelancongan Kinabatangan yang telah memberi sumbangan pokok herba tempatan, Universiti Malaysia Sabah (UMS) dan semua pihak yang terlibat menjayakan aktiviti ini.



KURSUS ARBORIKULTUR DAN PEMANGKASAN POKOK TEDUHAN, **BERI PENDEDAHAN KAEDAH DAN TEKNIK PENYELENGGARAAN POKOK SECARA TEORI DAN PRAKTIKAL**

Seramai 47 kakitangan Dewan Bandaraya Kota Kinabalu (DBKK) telah menyertai Kursus Arborikultur dan Pemangkasan Pokok Teduhan yang berlangsung selama dua (2) hari, bermula 15 hingga 16 Oktober 2024, di Akademi Pusat Pembelajaran Bandaraya, Taman Kingfisher, Kota Kinabalu.

Hari pertama kursus menekankan terhadap pembelajaran teori dengan sesi taklimat bertajuk Pengenalan Kepada Arborikultur dan Aset Hidup PBT, Jenis Pemangkasan, Peralatan Pemangkasan & Keselamatan Kerja Cantasan Di Lapangan. Bagi memastikan para peserta memahami teori yang dibentangkan, sesi perbincangan diadakan untuk memberi peluang kepada mereka untuk bertanya soalan dengan lebih lanjut.

Kursus diteruskan pada hari kedua yang memfokuskan terhadap mempraktikkan teori yang telah dipelajari melalui latihan Amali Keselamatan Gergaji Berantai & Kerja Cantasan.

Kesungguhan dan komitmen para peserta dapat dilihat menerusi penyertaan aktif mereka sepanjang kursus berlangsung.

Tahniah kepada semua peserta.



DBKK LAKSANA KERJA-KERJA **PEMBERSIHAN TUMBUHAN LIAR PADA BANGUNAN SEKITAR GAYA STREET**

Dewan Bandaraya Kota Kinabalu (DBKK) akan terus mempertingkatkan usaha memelihara dan melestarikan imej Kota Kinabalu sebagai sebuah bandar raya hijau dan berdaya huni.

Bertindak menerusi Jabatan Landskap, antara inisiatif yang telah diambil termasuk kerja-kerja membuka tumbuhan liar yang tumbuh menjalar pada bangunan di Gaya Street dan menyelenggara pokok rimbun di ruang legar Sinsuran.

Tindakan membuka tumbuhan liar di bangunan sekitar bandar raya telah dimulakan pada 12 Julai 2024, sempena Operasi Pembersihan Jalan Gaya anjuran DBKK bersama para penjaja pasar malam Api-API Night Food Market.

Manakala, tindakan yang dilaksana setakat 15 Ogos 2024 menerusi operasi ini adalah di sekitar Jalan Pantai, iaitu bangunan Maybank yang mendapat tumpuan pelancong antarabangsa, dengan melibatkan kekuatan seramai 10 orang anggota, sebelum meneruskan kerja pemangkasan pokok di sekitar premis komersil, di Sinsuran.

DBKK akan terus komited menjalankan operasi pembersihan di sekitar bandar raya yang akan dilaksanakan secara berperingkat, khususnya di kawasan yang sering menjadi tumpuan para pelancong.





PROGRAM KEBUN BANDAR DBKK:

5 AHLI KEBUNITI TEMPATAN TERIMA SET TEKNOLOGI GREENKIT MARDI

Institut Penyelidikan dan Kemajuan Pertanian Malaysia (MARDI) Negeri Sabah telah menganjurkan Majlis Penyerahan Set Teknologi Greenkit MARDI kepada lima (5) ahli kebuniti tempatan, di bawah Program Kebun Bandar Dewan Bandaraya Kota Kinabalu (DBKK).

Penyerahan ini telah disampaikan oleh Dr. Helda Souki, Pengarah MARDI Negeri Sabah kepada Sr. Lifred Wong, Ketua Pengarah, DBKK dalam satu majlis yang diadakan di Ibu Pejabat MARDI Negeri Sabah pada 05 November 2024.

Program ini merupakan program yang diadakan buat julung kalinya di Sabah dan para peserta yang terpilih merupakan perintis projek Kebun Komuniti Berasaskan Agroteknologi MARDI.


Antara kebuniti tempatan yang dipilih sebagai penerima ialah Komuniti Kebun Bandar JKDB Taman Sempelang dan Grace Court; Komuniti Kebun Bandar Kg. Sembulan Tengah; Komuniti Kebun Bandar SK Stella Maris; Komuniti Kebun SK Seri Gaya dan Hospital Mesra Bukit Padang.

Kesemua kebuniti ini akan menerima bantuan pertanian berteknologi Greenkit MARDI yang bernilai RM20 ribu hingga RM40 ribu setiap satu, di bawah Projek Kebun Komuniti Berasaskan Agroteknologi, melalui Program Pengukuhan Keterjaminan Makanan Kementerian Pertanian dan Keterjaminan Makanan Malaysia (KPKM) 2024.

Turut hadir, Tuan Robert Lipon, Timbalan Ketua Pengarah (Operasi), DBKK merangkap Pengerusi Jawatankuasa Kebun Bandar Raya Kota Kinabalu dan Puan Fauziahton Ag Samad, Pengarah Jabatan Pelancongan & Kesejahteraan Masyarakat, DBKK.

Bersempena majlis ini, turut berlangsung Kursus Inovasi Pertanian Bandar MARDI untuk lima (5) ahli kebuniti sebagai persediaan pelaksanaan projek Kebun Komuniti Agroteknologi MARDI.

Syabas dan tahniah kepada para komuniti kebun bandar Kota Kinabalu!



JABATAN LANDSKAP DBKK LAKSANA KERJA-KERJA PENYELENGGARAAN LANDSKAP KEJUR DI KAWASAN LAPANG

1 Julai 2024



Jabatan Landskap DBKK Laksana Kerja-Kerja Penyelenggaraan Landskap Kejur di Kawasan Lapang sekitar Bandaraya Kota Kinabalu.

RUMPUT PANJANG DI BAHU JALAN DAN JALAN UTAMA/JALAN PROTOKOL, SYARIKAT KONSESI DISERU TINGKATKAN JADUAL PENYELENGGARAAN

12 Julai 2024



Jabatan Landskap DBKK menjalankan kerja-kerja pemotongan rumput panjang di Jalan Tun Fuad Stephens.

"BIAR SEGAR DAN BERSERI". PENJAGAAN TANAMAN LANDSKAP BANDAR RAYA DIUTAMAKAN


3 Ogos 2024



Unit Pengurusan Landskap DBKK bersama kontraktor penyelenggara landskap jalan utama membuat kerja-kerja penyiraman bagi mengelak risiko kekeringan dan kematian tanaman terutama di zon pusat bandar, jalan utama dan bulatan jalan.

USAHA BERSEPADU ANTARA AGENSI LANCARKAN KERJA-KERJA MENGALIH DAHAN POKOK PATAH

4 September 2024



Kerja -kerja mengalihkan dahan pokok patah berhampiran muara Sungai Likas, Jalan Tun Fuad Stephens, antara DBKK bersama agensi luar seperti Trafik dan Bomba.

SAMBUTAN HARI TANDAS SEDUNIA PERINGKAT BANDARAYA KOTA KINABALU TAHUN 2024, **DIDIK MASYARAKAT MENJADI PENGGUNA TANDAS BERTANGGUNGJAWAB**

Selaras usaha berterusan dalam melaksanakan Kempen Pembudayaan Tandas Bersih melibatkan para pengguna tandas awam, Dewan Bandaraya Kota Kinabalu (DBKK) telah menganjurkan Majlis Sambutan Hari Tandas Sedunia Peringkat Bandaraya Kota Kinabalu bertempat di Dewan Mesyuarat, Bangunan DBKK, pada 22 November 2024.

Bertemakan “Tandas Bersih, Komuniti Sejahtera”, program ini bertujuan untuk memantapkan pembudayaan tandas bersih dan mendidik masyarakat agar menjadi pengguna tandas yang bertanggungjawab, sekali gus meningkatkan kualiti pengurusan tandas awam ke status Bersih, Menawan dan Wangi (BMW).

Tirai majlis dibuka dengan ucapan perasmian daripada YBhg. Dato’ Sri Dr. Haji Sabin bin Samitah, *JP*, Mayor Bandaraya Kota Kinabalu. Dalam ucapannya, Dato’ Sri Mayor menzahirkan harapan beliau agar usaha DBKK ini akan meningkatkan lagi kesedaran masyarakat awam dalam membudayakan tandas bersih sebagai amalan kehidupan seharian.

Jelasnya, penjagaan dan pembudayaan tandas bersih merupakan tanggungjawab bersama dan bukan hanya terletak pada pihak tertentu sahaja. Beliau turut menggesa agar semua pihak dapat berganding bahu dalam menyebarkan mesej kepentingan menjadi pengguna tandas yang bertanggungjawab dan menjaga kebersihan tandas pada setiap masa.

Majlis kemudian diteruskan dengan acara kemuncak, iaitu Penyampaian Hadiah Pertandingan Tandas Bersih yang disampaikan oleh Dato’ Sri Mayor. Pertandingan ini telah berlangsung bermula Oktober hingga 19 November 2024.

Turut hadir ialah, Sr. Lifred Wong, Ketua Pengarah, DBKK; Encik Robert Lipon, Timbalan Ketua Pengarah (Operasi), DBKK selaku Pengerusi Penganjur majlis dan Encik Rozalee bin Jamir @ Irwan, Penolong Pegawai Pendidikan Daerah, Sektor Pembangunan Murid, Pejabat Pendidikan Daerah Kota Kinabalu mewakili Pegawai Pendidikan Daerah Kota Kinabalu.

Semua pemilik premis makanan diseru untuk meningkatkan tahap kebersihan tandas dan premis



masing-masing demi menjadikan Kota Kinabalu sebuah bandar raya yang lebih selamat, selesa, sihat dan sejahtera.

Berikut adalah senarai pemenang berdasarkan lapan (8) kategori utama yang dipertandingkan:

KATEGORI SEKOLAH RENDAH	
Johan	SK Lok Yuk Likas
Naib Johan	SK (Cina) Anglo-Chinese
Ketiga	SK St. Catherine (M)
Ketiga Bersama	SK Babagon Toki
KATEGORI SEKOLAH MENENGAH	
Johan	SM All Saints
Naib Johan	SMK Perempuan Likas
Ketiga	Kolej Tingkatan 6
KATEGORI RESTORAN	
Johan	Restoran BTC Bistro (Luyang)
Naib Johan	Alu-Alu Kitchen
Ketiga	BC Bistro
KATEGORI KEDAI KOPI	
Johan	Kedai Kopi Kinabalu
KATEGORI 'COFFEE HOUSE'	
Johan	The Vin's Place
Naib Johan	Lucky Bean Kingfisher
Ketiga	Richiamo Coffee
KATEGORI STESEN MINYAK	
Johan	Petron Ulam South
Naib Johan	Petron Jalan Kolam
Ketiga	Petron Ulam North
Ketiga Bersama	Stesen Petronas Taman Fu Yen
KATEGORI PUSAT BELI BELAH	
Johan	Suria Sabah Mall
Naib Johan	88 Mall
Ketiga	Jesselton Residence & Mall
KATEGORI PUSAT TUMPUAN PELANCONG	
Johan	Mari Mari Cultural Village

MAJLIS PERASMIAN TANDAS AWAM INANAM POINT, **TANDA KOMITMEN KEPADA KEMUDAHAN AWAM**

Majlis Perasmian Tandas Awam Inanam Point yang berlangsung pada 14 Oktober 2024, menandakan satu lagi usaha penyediaan infrastruktur awam yang berkualiti di sekitar Bandaraya Kota Kinabalu.

Objektif utama pelaksanaan inisiatif ini adalah memastikan warga bandar raya, khususnya di sekitar Inanam, mempunyai akses kepada kemudahan awam yang bersih dan selesa untuk kegunaan harian.

Sebagai simbolik perasmian, YB Datuk Peto Galim, Pembantu Menteri (II) di Kementerian Pertanian, Perikanan dan Industri Makanan Sabah merangkap Ahli Dewan Undangan Negeri (ADUN) N.18 Inanam telah menyerahkan replika kunci kepada Dewan Bandaraya Kota Kinabalu (DBKK), yang diterima oleh Puan Faradillah Hj. Abdul Rani, Timbalan Ketua Pengarah (Khidmat Pengurusan), DBKK, yang hadir mewakili Mayor Bandaraya Kota Kinabalu.

Pembinaan Tandas Awam Inanam Point dijalankan mengikut piawaian 'Bersih, Menawan, dan Wangi' (BMW), yang merupakan inisiatif daripada Kementerian Perumahan dan Kerajaan Tempatan (KPKT) dalam meningkatkan standard tandas awam di seluruh negara.



DBKK TINGKATKAN **PEMERIKSAAN DAN PEMANTAUAN PREMIS MAKANAN**

Sejumlah 246 kompaun di bawah Undang-undang Kecil (Makanan dan Premis Makanan) 1966 dan Undang-Undang Kecil (Anti-Sampah Sarap) 1984 telah dikeluarkan oleh Dewan Bandaraya Kota Kinabalu (DBKK) bagi tempoh Julai hingga Disember 2024, kepada pengusaha premis makanan yang gagal mematuhi syarat lesen dan gagal memastikan premis mereka berada dalam keadaan bersih dan teratur.

Dalam tempoh yang sama, DBKK melalui Jabatan Kesihatan Persekitaran Bandaraya (JKPB) juga telah membuat pemeriksaan dan penggredan keatas 669 premis makanan, yang mana sebanyak 160 premis telah mendapat gred A, 507 premis mendapat gred B dan dua (2) premis mendapat gred C.

Tandas-tandas di premis makanan turut diperiksa dan diberikan penarafan bintang sepanjang Julai hingga Disember 2024, iaitu 269 buah tandas premis makanan dianugerahkan 3 Bintang ke atas dan 204 buah tandas mendapat 2 Bintang ke bawah. Menerusi pemeriksaan ini, pengusaha premis telah diarahkan untuk membuat penambahbaikan dan memastikan tandas di premis mereka sentiasa berada dalam keadaan bersih dan berfungsi dengan baik.

Hasil pemeriksaan turut mendapati sejumlah 251 premis makanan telah menjalankan kawalan makhluk perosak ('pest control') di premis mereka. Mana-mana premis makanan yang belum berbuat demikian, hendaklah melaksanakan kawalan makhluk perosak dengan kadar segera.

DBKK mengucapkan tahniah kepada premis makanan yang berjaya mencapai gred dan penarafan bintang yang cemerlang. Semua pengusaha premis makanan dinasihati untuk mematuhi peraturan sedia ada demi menjamin kebersihan dan keselamatan kualiti makanan yang dijual.



PROGRAM KESEDARAN KESIHATAN PERSEKITARAN DI SM ALL SAINTS, KE ARAH KOMUNITI SIHAT DAN ALAM SEKITAR TERPELIHARA

Seiring usaha memperkukuh kesedaran kesihatan awam dan persekitaran, Dewan Bandaraya Kota Kinabalu (DBKK) melalui Jabatan Kesihatan Persekitaran Bandaraya dengan jayanya menganjurkan Program Kesedaran Kesihatan Persekitaran Sempena Sambutan Hari Kesihatan Persekitaran Sedunia di Sekolah Menengah (SM) All Saints, pada 26 September 2024.

Mengangkat tema “Sekolah Sihat, Komuniti Sejahtera”, program ini bukan sahaja menghimpunkan pelajar dan staf sekolah, tetapi juga melibatkan komuniti dan Pihak Berkuasa Tempatan (PBT) dalam aktiviti bermakna yang menyokong kesedaran kesihatan persekitaran.

Majlis perasmian telah disempurnakan oleh Sr. Lfred Wong, Ketua Pengarah, DBKK, yang mewakili Mayor Bandaraya Kota Kinabalu. Dalam ucapannya, beliau menekankan peranan pendidikan awal dalam membentuk generasi yang prihatin terhadap alam sekitar dengan menyebut, “melentur buluh, biarlah dari rebungnya,” mengajak semua pihak untuk mendidik anak muda tentang pentingnya menjaga kebersihan dan memelihara alam sekitar sejak awal.



Turut hadir Encik Robert Lipon, Timbalan Ketua Pengarah (Operasi), DBKK, merangkap Yang Dipertua PIBG SM All Saints, yang bertindak sebagai Pengerusi Pelaksana Program serta Cik Ernah binti Wagimin, Penolong Pegawai Pendidikan Daerah Kota Kinabalu, Sektor Pembangunan Murid, Pejabat Pendidikan Daerah Kota Kinabalu dan Dr. Noraziah binti Bakri, Pegawai Kesihatan Kawasan Kota Kinabalu, serta Dr. Mary Gambidau, Pengetua SM All Saints. Selain itu, hadir sama dalam program ini adalah Pn. Daisy Aloysius, Timbalan Pengarah, Jabatan Perlindungan Alam Sekitar Sabah dan Dr. Naomi Martin, Penolong Pengarah, Wilayah Kota Kinabalu, Jabatan Perkhidmatan Veterinar Sabah.

Antara inisiatif yang mencuri perhatian dalam program ini ialah Kempen “Hari-Hari Bawa Beg Bah”, satu usaha berterusan untuk mengurangkan penggunaan beg



plastik dengan memperkenalkan beg guna semula kepada pelajar dan komuniti. Acara simbolik penyerahan sumbangan 30 anak pokok turut disempurnakan sebagai satu peringatan akan pentingnya menghidupkan persekitaran kita demi masa depan yang lebih baik.

Program ini turut menampilkan sesi ceramah yang mengupas isu-isu berkaitan kesihatan persekitaran. Fokus utama program ini adalah untuk meningkatkan kesedaran tentang penjagaan kebersihan dan keselamatan makanan, amalan tandas bersih, serta pencegahan penyakit bawaan LiLaTiN (Lipas, Lalat, Tikus, dan Nyamuk). Selain itu, ceramah mengenai penjagaan haiwan peliharaan yang bertanggungjawab serta kesedaran mengenai kebajikan haiwan dan kempen menentang wabak denggi berjaya menarik tumpuan hadirin. Di samping itu, topik ceramah berhubung penyelenggaraan tanaman hiasan serta penguatkuasaan undang-undang turut dibentangkan. Sesi soal jawab yang menyusul setiap ceramah memberikan peluang kepada peserta untuk mendalami lagi maklumat yang disampaikan, sekali gus menyemarakkan semangat untuk bersama menjaga persekitaran.

Turut berlangsung penyampaian hadiah kepada pelajar sekolah atas kemenangan dan saguhati dalam pertandingan melukis poster. Pertandingan ini membolehkan pelajar menonjolkan bakat mereka dalam menyampaikan mesej penting mengenai kebersihan alam sekitar.

Program ini mencerminkan komitmen DBKK dan SM All Saints dalam usaha memelihara persekitaran yang sihat dan selamat. Dengan kerjasama padu daripada pelbagai pihak, program ini diharapkan dapat diteruskan dan menjadi inspirasi kepada sekolah-sekolah lain untuk turut sama menyumbang kepada kesejahteraan komuniti dan alam sekitar yang lebih bersih dan lestari.



KETIDAKPATUHAN PENJAJA, **JABATAN PELESENAN LAKSANAN OPERASI PENGUATKUASAAN**



Jabatan Pelesenan bersama Jabatan Penguatkuasaan DBKK menjalankan Operasi pengukuatkuasaan kepada penjaja yang berniaga di sekitar SJK Lok Yuk pada Oktober 2024.



Jabatan Pelesenan bersama Jabatan Penguatkuasaan DBKK menjalankan Operasi pengukuatkuasaan kepada penjaja yang berniaga di Indah Permai pada November 2024.



Jabatan Pelesenan menjalankan Operasi pengukuatkuasaan kepada penjaja yang berniaga di Lokasi Berhadapan dengan Wisma Pendidikan, Likas pada November 2024.



Jabatan Pelesenan bersama Jabatan Kesihatan dan Persekitaran Bandaraya DBKK menjalankan Operasi pengukuatkuasaan kepada penjaja yang berniaga di Pasar Malam Lido pada Disember 2024.

TEGAS, MESRA DAN BERHEMAH!

JABATAN PENGUATKUASAAN PANTAU PEMATUHAN UUK



Tindakan sitaan dan penguatkuasaan oleh Jabatan Penguatkuasaan DBKK ke atas peniaga tanpa lesen disekitar taman-taman awam.



Tindakan pengeluaran tawaran kompaun dibawah UUK Anti Sampah Sarap dan Notis Serta Merta untuk menghentikan tindakan menyimpan, meletak dan membuang sampah dikawasan awam oleh Jabatan Penguatkuasaan DBKK.



Jabatan Penguatkuasaan DBKK menjalankan operasi bersepadu bas persiaran dan bas berhenti-henti di kawasan Bandaraya Kota Kinabalu.

PENGUSAHA 'FUN FAIR' DEGIL

DIARAH HENTI OPERASI SERTA-MERTA

Dewan Bandaraya Kota Kinabalu (DBKK) menerusi Jabatan Pelesenan (JPL) telah mengarahkan penghentian operasi sebuah pesta ria atau 'fun fair' yang dijalankan tanpa permit dalam satu pemeriksaan yang dilakukan di Pekan Inanam, pada 01 Julai 2024 (Isnin) lalu.

Pemeriksaan yang melibatkan seramai enam (6) anggota JPL itu mendapati bahawa pengusaha 'fun fair' berkenaan gagal mempamerkan permit pengoperasian yang sah. Satu (1) kompaun di bawah Seksyen 4 Ordinan Hiburan Awam 1958 bernilai RM3,000 telah dikeluarkan

kerana menjalankan aktiviti hiburan awam tanpa lesen.

Terdahulu, DBKK telah mengeluarkan notis kepada pengusaha untuk mengalihkan struktur dan semua logistik sebelum 29 Jun 2024. Walau bagaimanapun, hasil pemeriksaan susulan telah mendapati tiada tindakan diambil oleh pengusaha dan 'fun fair' masih beroperasi seperti biasa.

Semua pengusaha premis perniagaan dan hiburan di sekitar bandar raya adalah diingatkan untuk sentiasa mematuhi peraturan yang

dikuatkuasakan dan menjalankan operasi perniagaan mengikut prosedur yang betul.



DBKK LANCAR LAPORAN PELAKSANAAN, PEMANTAUAN, DAN PENILAIAN BAGI TINDAKAN PERUBAHAN IKLIM KOTA KINABALU 2024-2030

Dewan Bandaraya Kota Kinabalu (DBKK) telah melancarkan Laporan Pelaksanaan, Pemantauan, Dan Penilaian Bagi Tindakan Perubahan Iklim Kota Kinabalu 2024-2030, selari dengan Hala Tuju Sabah Maju Jaya dan Pelan KK 2035, pada 01 Julai 2024.

Majlis pelancaran telah disempurnakan oleh YB Datuk Abidin Madingkir, Pembantu Menteri Kepada Ketua Menteri merangkap Menteri Bertanggungjawab Kepada DBKK. Hadir sama adalah YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu; Tpr. Stanley Chong, Timbalan Setiausaha Tetap, Kementerian Kerajaan Tempatan dan Perumahan (KKTP) Sabah; Sr. Lifred Wong, Ketua Pengarah DBKK, Dr. Susan Pudim, Ketua Penolong Setiausaha Kanan, Pejabat Timbalan Setiausaha Kerajaan Negeri (Pentadbiran); Encik Abdul Manaf bin Rajikan, Timbalan Ketua Pengarah (Perancangan dan Pembangunan) DBKK merangkap Pengerusi Jawatankuasa Majlis Pelancaran Laporan Pelaksanaan, Pemantauan dan Penilaian Bagi Tindakan Perubahan Iklim Kota Kinabalu 2024-2030 dan KK Sustainable Urban Mobility Planning Workshop; Ahli-ahli Lembaga Penasihat dan Ketua-ketua Jabatan DBKK.

Pelancaran laporan ini dibuat bersempena bengkel Kota Kinabalu Sustainable Urban Mobility Planning (SUMP) anjuran Sustainable Urban Mobility in Metropolitan Regions (SMMR), yang berlangsung selama dua (2) hari, iaitu pada 27 hingga 28 Jun 2024.



Bengkel ini merupakan antara inisiatif yang tersenarai di bawah sektor pengangkutan, bertujuan untuk meningkatkan pengetahuan dan kemahiran pegawai bandar raya dan pihak berkepentingan lain untuk menyediakan pelan mobiliti bandar raya dengan berkesan. Peserta terdiri daripada anggota-anggota DBKK, wakil daripada agensi kerajaan berkaitan, pihak berkepentingan tempatan, Penasihat Teknikal Antarabangsa dari ASEAN-SMMR dan Grab Malaysia.

DBKK komited dalam menjalin kerjasama dengan pelbagai agensi, pihak berkepentingan, rakan kongsi utama dan ahli komuniti bagi memastikan pelaksanaan tindakan yang komprehensif.

PROGRAM BICARA EKSEKUTIF DBKK, "STRATEGY AND PLANNING IN DIGITAL WORLD" BERSAMA AZRAN OSMAN-RANI

Dewan Bandaraya Kota Kinabalu (DBKK) melalui Jabatan Penyelidikan dan Inovasi telah mengadakan Bicara Eksekutif DBKK yang bertujuan untuk memperkasa mutu kepimpinan kumpulan pengurusan DBKK, pada 22 Ogos 2024.

Dengan penampilan khas Encik Azran Osman-Rani, Ketua Pegawai Eksekutif dan Co-Founder Naluri, wadah ilmiah ini telah mengupas topik "Strategy and Planning in Digital World" dengan pembentangan segmen terkait "Digital Strategy Errors and Digital Strategy Opportunities".

Bicara Eksekutif ini juga telah membawa peserta untuk menekuni amalan pentadbiran dan pengurusan korporat yang terbaik demi pembangunan kualiti dan budaya kerjaya DBKK yang akhirnya akan disampaikan melalui perkhidmatan terbaik kepada Bandaraya Kota Kinabalu.

Sesi perkongsian ini telah dilancarkan oleh YBhg. Dato' Sri Dr. Hj. Sabin bin Samitah, *JP*, Mayor Bandaraya Kota Kinabalu dan dihadiri oleh kumpulan Pengurusan Tinggi, Ketua-ketua Jabatan dan pegawai kanan DBKK.

DBKK merakamkan penghargaan kepada Encik Azran Osman-Rani atas perkongsian berkualiti yang disampaikan. Semoga bertemu lagi di Kota Kinabalu, Bandaraya Peranginan Semulajadi.



PROGRAM LATIHAN TABLE TOP EXERCISE, LATIH KESIAPSIAGAAN AGENSI BARISAN HADAPAN DALAM MENGHADAPI BENCANA BANJIR DI KOTA KINABALU

Bagi memastikan kesiapsiagaan peserta barisan hadapan sentiasa berada pada tahap tertinggi, Angkatan Pertahanan Awam (APM) Daerah Kota Kinabalu dengan kerjasama Dewan Bandaraya Kota Kinabalu (DBKK) telah mengadakan Program Latihan Table Top Exercise (TTX) pada 02 Disember 2024.

Empat (4) objektif utama yang ingin dicapai menerusi program latihan ini ialah menguji pelan tindak balas bencana, meningkatkan kordinasi antara agensi, melatih pengurusan situasi bencana dan mengenal pasti risiko serta jurang tindakan yang diambil.

Program yang melibatkan seramai 45 peserta ini adalah terdiri daripada 15 jabatan dan agensi di bawah Jawatankuasa Pengurusan Bencana Daerah Kota Kinabalu. Ia merupakan sebahagian daripada persiapan awal dalam mendepani sebarang kemungkinan berlakunya bencana banjir di daerah ini, khususnya dalam musim Monsun Timur Laut (MLT).

Antara jabatan dan agensi yang terlibat ialah Polis Diraja Malaysia (PDRM), Jabatan Bomba dan Penyelamat Malaysia (JBPM) Negeri Sabah, Pejabat Kesihatan Daerah Kota Kinabalu, Jabatan Perkhidmatan Kebajikan Am (JPKA), Angkatan Tentera Malaysia (ATM), Jabatan Meteorologi (MET), Jabatan Penerangan Malaysia (JAPEN), Jabatan Kerja Raya (JKR), Jabatan Pengairan dan Saliran (JPS), Jabatan Sukarelawan Malaysia (RELA), Jabatan Mineral dan Geosains (JMG), Sabah Electricity dan Jabatan Air Negeri Sabah (JANS).



Hadir merasmikan majlis ialah YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu. Turut hadir ialah Sr. Lifred Wong, Ketua Pengarah, DBKK; Encik Karim Rahim, Timbalan Ketua Pengarah (Pembangunan Luar Bandar dan Penguatkuasaan), DBKK dan Encik Victor G. Kuasi, Timbalan Ketua Pengarah (Pengurusan Kewangan), DBKK.

Semoga sesi perkongsian melalui program ini dapat memperkukuh persiapan jabatan dan agensi dalam menghadapi bencana banjir di daerah ini. Tahniah kepada semua peserta!

BENGKEL PROJEK PENINGKATAN PEMBANGUNAN PANGKALAN DATA GIS DAN KAJIAN SEMULA 15 DRAF PELAN TEMPATAN KOTA KINABALU, SIRI 7

Dewan Bandaraya Kota Kinabalu telah menganjurkan sebanyak 7 siri Bengkel Projek Peningkatan Pembangunan Pangkalan Data GIS Dan Kajian Semula 15 Draf Pelan Tempatan Kota Kinabalu yang bertujuan untuk mengumpul data dan maklumat daripada pelbagai agensi Persekutuan dan Negeri serta badan-badan professional bagi mengemaskini dan memantapkan lagi kajian semula Pelan Tempatan Kota Kinabalu 2030. Siri pertama bengkel telah dirasmikan oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu pada 21 Mei 2024 bertempat di Sabah International Convention Centre (SICC).





BENGKEL

PEMURNIAN PIAWAIAN KEBERSIHAN DAN KETERATURAN SEKTOR OPERASI

Bengkel Pemurnian Piawaian Kebersihan dan Keteraturan Sektor Operasi anjuran Dewan Bandaraya Kota Kinabalu (DBKK) telah diadakan pada 16 Julai 2024. Ia bertujuan untuk membincangkan prosedur manual Piawaian Kebersihan dan Keteraturan Sektor Operasi yang telah dilancarkan pada 18 Jun 2024 lalu. Bengkel

yang diadakan selama satu (1) hari itu telah menyaksikan penyertaan 81 orang kakitangan DBKK dari pelbagai Jabatan di bawah Sektor Operasi yang diketuai oleh Encik Robert B. Lipon, Timbalan Ketua Pengarah (Operasi) DBKK.



PERSIJILAN ISO 211011:

BENGKEL AUDIT DALAM

Adventure Tourism Safety Management Systems (Kursus-Kursus Berjadual Untuk Pengauditan dan Pensijilan ISO 21101) diadakan pada Mei Hingga Julai 2024.

BENGKEL "SAFETY-FIRST PRIORITIZATION", TINGKATKAN KESEDARAN ASPEK KESELAMATAN DI TEMPAT KERJA

Seramai 30 orang kakitangan Dewan Bandaraya Kota Kinabalu (DBKK) telah menyertai bengkel "Safety-First Prioritization" yang diadakan di Pusat Pembelajaran Bandaraya Kota Kinabalu, Taman Kingfisher, pada 23 Julai 2024 (Selasa). Penganjuran bengkel ini selaras dengan meningkatkan kesedaran dalam kalangan kakitangan penjawat awam dalam mengutamakan aspek keselamatan sepanjang melaksanakan tanggungjawab. Bengkel yang berlangsung bermula jam 8 pagi hingga 4.30 petang itu menampilkan CWORKS Sabah Sdn. Bhd selaku penceramah. Bengkel ini terbahagi kepada empat sesi yang bertajuk "Risk & Consequence Tables By Industry", "Equipment Management Number (EM) and Decision-Making Risk Matrices", "Risk-Based Budget Management Control", dan "Computerised Maintenance Management System with Maintenance Prioritization Expert System".





BENGKEL PEMBENTANGAN HASIL GAP ANALYSIS PBTPay DAN Epbt 2.0:

MENJANA PERUBAHAN UNTUK PBT DI SABAH

Dewan Bandaraya Kota Kinabalu (DBKK) menjadi lokasi bagi Bengkel Pembentangan Hasil GAP Analysis PBTPay dan ePBT 2.0 yang berlangsung selama dua hari, bermula 10 hingga 11 September 2024, di Pusat Pembelajaran Bandaraya Kota Kinabalu, Kingfisher. Seramai 84 orang peserta telah menyertai bengkel ini yang bertujuan untuk membentangkan hasil dapatan daripada Kajian Lapangan Spesifikasi Teknikal dan Gap Analysis yang dilaksanakan di 14 Pihak Berkuasa

Tempatan (PBT) Sabah pada 19 hingga 22 Ogos lalu. Bengkel ini dimulakan dengan ucapan alu-aluan dan perasmian oleh Puan Faridah Giau, Timbalan Setiausaha Tetap II, Kementerian Kerajaan Tempatan dan Perumahan (KKTP) Sabah yang menekankan kepentingan menambah baik jurang dalam sistem sedia ada bagi memastikan pelaksanaan PBTPay dan ePBT 2.0 berjalan lancar.

KURSUS

PTM SIRI 2/2024

Seramai 60 orang kakitangan Dewan Bandaraya Kota Kinabalu (DBKK) telah menyertai Kursus Program Transformasi Minda (PTM) Siri 2/2024 yang diadakan di Pusat Pembelajaran Bandaraya Kota Kinabalu. Kursus yang berlangsung selama lima (5) hari bermula 05 hingga 09 Ogos 2024 ini berjalan dengan lancar dan telah menutup tirainya dengan kehadiran YBhg. Dr. Cleopatra @ Clare Asing, Pengarah Institut Latihan Sektor Awam Negeri (INSAN) Sabah dan disambut oleh Encik Abdul Mukti bin Haji Muchlish, Pengetua Akademi Pusat Pembelajaran Bandaraya, DBKK.



KURSUS

PENGURUSAN ASET DAN STOR YANG BERKESAN

Seramai 59 kakitangan Dewan Bandaraya Kota Kinabalu (DBKK) telah menyertai "Kursus Pengurusan Aset dan Stor yang Berkesan" yang berlangsung selama tiga (3) hari, bermula 07 hingga 09 Oktober bertempat di Akademi Pusat Pembelajaran Bandaraya, Taman Kingfisher Kota Kinabalu. Objektif penganjuran kursus ini adalah memahami mengenai dasar, arahan, peraturan dan panduan semasa kerajaan berkaitan pengurusan aset; meningkatkan kemahiran dalam mengurus aset dalam konteks pemakaian arahan dan peraturan semasa kerajaan; memahami sejauh mungkin konsep, prinsip dan tatacara berkesan dalam aktiviti menguruskan stor dan aset yang berkesan; menjadi lebih cekap, mahir dan produktif mengendalikan urusan pergerakan dan mengawal stok serta keselamatan rumah stor serta mengamalkan nilai-nilai penjimatan



kos dan peningkatan keuntungan melalui usaha-usaha mengurangkan pembaziran dan kawalan dengan lebih sistematik, cekap dan berkesan.

LATIHAN PENGURUSAN SISTEM KEWANGAN BERKOMPUTER

Seramai 38 kakitangan Dewan Bandaraya Kota Kinabalu (DBKK) telah menghadiri Taklimat Pengurusan Kewangan Ke Arah Kinerja Yang Cemerlang dan Progresif (Sesi 2) - Latihan Penggunaan Sistem Kewangan Berkomputer yang diadakan di Dewan Mesyuarat II, DBKK pada 13 November 2024. Objektif taklimat ini adalah untuk memberikan pengenalan dan pembelajaran berterusan berkaitan penggunaan sistem kewangan berkomputer DBKK, khususnya kepada kakitangan Jabatan Kewangan dan Belanjawan yang baharu dan kakitangan sedia ada.



TAKLIMAT PENGURUSAN KEWANGAN KE ARAH KINERJA YANG CEMERLANG DAN PROGRESIF (SESI 1), BERI PENDEDAHAN PENGURUSAN KEWANGAN KEPADA KAKITANGAN DBKK

Seramai 61 kakitangan Dewan Bandaraya Kota Kinabalu (DBKK) telah menghadiri Taklimat Pengurusan Kewangan Ke Arah Kinerja Yang Cemerlang dan Progresif (Sesi 1) yang diadakan di Dewan Mesyuarat II, DBKK pada 28 Oktober 2024. Objektif taklimat ini adalah untuk memberi pengenalan dan pembelajaran berterusan berkaitan pengurusan kewangan DBKK, khususnya kepada kakitangan Jabatan Kewangan dan Belanjawan yang baharu dan sedia ada.



KURSUS TATACARA PENGURUSAN FAIL DAN REKOD



Dewan Bandaraya Kota Kinabalu (DBKK) telah menganjurkan Kursus Tatacara Pengurusan Fail dan Rekod bertempat di Akademi Pusat Pembelajaran Bandaraya, di sini, pada 18 hingga 19 November lalu. Kursus yang berlangsung selama dua (2) hari ini telah dihadiri seramai 60 kakitangan DBKK daripada pelbagai

jabatan. Objektif penganjuran kursus ini adalah untuk memberi pendedahan secara komprehensif mengenai Konsep Pengurusan Rekod, Penyediaan Klasifikasi Sistem Fail 'Housekeeping' dan Fungsian, Amalan dan Prosedur Registri, Tugas dan Tanggungjawab Jawatankuasa Tadbir Urus Rekod dan Pelupusan Rekod.

DBKK, MCMC METERAI MoU ARAH PELAKSANAAN PROGRAM BANDAR PINTAR DI KOTA KINABALU

Dewan Bandaraya Kota Kinabalu (DBKK) bersama Suruhanjaya Komunikasi Multimedia Malaysia (MCMC) telah menandatangani Memorandum Persefahaman (MoU) sebagai simbolik kerjasama untuk memudah cara pelaksanaan program bandar pintar di kawasan Bandaraya Kota Kinabalu, dalam satu majlis yang diadakan di Sabah International Convention Centre (SICC), pada 03 Disember 2024.

Majlis menandatangani MoU ini telah disempurnakan oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu dan YBhg. Tan Sri Mohamad Salim bin Fateh Din, Pengerusi MCMC.

Momen penuh bersejarah ini turut disaksikan oleh YAB Datuk Seri Panglima Haji Hajiji bin Haji Noor, Ketua Menteri Sabah; YB Fahmi Fadzil, Menteri Komunikasi; YB Datuk Seri Panglima Sr. Haji Safar bin Untong, Setiausaha Kerajaan Negeri Sabah dan bersama YBhg. Datuk Mohamad Fauzi bin Md Isa, Ketua Setiausaha Kementerian Komunikasi.

YAB Ketua Menteri dalam satu kenyataan berkata, sebagai ibu negeri Sabah, Bandaraya Kota Kinabalu tidak sekadar menjadi pusat pentadbiran tetapi juga sebagai pusat ekonomi, pelancongan dan inovasi teknologi yang menjadi kebanggaan seluruh rakyat Sabah.

Jelas beliau, kerjasama yang terjalin di antara DBKK dan MCMC menerusi memorandum ini merupakan langkah besar dalam merealisasikan visi Sabah sebagai negeri yang memacu pembangunan mampan melalui digitalisasi.

Tambahnya, melalui MoU ini, pelaksanaan beberapa projek berskala besar akan dilakukan antaranya kesalinghubungan digital yang menyeluruh, aspek keselamatan awam dan infrastruktur pintar seperti pemasangan kamera litar tertutup (CCTV), digitalisasi



pentadbiran dan perkhidmatan bagi menjadikan pentadbiran lebih cekap, mengurangkan birokrasi serta budaya digital dan ekonomi tanpa tunai.

Enam (6) inisiatif utama yang bakal dilaksanakan termasuk mempertingkatkan keselamatan awam menerusi kamera pengawasan digital; mempelbagai perkhidmatan bandar raya yang boleh diakses secara dalam talian; mewujudkan lampu jalan pintar; menambahbaik liputan internet di seluruh kawasan Kota Kinabalu dalam menyokong perkhidmatan Digital Kerajaan Negeri Sabah; memperbanyak kempen kesedaran berkaitan 'cashless society' dan mentransformasikan Bandaraya Kota Kinabalu ke arah lebih progresif, inklusif serta mampan.

Turut hadir dalam majlis ini ialah YB Datuk Phoong Jin Zhe, Menteri Pembangunan, Perindustrian dan Keusahawanan Sabah; YB Datuk Abidin Madingkir, Pembantu Menteri Kepada Ketua Menteri Merangkap Menteri Yang Bertanggungjawab Kepada DBKK; YB Datuk Tan Lee Fatt, Pembantu Menteri Kewangan Negeri Sabah; YBhg. Dato' Seri Haji Rosli bin Isa, Setiausaha Persekutuan Sabah dan YBhg. Datuk Shahurinain bin Jais, Timbalan Pesuruhjaya Polis Sabah.

Semoga jalinan kolaborasi antara DBKK dan MCMC yang terjalin akan terus diperluas seiring usaha menjadikan Bandaraya Kota Kinabalu dalam kelompok 'World Class Cities'!





APLIKASI iBERSIH, KINI WARGA BANDARAYA KOTA KINABALU BOLEH MEMBUAT PESANAN PERKHIDMATAN PENGUTIPAN SISA PUKAL DAN SISA KEBUN SECARA DALAM TALIAN

Dewan Bandaraya Kota Kinabalu (DBKK) menerusi Jabatan Pengurusan Sisa Pepejal (JPSP) telah melancarkan aplikasi iBERSIH, selaras usaha mentransformasikan perkhidmatan pengutipan sisa pukal dan sisa kebun kepada perkhidmatan secara dalam talian.

Pelancaran aplikasi ini telah disempurnakan oleh YB Datuk Abidin Madingkir, *JP*, Pembantu Menteri kepada Ketua Menteri merangkap Menteri Yang Bertanggungjawab Kepada DBKK pada Majlis Penutupan Kempen "My City, My Responsibility" (MCMR) 2.0 Sempena Bulan Kebangsaan, pada 17 Ogos 2024.

Turut hadir YB Datuk Yong Teck Lee, Ahli Dewan Undangan Negeri (ADUN) Dilantik merangkap Penasihat Persidangan Ekonomi Cina Sabah; YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu; YBhg. Datin Sri Hajah Adreen Aderizza binti Mohamad Soffi, Pengerusi PUSPANITA Cawangan Bandaraya Kota Kinabalu; Sr. Lifred Wong, Ketua Pengarah DBKK; serta barisan Ahli Lembaga Penasihat DBKK dan Pengurusan Tinggi DBKK.

YB Datuk Abidin dalam ucapannya berkata, menerusi inisiatif ini, penduduk taman boleh membuat pesanan perkhidmatan DBKK secara atas talian tanpa perlu mengunjungi premis DBKK. Pesanan yang dibuat secara atas talian juga tidak memerlukan sebarang pelekat prabayar.

Tambahnya, nilai pembelian minimum perkhidmatan sisa pukal dan sisa kebun prabayar bagi pembelian secara atas talian adalah sebanyak RM10. Perkhidmatan

pengutipan yang ditempah secara atas talian atau menggunakan kupon pelekat prabayar akan dilaksanakan dalam tempoh tujuh (7) hari.

Warga Bandaraya Kota Kinabalu boleh memuat turun aplikasi iBERSIH secara percuma menerusi Google Play (Android) atau App Store (iOS) bermula 17 Ogos 2024.

Dalam pada itu, DBKK telah menerima sumbangan sebanyak 500,500 helai beg guna semula daripada Persidangan Ekonomi Cina Sabah, Green Buddy, Bataras Hypermarket, Servay Hypermarket, CKS Supermarket, 99 Speedmart dan Yu Sang Supermarket. Kesemua beg yang disumbangkan ini diagihkan kepada institusi-institusi pendidikan, pejabat-pejabat kerajaan dan kepada orang awam sebagai penghargaan atas sokongan padu terhadap Kempen 'Hari-Hari Bawa Beg Bah' yang dilancarkan pada 01 Ogos 2024.

Semoga penganjuran Kempen Kesedaran MCMR 2.0 dapat meningkatkan kesedaran masyarakat agar lebih bertanggungjawab dalam penjagaan kebersihan persekitaran, seiring usaha menjadikan Bandaraya Kota Kinabalu bersih, berdaya huni dan bebas sampah!



APLIKASI 'SABAH SMART PARKING' DILANCARKAN, SEIRING USAHA KE ARAH TRANSFORMASI PENDIGITALAN



Seiring usaha ke arah pembudayaan dan pembangunan pendigitalan dalam perkhidmatan tempat letak kereta di sekitar Bandaraya Kota Kinabalu, DBKK Holdings Sdn. Bhd. telah melancarkan aplikasi 'Sabah Smart Parking' yang berkuat kuasa di seluruh bandar raya mulai 16 Oktober 2024.

Hadir menyempurnakan majlis perasmian adalah YB Datuk Abidin Madingkir, *JP*, Pembantu Menteri Kepada Ketua Menteri merangkap Menteri Yang Bertanggungjawab kepada Dewan Bandaraya Kota Kinabalu (DBKK). Beliau diiringi oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu; Encik Karim Rahim, Timbalan Ketua Pengarah (Pembangunan Luar Bandar & Penguatkuasaan); Encik Victor Gerard Kuasi, Timbalan Ketua Pengarah (Kewangan), Tuan Jimon Jahim, Pengarah Eksekutif, DBKK Holdings Sdn. Bhd. dan Encik Sairullizam Haji Sukor, Pengarah Jabatan Perundangan, DBKK.

Dalam ucapannya, YB Datuk Abidin berkata, transformasi daripada penggunaan Sistem Letak Kereta Berkupon kepada Sistem Letak Kereta Digital merupakan satu pencapaian signifikan yang secara tidak langsung menyahut seruan atau aspirasi kerajaan Negeri yang menuju ke arah pembudayaan dan pembangunan pendigitalan di setiap perkhidmatan.

Tambah beliau, DBKK akan terus komited dalam memberikan perkhidmatan yang terbaik kepada masyarakat di bandar raya ini. Selain daripada penambahbaikan mutu perkhidmatan dalam pengurusan tempat letak kereta, penambahbaikan bagi kemudahan-kemudahan infrastruktur yang lain juga turut diberi perhatian.

Turut hadir menzahirkan sokongan sempena majlis pelancaran ini ialah Puan Faradillah Hj. Abdul Rani, Timbalan Ketua Pengarah (Khidmat Pengurusan); Unit Pemimpin Pembangunan Masyarakat (UPPM); Ketua-ketua Jabatan DBKK serta Ketua-ketua Bahagian DBKK Holdings Sdn. Bhd.

Seperti yang umum sedia maklum, aplikasi ini menggantikan Sistem Tempat Letak Kereta Berkupon sepenuhnya.

Tahniah kepada semua pihak yang terlibat dalam menjayakan Majlis Pelancaran Aplikasi 'Sabah Smart Parking'!



Yang Berhormat Datuk Abidin Madingkir, JP

Pembantu Menteri Kepada Ketua Menteri
Selaku Menteri Yang Bertanggungjawab Kepada DBKK



APLIKASI

i-SEWA DAN i-TEMPAH

Dengan termeterainya perjanjian di antara Dewan Bandaraya Kota Kinabalu (DBKK) bersama GoNet Holdings Sdn. Bhd., DBKK menjadi Pihak Berkuasa Tempatan (PBT) pertama di Sabah yang melancarkan perkhidmatan sewa dan tempahan kemudahan awam secara dalam talian, yang dikenali sebagai i-Sewa dan i-Tempah, pada 12 Disember 2024.

Hadir menyempurnakan majlis pelancaran adalah YB Datuk Abidin Madingkir, JP, Pembantu Menteri Kepada Ketua Menteri Sabah Selaku Menteri Yang Bertanggungjawab Kepada DBKK.

Majlis Menandatangani Perjanjian ini telah disempurnakan oleh YBhg. Dato' Sri Dr. Haji Sabin bin Samitah, JP, Mayor Bandaraya Kota Kinabalu mewakili DBKK dan Encik James Yong Chan Leong, Pengurus GoNet yang mewakili GoNet Holdings Sdn. Bhd. Ia turut disaksikan oleh Sr. Lifred Wong, Ketua Pengarah, DBKK dan YBhg. Datin Evelyn Anak John Ganjos, GoNet Holdings Sdn. Bhd.

YB Datuk Abidin dalam ucapannya berkata, langkah ini adalah permulaan kepada perubahan yang lebih besar. Jelasnya, dengan teknologi ini, rakyat bukan sahaja mendapat perkhidmatan yang lebih cekap, tetapi turut menikmati kemudahan yang menjimatkan masa dan kos.

Tambah YB Datuk Abidin, ia selaras dengan misi untuk memastikan kesejahteraan rakyat sentiasa menjadi keutamaan. Beliau yakin bahawa inisiatif ini akan menjadi pemangkin kepada lebih banyak inovasi di masa hadapan, selain menjadi bukti bahawa Sabah, khususnya Bandaraya Kota Kinabalu, mampu bersaing dengan bandar raya lain dalam era globalisasi ini.

Antara perkhidmatan yang ditawarkan adalah i-Tempah, iaitu penyewaan kemudahan awam seperti tempahan dewan dan padang secara dalam talian dan i-Sewa yang membolehkan penyewa membayar sewa dan fi pengurusan secara dalam talian. Antara kumpulan penyewa yang terlibat termasuklah penyewa di Taman Keramat, Taman Kurnia Jaya, PPR Kionsom (2025), Anjung Senja dan juga Anjung Perdana.

Turut hadir dalam majlis ini ialah YBhg. Datuk Sharifah Habsah binti Habib Alawi, Ahli Lembaga Penasihat DBKK; Timbalan-timbalan Ketua Pengarah dan Ketua-ketua Jabatan DBKK.

Semoga jalinan kerjasama ini dapat diperluas di masa akan datang, seiring visi dalam menjadikan Bandaraya Kota Kinabalu sebagai bandar raya pintar!



PROGRAM BERSAMA KOMUNITI KAMPUNG RUMINDING, **DBKK TEROKA POTENSI PEMBANGUNAN LUAR BANDAR**

YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu telah mengetuai lawatan kerja ke Kampung Ruminding, iaitu sebuah perkampungan berkeluasan 15 hektar di kawasan Inanam, Kota Kinabalu, pada 19 Ogos 2024.

Mula diduduki sekitar tahun 1964, Kampung Ruminding menjadi laman huni sejumlah 42 buah rumah dengan anggaran jumlah penduduk sekitar 200 orang, yang majoritinya adalah dari suku kaum Dusun. Kedudukannya yang indah di tepi sungai memegang potensi pembangunan pelancongan yang tinggi, di samping membangun fasiliti untuk kemudahan penduduk.

Dinamakan sempena susunan batu yang berbentuk dinding di tepi sungai, perjalanan ke Kampung Ruminding adalah sejauh 64 kilometer dari pusat bandar Kota Kinabalu dan mengambil masa selama dua (2) jam. Ketibaan Dato' Sri Mayor bersama rombongan Dewan Bandaraya Kota Kinabalu (DBKK) telah disambut mesra oleh Encik Singkun Ginsuab selaku Ketua Kampung Ruminding bersama penduduk kampung yang hadir dalam pertemuan bermakna ini.

Dato' Sri Mayor dalam ucapannya berkata, lawatan kerja ini bertujuan untuk mendekati dan mempererat hubungan bersama komuniti Kampung Ruminding di samping mengumpul maklumat profil kampung dalam usaha mengolah pendekatan menoktahkan kumpulan miskin tegar dalam kawasan Bandaraya Kota Kinabalu



dan seterusnya meneroka potensi pelancongan ke arah pembangunan ekonomi komuniti luar bandar.

DBKK turut memanfaatkan pertemuan ini dengan menyampaikan sumbangan ikhlas berupa 50 bantuan bakul makanan dengan kerjasama DBKK Holdings Sdn. Bhd., seraya mengedar borang permohonan pendaftaran eKasih bagi memudahkan penduduk membuat pendaftaran tanpa perlu ke pusat bandar.

Dato' Sri Mayor turut mengabadikan momen manis bersama penduduk kampung sambil santai menjamu buah-buahan hasil tanaman mereka seperti buah durian, rambutan dan langsung; yang ternyata bakal menjadi salah satu tarikan kepada pengunjung. Menyerikan lagi pengisian aktiviti dalam lawatan kerja ini adalah kunjungan Dato' Sri Mayor ke Sekolah Kebangsaan Ruminding, Inanam.

Turut hadir ialah YBhg. Datin Sri Hajah Adreen Aderizza binti Mohd. Soffi, Pengerusi PUSPANITA Cawangan Bandaraya Kota Kinabalu; Encik Karim bin Rahim, Timbalan Ketua Pengarah (Pembangunan Luar Bandar dan Penguatkuasaan) dan Ketua-ketua Jabatan DBKK yang terdiri daripada Encik Felix I. Malangig, Dr. Benedick Oliver Lidadun dan Encik Mohd. Hanif bin Abdullah.

DBKK, SHOPEE MALAYSIA ANJUR SESI TAKLIMAT **KEUSAHAWANAN SHOPEE BERSAMA KETUA ISI RUMAH**

Dewan Bandaraya Kota Kinabalu (DBKK) menerusi Jabatan Pengurusan Luar Bandar dengan kerjasama SHOPEE Malaysia telah mengadakan Sesi Taklimat Keusahawanan SHOPEE Bersama Ketua Isi Rumah (KIR) Fasa 2 Bagi Kawasan DUN Bandaraya Kota Kinabalu di Dewan Kampung Soraya Malawa, Karambunai pada 30 November 2024.

Taklimat ini adalah satu usaha dalam meningkatkan pendapatan dalam talian seiring Matlamat Pembangunan Lestari (SDG) 8 iaitu "Pekerjaan Yang Baik dan Pertumbuhan Ekonomi", yang menekankan kepentingan mencipta pekerjaan yang layak, meningkatkan produktiviti ekonomi inklusif dan mampan.

Program yang mensasarkan komuniti di bawah kumpulan B40 ini telah dirasmikan oleh YBhg. Datuk Haji Arshad Idris, Ahli Lembaga Penasihat DBKK (Usahawan Karambunai). Beliau dalam ucapannya berkata, platform program seumpama ini adalah penting ke arah menjana pendapatan komuniti sekali gus meningkatkan kualiti kehidupan keluarga mereka.

Taklimat ini merangkumi dua (2) sesi iaitu Sesi Workshop SHOPEE dan Sesi Demo SHOPEE.

Turut hadir dalam program ini ialah Encik Nerudin Ludah, Pemimpin Pembangunan Masyarakat N.16 Karambunai dan Encik Alex Tan, Pemimpin Pembangunan Masyarakat N.19 Likas.

Semoga Sesi Taklimat Keusahawanan SHOPEE Malaysia ini dapat dimanfaatkan sepenuhnya dan mencapai objektif yang disasarkan.



KERJASAMA ERAT DBKK, UMS JAYAKAN PROGRAM LATIHAN SEMPENA SAMBUTAN HARI LESTARI SEDUNIA DAN HARI PELANCONGAN SEDUNIA

Jabatan Pelancongan dan Kesejahteraan Masyarakat, Dewan Bandaraya Kota Kinabalu (DBKK) dan Pusat Eco-Campus, Universiti Malaysia Sabah (UMS) telah menganjurkan UMS Sustainability Enhancement Training Program bersempena World Sustainability Day & World Tourism Day di De'Sireh, Chancellery and Borneensis Gallery, Institute of Tropical Biology and Conservation, UMS, pada 16 Oktober 2024.

Majlis yang dirasmikan oleh Professor Datuk Dr. Hj. Kasim Hj. Md. Mansur, Naib Canselor UMS ini bertujuan untuk memberi peringatan kepada orang ramai akan kepentingan dan kaedah penjagaan alam sekitar.

Sekitar 50 peserta yang terdiri daripada pelajar UMS, alumni UMS, ahli PUSPANITA Cawangan Bandaraya Kota Kinabalu serta komuniti Pelancongan Berasaskan Komuniti, DBKK telah menghadiri dan mengambil bahagian dalam program ini.

Sepanjang program berlangsung, para peserta berpeluang untuk menyertai sesi taklimat berkaitan alam sekitar, sosial dan tatakelola (ESG), melawat ke



Galeri Borneensis dan pameran Citra Kasih, serta mengambil bahagian dalam demonstrasi penghasilan kraftangan Citra Kasih.

Hadir sama, menzahirkan sokongan terhadap program ini, Datin Sri Hajah Adreen Aderizza binti Mohamad Soffi, isteri Mayor Bandaraya Kota Kinabalu.

BENGKEL "THE ART OF STORYTELLING AND NARRATIVE", PERKASA KEMAHIRAN DAN KEBOLEHPASARAN CBT BAWAH SELIAAN DBKK

Seramai 21 wakil program Pelancongan Berasaskan Komuniti (CBT) telah menyertai Bengkel "The Art of Storytelling and Narrative" anjuran Jabatan Pelancongan dan Kesejahteraan Masyarakat, Dewan Bandaraya Kota Kinabalu (DBKK) yang telah diadakan pada 25 hingga 27 Oktober 2024 di Ibis Styles Kota Kinabalu, Inanam.

Bengkel yang berlangsung selama tiga (3) hari itu telah disertai oleh wakil daripada Homestay Desa Cinta Kobuni, Homestay Darau Wetland Eco Tourism, Homestay Id Pogimpaan dan Pusat Pelancongan Edu-Tourism Kolosunan.

Objektif penganjuran bengkel ini adalah untuk melahirkan bakal pemandu pelancong setempat di CBT yang bersifat profesional, berpengetahuan, berkemahiran dan terlatih dalam aktiviti pemanduan pelancong. Selain itu, ia juga diharap dapat meningkatkan kemahiran komuniti dengan cara menggunakan penceritaan dalam aktiviti pelancongan bagi meningkatkan kesan komunikasi dan keupayaan



dalam menyaran, mempengaruhi dan memberi inspirasi serta imaginasi kepada para pelancong.

Menerusi bengkel ini, para peserta telah mempelajari teknik komuniti dengan menggunakan kaedah penceritaan dan naratif, struktur dan elemen penceritaan serta kekuasaan penceritaan. Selain itu, mereka turut berpeluang untuk mempelajari asas-asas penyuntingan video penceritaan menggunakan aplikasi CapCut.

Semoga para peserta dapat mengaplikasikan teknik-teknik penceritaan yang dikongsikan dalam usaha untuk mempromosikan pusat pelancongan berasaskan komuniti masing-masing, seterusnya membangunkan CBT di sekitar Bandaraya Kota Kinabalu.

Tahniah diucapkan kepada semua peserta!



MAJLIS MENANDATANGANI LETTER OF INTENT (LOI) ANTARA UMS, DBKK, DARAU WETLAND ECO TOURISM DAN HOMESTAY DESA CINTA KOBUNI

Dewan Bandaraya Kota Kinabalu (DBKK), Universiti Malaysia Sabah (UMS) bersama komuniti Darau Wetland Eco Tourism dan Homestay Desa Cinta Kobuni telah menandatangani Letter of Intent (LOI) bersempena program 'Sustainable Tourism Living Lab: Innovation and Engagement', dalam satu majlis di Ibis Styles Kota Kinabalu, Inanam, pada 25 Oktober 2024.

Majlis menandatangani LOI ini telah disempurnakan oleh Sr. Lifred Wong, Ketua Pengarah DBKK yang mewakili YBhg. Dato' Sri Dr. Haji Sabin bin Samitah, JP, Mayor Bandaraya Kota Kinabalu dan Profesor Madya Dr. Mohd. Rahimie Abd. Karim, Dekan Fakulti Perniagaan, Ekonomi dan Perakaunan, UMS.

Dato' Sri Mayor dalam ucapannya berkata, Program DBKK-UMS Sustainable Tourism Living Lab: Innovation & Engagement ini merupakan inisiatif penting yang bertujuan untuk mengintegrasikan inovasi dalam pembangunan pelancongan mampan di kawasan luar bandar dengan melibatkan komuniti secara langsung.

Jelas beliau, program ini tidak hanya memberi impak kepada peningkatan pelancongan tempatan, tetapi juga menyumbang kepada peningkatan ekonomi komuniti melalui pengukuhan aktiviti ekonomi, penjana pendapatan serta pemasaran produk pelancongan.

Bersempena program ini juga, Kursus Kemahiran "The Art of Storytelling & Narrative in Community-Based Tourism" juga telah diadakan bermula 25 hingga 27 Oktober 2024 anjuran DBKK dengan kerjasama Kementerian Pelancongan, Kebudayaan dan Alam Sekitar (KePKAS) Sabah, bertujuan untuk meningkatkan kemahiran komunikasi komuniti dalam penyampaian informasi produk dan aktiviti pelancongan, kebudayaan, dan warisan.

Turut hadir menzahirkan sokongan terhadap majlis ini adalah Profesor Madya Dr. Fiffy Hanisdah binti Saikim, Pengarah Institut Biologi Tropika dan Pemuliharaan, UMS; Datuk Haji Alsar bin Edris @ Arsad Arshad Idris, Ahli Lembaga Penasihat DBKK; Encik Abdul Rahman bin Omar, Pengarah Perbadanan Kemajuan Kraftangan Malaysia Cawangan Negeri Sabah; Encik Nickho Unui, CDO Kawasan DUN N.18 Inanam; Ketua-ketua Jabatan DBKK dan Pengerusi-pengerusi Koperasi Komuniti Homestay Desa Cinta Kobuni dan Komuniti Darau Berhad iaitu Encik Aji Rombuton dan Encik Mohd. Farris bin Mohd. Fikri, Pengerusi Koperasi Komuniti Darau Berhad.

Semoga kerjasama erat antara DBKK, UMS, dan komuniti menjadi pemangkin kepada pembangunan mampan yang inklusif, sekali gus meningkatkan taraf hidup masyarakat melalui sektor pelancongan yang berdaya saing dan lestari.



HOMESTAY DESA CINTA KOBUNI TERIMA LAWATAN PENANDAARASAN MPWPL, **BERI PELUANG NIKMATI KEINDAHAN DAN AKTIVITI DI KAMPUNG**

Seramai 36 wakil yang terdiri daripada Pengerusi dan Ahli Jawatankuasa Majlis Perwakilan Penduduk Persekutuan Labuan, dan pegawai serta staf Perbadanan Labuan telah mengadakan lawatan penandaarasan ke Homestay Desa Cinta Kobuni pada 24 November 2024.

Rombongan ini diketuai oleh Puan Jahmurniwaty binti Markum, Penolong Pengarah Kanan, Unit Pembangunan dan Komuniti, Perbadanan Labuan. Tujuan lawatan ni adalah untuk berkongsi maklumat, pengetahuan dan memberi pendedahan kepada peserta yang terlibat.

Tirai lawatan dibuka dengan paluan gong sambut tamu oleh peserta Citra Kasih-Warisan Kebudayaan yang terdiri daripada kanak-kanak berumur antara 9 tahun hingga 12 tahun.



Acara diteruskan dengan perkongsian berkaitan Program Pembangunan Pelancongan Berasaskan Komuniti, Dewan Bandaraya Kota Kinabalu (DBKK), iaitu Program Inisiatif Pembangunan Pelancongan Berasaskan Komuniti (IMPAK) dan Program Citra Kasih yang disampaikan oleh Puan Fauziahton Ag. Samad, Pengarah Jabatan Pelancongan dan Kesejahteraan Masyarakat, DBKK.

Bagi memberi peluang kepada rombongan lawatan untuk merasai sendiri pengalaman melakukan aktiviti di homestay, mereka telah dibawa oleh Puan Emalia Rabin



selaku Penyelaras Homestay untuk menikmati pengalaman Pakej Mansau Ansau atau Keliling Kampung yang juga merupakan pakej yang paling popular ditawarkan.

Sepanjang pakej ini, pelawat mendapat pengalaman dan menikmati sendiri suasana kampung, aktiviti kebudayaan serta makanan tradisi kampung, terutamanya makanan tradisi masyarakat Dusun seperti penyediaan kueh Nurut atau pais ubi kayu yang diparut, membungkus nasi linapot dan Monginggit atau mencuba mengunyah sireh bersama kapur.

Selain daripada itu, peserta juga berpeluang untuk membuat kraftangan Citra Kasih yang terdiri daripada bahan kitar semula seperti membuat kertas 'Plantable Seed Paper' dan bahan aksesori daripada wayar terpakai.

Sebelum mengakhiri lawatan, telah berlangsung penyampaian cenderamata daripada Puan Jahmurniwaty kepada Encik Aji Rombuton, Ketua Kampung Kg. Kobuni sebagai tanda penghargaan atas hospitaliti sepanjang lawatan.



PROGRAM CITRA KASIH 2024, **PERKASA KOMUNITI LUAR BANDAR**

Pameran kraftangan oleh Komuniti Darau Wetland dan Kobuni di Sabah International Convention Centre (SICC), Kota Kinabalu, Sabah pada 11 – 13 Oktober 2024.

OPERASI BERSEPADU PEMANTAUAN BUAYA, KESAN KEHADIRAN BUAYA DI SUNGAI DARAU, SUNGAI BERHAMPIRAN BENGKEL DEPOH, DBKK

Hasil pelaksanaan operasi bersepadu pemantauan buaya di sekitar Bandaraya Kota Kinabalu pada 19 dan 20 Ogos 2024 telah berjaya mengesan dua (2) lokasi yang mempunyai kehadiran populasi buaya iaitu di Sungai Darau dan sungai berhampiran Bengkel Depoh, Dewan Bandaraya Kota Kinabalu (DBKK).

Pemantauan bot rondaan dan dron telah merumuskan jumlah populasi buaya di Bandaraya Kota Kinabalu adalah terkawal. Bagaimanapun, operasi susulan akan diadakan pada setiap suku tahunan bagi memantau populasi buaya sekitar bandar raya.

Operasi selama dua (2) hari ini melibatkan seramai 65 anggota daripada Jawatankuasa Pengurusan Ancaman Buaya yang dianggotai oleh DBKK, Jabatan Hidupan Liar (JHL), Polis Diraja Malaysia (PDRM), Jabatan Bomba dan Penyelamat Malaysia (JBPM) Sabah, Angkatan Pertahanan Awam Malaysia (APM), Polis Marin, Tentera Laut Diraja Malaysia (TLDM) dan Taman-Taman Sabah.

Operasi dijalankan bermula 8 pagi hingga 10 malam dan berpusat Jeti Taman Cycleway Phase 3 berhadapan Kompleks Pentadbiran Kerajaan Persekutuan Sabah



selain turut meliputi kawasan Taman Awam Teluk Likas I, Sungai Darau-Kalansanan dan Bengkel Depoh, DBKK.

Operasi ini merupakan langkah proaktif yang diambil untuk memastikan keselamatan dan kesejahteraan penduduk daripada ancaman hidupan liar.

KERJA-KERJA KUTIPAN DATA BAGI

KAJIAN PENILAIAN TAHAP KEPUASAN HATI PELANCONG DBKK 2024



Jabatan Pelancongan dan Kesejahteraan Masyarakat, dengan kerjasama Jabatan Penyelidikan dan Inovasi, Dewan Bandaraya Kota Kinabalu (DBKK) dalam usaha untuk mendapatkan input pelancong melalui maklum balas daripada Kajian Penilaian Tahap Kepuasan Hati Pelancong DBKK 2024.

Kajian ini diadakan untuk memenuhi KPI Pelan Strategik Pelancongan Bandaraya Kota Kinabalu Sabah Tahun 2022-2026 dan keperluan dalam ASEAN Clean Tourist City Standard.

Objektif kajian ini adalah bagi mengenal pasti ciri-ciri perjalanan pelancong, faktor-faktor yang mempengaruhi tahap kepuasan hati pelancong serta menganalisis tahap kepuasan hati pelancong secara keseluruhan terhadap perkhidmatan pelancongan di sekitar Bandaraya Kota Kinabalu.

Tempoh pengumpulan data berlangsung selama tujuh (7) hari, bermula 13 hingga 24 September 2024 dengan meliputi kawasan-kawasan seperti Muzium Sabah, Lapangan Terbang Antarabangsa Kota Kinabalu (KKIA), Pasar Besar KK, Jalan Gaya, Jeti Jesselton, pusat beli belah dan kawasan-kawasan tumpuan pelancong di sekitar Bandaraya Kota Kinabalu. Khidmat enam (6) orang pemungut data telah digunakan bagi membantu menjayakan kajian ini.

Maklumat yang dikumpulkan akan digunakan untuk meningkatkan lagi perkhidmatan sedia ada, di samping menambah baik pengalaman serta keperluan pelancong yang berkunjung ke bandar raya ini di masa akan datang.

Terima kasih kepada semua yang terlibat dalam menjayakan kajian ini.



DBKK CYCLING TEAM (DCT), KBSS JAYAKAN ACARA BERBASIKAL PROGRAM AMAZING YOUTH RACE SEMPENA HARI KEBANGSAAN PERINGKAT NEGERI SABAH TAHUN 2024

Seramai 141 penggemar sukan berbasikal telah menyertai acara Kayuhan Berbasikal Merdeka bagi Program Amazing Youth Race yang diadakan sempena Hari Kebangsaan Peringkat Negeri Sabah Tahun 2024, di Kadazan-Dusun Cultural Association (KDCA), Penampang pada 10 Ogos 2024.

Dalam program anjuran Kementerian Belia dan Sukan Sabah (KBSS) ini, DBKK Cycling Team telah mengetuai pengurusan teknikal dan marshall bagi memastikan ia berjalan dengan lancar, selamat dan teratur.

Acara pelepasan sejauh 16KM telah dimulakan seawal 7 pagi dan disempurnakan oleh Encik Adanan Atin, Timbalan Setiausaha Tetap KBSS (Bahagian Sukan). Turut hadir ialah Encik Charles William Dabbi, Timbalan Setiausaha Tetap KBSS (Bahagian Belia) dan Encik Robert Malangkig, Setiausaha Majlis Perbandaran Penampang.

Hubungan kerjasama strategik yang terjalin menerusi pelaksanaan acara ini dilihat mampu menyemarakkan lagi semangat patriotik terhadap negara dalam kalangan belia tempatan, selain mengamalkan gaya hidup sihat menerusi sukan berbasikal.



PASUKAN DBKK, **JUARA KEJOHANAN FUTSAL KPJ MERDEKA 2024**

Gelanggang Futsal Yayasan Sabah bergema dengan sorakan ketika Kejohanan Futsal KPJ Merdeka 2024 melabuhkan tirainya pada 08 September 2024. Dianjurkan oleh KPJ Sabah Specialist Hospital, kejohanan ini menyaksikan persaingan sengit antara 20 pasukan dari pelbagai organisasi, termasuk Dewan Bandaraya Kota Kinabalu (DBKK) yang tidak ketinggalan untuk mengambil bahagian.

Pasukan DBKK telah tampil sebagai johan apabila berjaya menewaskan pasukan BSN. Sementara itu, Jabatan Pendidikan Negeri menduduki tempat ketiga setelah memberikan cabaran yang hebat.

Kejayaan DBKK di bawah Encik Ag. Azmee Ag. Kati selaku pengurus pasukan itu turut diserikan dengan prestasi Mohd. Syahrulizam Ag. Hassan dari Jabatan Penguatkuasaan, DBKK yang telah dinobatkan sebagai Penjaring Terbanyak, manakala rakan sepasukannya, Ahzar Aris, dianugerahkan Pemain Terbaik.

Majlis penyampaian hadiah telah disempurnakan oleh Pengurus Besar KPJ Sabah Specialist Hospital, Encik Mohamad Faizal bin Mohamed.

Tahniah kepada semua pemenang!



DBKK SHUTTLERS, JABATAN BOMBA SABAH ANJUR **PERLAWANAN PERSAHABATAN BADMINTON**

Telah berlangsung perlawanan badminton persahabatan di antara DBKK Shuttlers dan pasukan badminton daripada Jabatan Bomba dan Penyelamat Malaysia (JBPM) Negeri Sabah pada 30 Julai 2024.

Keputusan rasmi pertandingan menyaksikan DBKK Shuttlers telah menang dengan lapan kemenangan berbalas dua dan dua perlawanan lagi berakhir dengan seri.

Penganjuran perlawanan persahabatan ini merupakan antara pengisian dalam siri latihan pasukan Bomba Sabah yang sedang dalam persiapan sempena



Kejohanan Badminton Jabatan Bomba seluruh Malaysia, yang berlangsung di Kedah pada pertengahan Ogos 2024.

Selamat maju jaya diucapkan kepada pasukan badminton Bomba Sabah!

Majlis Pelancaran Kelab Berbasikal Borneo Angels



BORNEO ANGELS, KELAB BERBASIKAL WANITA PERTAMA DBKK DI BAWAH PUSPANITA CBKK

Ke arah menggalakkan lebih ramai kakitangan wanita DBKK untuk bergiat aktif dalam sukan, PUSPANITA Cawangan Bandaraya Kota Kinabalu (CBKK) telah menubuhkan Borneo Angels, iaitu kelab berbasikal wanita DBKK.

Penubuhan kelab sukan berbasikal itu merupakan hasil cetusan idea YBhg. Datin Sri Hajah Adreen Aderizza binti Mohamad Soffi, Pengerusi PUSPANITA CBKK yang bertujuan untuk menarik minat kaum wanita menceburi aktiviti berbasikal dan seterusnya meningkatkan tahap kesihatan fizikal, mental selain mewujudkan semangat setia kawan dalam kalangan ahli.

Majlis Pelancaran Borneo Angels telah dilancarkan oleh YBhg. Dato' Sri Dr. Haji Sabin bin Samith, JP, Mayor Bandaraya Kota Kinabalu pada 23 Ogos 2024. Turut hadir ialah Sr. Lifred Wong, Ketua Pengarah, DBKK bersama kumpulan Pengurusan Tinggi DBKK yang lain.

Komited untuk kekal bergiat aktif selepas ini, Borneo Angels dijadualkan untuk turut serta dalam acara "Ride For Awareness" anjuran Kinabalu Pink Ribbon yang diadakan pada bulan Oktober 2024 dan program Kayuhan Labuan.

PUSPANITA CAWANGAN BANDARAYA KOTA KINABALU SEMARAKKAN MAJLIS BACAAN YASIN DAN SELAWAT BERSEMPENA **PROGRAM MAULIDUR RASUL SAW 1446H/2024M PADA 20 SEPTEMBER 2024**

PUSPANITA Cawangan Bandaraya Kota Kinabalu (CBKK) telah mengadakan Majlis Bacaan Yasin dan Selawat bersempena Program Maulidur Rasul SAW 1446H/2024M pada 20 September 2024.

Majlis yang diadakan dengan kerjasama Dewan Bandaraya Kota Kinabalu (DBKK) ini telah disempurnakan oleh YBhg. Datin Sri Hajah Adreen Aderizza binti Mohamad Soffi, Pengerusi PUSPANITA CBKK.

Tirai majlis telah dibuka dengan alunan Zikir Asmaul Husna dan persembahan qasidah oleh pelajar Miftahul Ulum, dan kemudiannya diteruskan dengan bacaan ayat suci Al-Quran oleh Hafizah dari Miftahul Ulum Tanjung Aru. Tetamu undangan turut bersama-sama menyempurnakan solat berjemaah, bacaan Surah Yasin dan selawat ke atas junjungan besar Nabi Muhammad SAW sebelum diakhiri dengan doa yang memohon agar amal ibadah diterima Allah SWT.

Sumbangan kepada mangsa yang terjejas oleh bencana banjir turut disampaikan kepada Surau Kg. Tobur dan Pusat Tahfiz Miftahul Ulum Tanjung Aru.

Turut hadir memeriahkan majlis ialah Puan Faradillah binti Haji Abdul Rani, Timbalan Ketua Pengarah (Khidmat Pengurusan) DBKK, Ketua-ketua Jabatan wanita DBKK serta ahli-ahli PUSPANITA CBKK.

Semoga majlis ini mampu memupuk rasa cinta kepada Rasulullah SAW dan memperkukuh silaturahmi sesama kakitangan.





PINK RIBBON CHARITY RIDE BERLANGSUNG DENGAN JAYANYA, TINGKATKAN KESEDARAN MASYARAKAT BERKAITAN KANSER PAYUDARA

Seramai 370 peserta telah menyertai program 'Pink Ribbon Charity Ride' bersempena Bulan Kesedaran Kanser Payudara yang bukan hanya sekadar acara riadah, tetapi juga merupakan inisiatif penting dalam meningkatkan kesedaran masyarakat berkaitan kanser ini.

Program anjuran Borneo Angels PUSPANITA Cawangan Bandaraya Kota Kinabalu (CBKK) dengan kerjasama erat Dewan Bandaraya Kota Kinabalu (DBKK) ini telah berlangsung penuh meriah di Padang Merdeka Kota Kinabalu pada 20 Oktober 2024.

Acara pelepasan peserta berbasikal telah disempurnakan oleh YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu seawal jam 6.40 pagi, yang merangkumi Kategori 50KM dan 12KM. Mendahului rombongan berbasikal adalah YBhg. Datin Sri Hajah Adreen Aderizza binti Mohamad Soffi, isteri kepada Mayor Bandaraya Kota Kinabalu yang juga Pengerusi PUSPANITA Cawangan Bandaraya Kota Kinabalu.

Para peserta yang mengambil bahagian dalam kayuhan amal sejauh 50 kilometer ini telah menggunakan laluan yang membawa mereka merentasi beberapa lokasi ikonik di sekitar Bandaraya Kota Kinabalu.

Bersempena majlis ini, Dato' Sri Mayor turut telah menyampaikan sumbangan kepada Pink Ribbon Centre di Hospital Queen Elizabeth II yang diwakili oleh Dr. Siti Zubaidah dan kepada Sabah Kinabalu Pink Ribbon yang diwakili oleh Puan Yvonne Dumpangol selaku Naib Presiden serta Puan Annie Chin selaku Pengurus Kanan.

Dato' Sri Mayor dalam ucapannya berkata, kedua-dua organisasi ini memainkan peranan yang signifikan dalam memberikan sokongan moral dan fizikal kepada pesakit kanser payudara serta memperjuangkan kesedaran tentang kanser ini dalam kalangan masyarakat.

Tambah beliau, sumbangan yang disampaikan ini diharap dapat membantu usaha murni mereka dan memastikan agar perjuangan ini dapat diteruskan dengan lebih berkesan dan meluas di masa akan datang.

Selain acara utama, orang ramai yang hadir turut berpeluang untuk mengambil bahagian dalam pelbagai pengisian menarik seperti senamrobik, aktiviti memanah dan 'Free Market'.

Semoga program 'Pink Ribbon Charity Ride' terus menjadi platform untuk mendidik masyarakat mengenai kepentingan penjagaan kesihatan.





KUNJUNGAN HORMAT PUSPANITA CBKK KE TASKA SRI KANDI LHDN SABAH, **KE ARAH MEREALISASIKAN PUSAT JAGAAN KANAK-KANAK DBKK**

PUSPANITA Cawangan Bandaraya Kota Kinabalu (CBKK) telah mengadakan kunjungan hormat ke Taska Sri Kandi Lembaga Hasil Dalam Negeri (LHDN) Sabah pada 19 November (Selasa).

Ketibaan YBhg. Datin Sri Hajah Adreen Aderizza binti Mohamad Soffi, Pengerusi PUSPANITA CBKK telah disambut mesra oleh YBhg. Datin Dayang Halimah binti Awang Ahmad, Pengerusi PUSPANITA dan Sri Kandi LHDNM Sabah.

Tujuan utama kunjungan hormat ini adalah untuk meninjau serta menimba pengalaman berkenaan tadbir urus Taska Sri Kandi LHDNM Sabah.

Usaha ini selaras dengan hasrat Dewan Bandaraya Kota Kinabalu (DBKK) untuk menubuhkan pusat penjagaan kanak-kanak sebagai kemudahan kakitangan DBKK selain dapat memberikan penjagaan dan perkembangan minda yang berkualiti dalam kalangan kanak-kanak.

PUSPANITA CBKK dengan kerjasama Jabatan Penyelidikan dan Inovasi, DBKK kini sedang menyediakan kertas kerja cadangan untuk penubuhan Pusat Jagaan Kanak-kanak DBKK untuk dibentangkan kepada Pengurusan Tertinggi DBKK.

Hadir sama dalam kunjungan ini ialah Puan Faradillah Hj. Abdul Rani, Timbalan Ketua Pengarah (Khidmat Pengurusan) DBKK; Datin Rahimah binti Ahmad, Pengurus Sunshine Master Care Sdn. Bhd. dan Puan Nur Aini Abdul Rahim, Pengurus Taska Sri Kandi Hasil Kota Kinabalu.

Untuk rekod, Taska Sri Kandi LHDN Sabah telah mula beroperasi pada 01 Jun 2021 dan diusahakan oleh operator Sunshine Master Care Sdn. Bhd. Setakat tahun 2024, seramai 56 kanak-kanak berdaftar di bawah jagaan mereka.

Semoga perkongsian ilmu ini dapat membantu ke arah merealisasikan penubuhan Pusat Jagaan Kanak-kanak DBKK.



CHRISTMAS @ KK SENTRAL RIVERSIDE MARKET

Christmas @ KK Sentral Riverside Market yang berlangsung dari 20 hingga 22 Disember 2024 di pekarangan KK Sentral disambut dengan penuh kemeriahan. Acara ini bukan sahaja menampilkan hiburan dan jualan, tetapi turut membawa keceriaan kepada komuniti melalui sumbangan kebajikan sempena musim perayaan.

Pada 20 Disember, PUSPANITA Cawangan Bandaraya Kota Kinabalu (CBKK) telah mengadakan program kebajikan yang disempurnakan oleh Pengerusinya, YBhg. Datin Sri Hajah Adreen Aderizza binti Mohamad Soffi. Beliau telah menyampaikan sumbangan kepada dua pusat kebajikan, iaitu Bethany Home dan Pusat Jagaan Woori JIB St. Francis Xavier. Acara ini turut diserikan dengan nyanyian karol oleh penghuni Pusat Jagaan Woori JIB St. Francis Xavier serta pelbagai aktiviti sampingan, termasuk persembahan busker dan pembukaan gerai jualan hasil kraftangan artisan tempatan, flea market, jualan makanan, baja, dan pembelian minyak terpakai.

Pada malam yang sama, penampilan Kereta Berhias Krismas dan nyanyian koir daripada SIB Oasis Inanam menambahkan lagi kemeriahan. Majlis turut diserikan dengan kehadiran YBhg. Dato' Sri Dr. Haji Sabin bin Samitah, *JP*, Mayor Bandaraya Kota Kinabalu, bersama isteri, YBhg. Datin Sri Hajah Adreen Aderizza binti Mohamad Soffi. Para hadirin juga berpeluang menyertai sesi cabutan bertuah sebelum Dato' Sri Mayor meluangkan masa melawat gerai-gerai jualan dan pameran sambil beramah mesra bersama pengunjung.

Turut hadir dalam majlis ini ialah Sr. Lifred Wong, Ketua Pengarah DBKK; Encik Robert Lipon, Timbalan Ketua Pengarah (Operasi), DBKK; Encik Karim Rahim, Timbalan Ketua Pengarah (Pembangunan Luar Bandar & Penguatkuasaan), DBKK; serta Encik Jimon Jahim, Pengarah Eksekutif DBKK Holdings Sdn. Bhd. bersama Ketua-ketua Jabatan DBKK.

22
JUL
2024

PUSPANITA CAWANGAN BANDARAYA KOTA KINABALU SERAH BANTUAN KEPADA ANGGOTA DBKK TERJEJAS BANJIR



Majlis Penyerahan Sumbangan Bencana Banjir PUSPANITA CBKK kepada anggota DBKK terjejas banjir.

1
OGS
2024

SENAMROBIK MERDEKA ANJURAN PUSPANITA CAWANGAN BANDARAYA KOTA KINABALU MERIAHKAN SAMBUTAN BULAN KEBANGSAAN



Senamrobik merdeka anjuran PUSPANITA Cawangan Bandaraya Kota Kinabalu meriahkan Sambutan Bulan Kebangsaan.

12
OGS
2024

AKTIVITI LAIN-LAIN



Lawatan sosial (sambil belajar) PUSPANITA Cawangan Bandaraya Kota Kinabalu ke Jabatan Pertanian Tuaran.

JASAMU DIKENANG



ABDUL MANAF RAJIKAN

Tarikh Pelantikan	01/11/1991	Tarikh Bersara	10/07/2024
Tempoh Perkhidmatan	33 Tahun		
Jawatan	Timbalan Ketua Pengarah Pegawai Tadbir NA54		
Jabatan	Timbalan Ketua Pengarah Sektor Perancangan dan Pembangunan		



ALOYSIUS PEDRO

Tarikh Pelantikan	01/08/1988	Tarikh Bersara	06/07/2024
Tempoh Perkhidmatan	36 Tahun		
Jawatan	Penolong Jurutera JA29		
Jabatan	Jabatan Kejuruteraan		



MAIMAH BINTI MUSI

Tarikh Pelantikan	06/02/1995	Tarikh Bersara	02/08/2024
Tempoh Perkhidmatan	29 Tahun		
Jawatan	Pembantu Tadbir (Perkeranian / Operasi) NA22		
Jabatan	Jabatan Kesihatan Persekitaran Bandaraya		



ANNIE @ NANCY MOSIKON

Tarikh Pelantikan	02/04/1984	Tarikh Bersara	04/08/2024
Tempoh Perkhidmatan	40 Tahun		
Jawatan	Pembantu Tadbir (Perkeranian / Operasi) NA22		
Jabatan	Jabatan Perancangan Bandaraya		



JAMILAH BINTI SUKOR

Tarikh Pelantikan	01/08/1995	Tarikh Bersara	06/08/2024
Tempoh Perkhidmatan	29 Tahun		
Jawatan	Pembantu Awam HA11		
Jabatan	Jabatan Landskap		



MARIS BOISI

Tarikh Pelantikan	17/04/1984	Tarikh Bersara	12/09/2024
Tempoh Perkhidmatan	40 Tahun		
Jawatan	Pembantu Awam HA11		
Jabatan	Jabatan Pengurusan Sisa Pepejal		

**BASALIAH BT. TULIANG @ MUNI**

Tarikh Pelantikan	02/01/1981	Tarikh Bersara	12/09/2024
Tempoh Perkhidmatan	43 Tahun		
Jawatan	Pembantu Awam HA11		
Jabatan	Jabatan Pengurusan Sisa Pepejal		

**JOMINOL BIN MORIDING**

Tarikh Pelantikan	16/05/2005	Tarikh Bersara	15/09/2024
Tempoh Perkhidmatan	19 Tahun		
Jawatan	Pembantu Awam HA11		
Jabatan	Jabatan Pengurusan Sisa Pepejal Pengurusan Sisa Pepejal		

**JUNIS BIN GITOM**

Tarikh Pelantikan	03/08/1991	Tarikh Bersara	21/10/2024
Tempoh Perkhidmatan	33 Tahun		
Jawatan	Pembantu Awam HA11		
Jabatan	Jabatan Pelesenan		

**HUSSAIN BIN LINGKAN**

Tarikh Pelantikan	01/08/1991	Tarikh Bersara	22/10/2024
Tempoh Perkhidmatan	33 Tahun		
Jawatan	Pembantu Awam HA11		
Jabatan	Jabatan Kejuruteraan		

**SAIDIN BIN GOMBISIN**

Tarikh Pelantikan	03/06/1988	Tarikh Bersara	05/11/2024
Tempoh Perkhidmatan	36 Tahun		
Jawatan	Pembantu Kemahiran HA26		
Jabatan	Jabatan Kejuruteraan		

**ROSLI BIN JALI**

Tarikh Pelantikan	30/12/1982	Tarikh Bersara	01/11/2024
Tempoh Perkhidmatan	42 Tahun		
Jawatan	Pembantu Tadbir (Perkeranian / Operasi) NA22		
Jabatan	Jabatan Penguatkuasaan		

**ROSMAH BINTI DATO MUTALIB**

Tarikh Pelantikan	01/07/1986	Tarikh Bersara	14/11/2024
Tempoh Perkhidmatan	38 Tahun		
Jawatan	Pembantu Tadbir (Perkeranian / Operasi) NA22		
Jabatan	Jabatan Pembangunan Sumber Manusia		

**HAPISAH MUSAH**

Tarikh Pelantikan	10/11/1987	Tarikh Bersara	30/11/2024
Tempoh Perkhidmatan	37 Tahun		
Jawatan	Pembantu Operasi NA11		
Jabatan	Jabatan Hal Ehwal Koporat		

**IBARAHIM PETRUS @ LAGA BIN ABU BAKAR**

Tarikh Pelantikan	03/12/1987	Tarikh Bersara	01/12/2024
Tempoh Perkhidmatan	37 Tahun		
Jawatan	Pembantu Awam HA11		
Jabatan	Jabatan Pelesenan		

**AWANG ALI BIN HAJI LATIP**

Tarikh Pelantikan	09/12/1985	Tarikh Bersara	11/12/2024
Tempoh Perkhidmatan	39 Tahun		
Jawatan	Pembantu Operasi NA11		
Jabatan	Jabatan Pengurusan Harta		

**LINA SINTAKAN**

Tarikh Pelantikan	01/11/1984	Tarikh Bersara	13/12/2024
Tempoh Perkhidmatan	40 Tahun		
Jawatan	Pembantu Awam HA11		
Jabatan	Jabatan Lanskap		

**DORA LOJUMAN**

Tarikh Pelantikan	01/10/1990	Tarikh Bersara	17/12/2024
Tempoh Perkhidmatan	34 Tahun		
Jawatan	Pembantu Awam HA11		
Jabatan	Jabatan Landskap		

**SAYUN BIN JUBIN**

Tarikh Pelantikan	03/05/1983	Tarikh Bersara	17/11/2024
Tempoh Perkhidmatan	41 Tahun		
Jawatan	Pembantu Awam HA11		
Jabatan	Jabatan Pengurusan Sisa Pepejal		

BELASUNGKAWA

ZAINUDDIN BIN ABD. GOYOH



TARIKH BERSARA TERBITAN
16 NOVEMBER 2024

TEMPOH PERKHIDMATAN
23 TAHUN

JAWATAN / GRED
PEGAWAI TADBIR / N44

JABATAN
JABATAN PENYELIDIKAN & INOVASI

BELASUNGKAWA

ZUNID BIN SAIRAN



TARIKH BERSARA TERBITAN
17 DISEMBER 2024

TEMPOH PERKHIDMATAN
18 TAHUN

JAWATAN / GRED
PEMBANTU AWAM / H11

JABATAN
JABATAN PENGURUSAN SISA PEPEJAL



Kempen
**PENGURANGAN
PENGUNAAN
BEG PLASTIK**

Hari-Hari Bawa Beg Bah

BERKUAT KUASA 1 OGOS 2024



**MALAYSIA
MADANI**






**DEWAN BANDARAYA
KOTA KINABALU**

**PEMBAYARAN BOLEH DIBUAT
SECARA DALAM TALIAN
MELALUI APLIKASI GoNet**

**MUAT TURUN
SEKARANG**



i-SEWA




TAMAN KERAMAT



TAMAN KURNIA JAYA



ANJUNG SENJA



ANJUNG PERDANA



PRR PUTERA KIONSOM

i-TEMPAH



**DEWAN MASYARAKAT
KOTA KINABALU**



**DEWAN SERBAGUNA
DAMAI**



**DEWAN SERBAGUNA
SRI KEPAYAN**



**MINI DEWAN
TAMAN SEMPELANG**



**DEWAN MUHIBAH
SEMBULAN**



**DEWAN SERBAGUNA
CENDERAKASIH**



**DEWAN SERBAGUNA
LUYANG**



**DEWAN MUHIBAH
TAMAN ANTARABANGSA**



**DEWAN MASYARAKAT
MANGGATAL**




**DEWAN SERBAGUNA
LIKAS**

GoNet Customer Support: 016-8300109 / 016-8300065

SILA IMBAS
KOD QR



Buletin DBKK
Januari hingga Jun 2024





HOTLINE

JABATAN PENGADUAN DAN PERHUBUNGAN AWAM
DEWAN BANDARAYA KOTA KINABALU



Submit and track your queries/complaints — all in one platform.
<https://dbkk.sabah.gov.my/icare>

 aduan.dbkk@sabah.gov.my



Dewan Bandaraya
Kota Kinabalu



dewanbandarayakk



dbkk.official



DBKKOFFICIALTVOnline

DITERBITKAN OLEH

Jabatan Pengaduan dan Perhubungan Awam
Dewan Bandaraya Kota Kinabalu
No. 1, Jalan Bandaran, 88675 Kota Kinabalu, Sabah, Malaysia